

Rõmãn Pawre kot Rõm kãm Jejus kôt hkwÿjê hwÿr kagà nẽ mẽn

Kagà ja na pre Pawre hipêx. Kêp Jejus nhÿ hã mẽ ahkre ho pa xwÿnh na pre. Na pre hte mry kà ho ixkre nhÿpêx nẽ mẽ kãm ho wẽnê ho mẽ hkôt pa pẽ mẽ piitã mẽ kãm Tirtũm kapêr jarênh o pa. Tã krĩ pẽ Rõm kamã mẽ kot Jejus kôt amnhĩ xunhwÿr xwÿnhjê hwÿr kagàja nhÿpêx nẽ mẽ hwÿr kumẽ. Kormã ma mẽ hwÿr môr nẽ mẽ omunh kêt ri.

Nẽ Jejus kêp Tirtũm mã tanhmã mẽ pajarênh to xwÿnh ã nhũm pre mẽ kãm harê nẽ hã kagà. Jejus kot mẽ pahte amnhĩ tomnuj pãnhã mẽ panê htyk jakamã na hte Tirtũm mẽ pahte hkôt amnhĩ xunhwÿr ã mẽ pahpumu nẽ Jejus kukwak ri mẽ pahte amnhĩ to mex xwÿnh ã mẽ pajarê.

Nẽ Tirtũm Karõ nhÿ hã mẽ kot amnhĩ nhÿpêx nyw nẽ hamaxpêr nyw o pa hã nhũm Pawre mẽ kãm karõ nẽ hã kagà. ã na pre mẽ kãm mẽmoj jarê nẽ hã kagà anẽ. Nẽ hã kagà ho:

¹ Pa Rõm nhõ xwÿnhjaja? Xà mẽ amex? E ot pa mẽ awÿr kagà nhÿpêx nẽ kumẽ. Tirtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhÿpêx to hã harênh o ri ixpa kaxyw. Na pre ixpê Pawre hã ixpumu nẽ ixãm. Jakamã na pa ã mẽ awÿr kagà nhÿpêx nẽ mẽn anẽ. Ixte Jejus nhÿ hã mẽ ahkre ho ri ixpa xwÿnh na pa. Na pa hte kãm tanhmã amnhĩ nhÿpêx to ho ri ixpa. Tã ã mẽ awÿr kagà nhÿpêx nẽ mẽn anẽ.

² Amnepêm na pre Tĩrtũm nhỹ hã kapêr jarênh o ri mẽ pa xwỳnhjaja mẽ pakukamã mẽ panhĩgêjtjê mã Jejus kukamã tanhmã harênh to ho ri pa. Nê mẽ kãm kapêr jarênh o mẽ hkôt pa nê mẽ kãm:

—Koja nhỹrmã Tĩrtũm mẽ pahpiitã mẽ panê tanhmã kot amnhĩ nhĩpêx to mã xwỳnh mẽ nhũm mẽ hpiitã hprĩ hã harênh ma nê omu. Anê.

Nhũm prem ã Jejus kukamã mẽ kãm harênh anhỹr o ri mẽ hkôt pa. Tĩrtũm kapêr ã kagà htũm kamã harênh xà hkôt tanhmã mẽ kãm harênh to. ³Tĩrtũm Kra Jejus Krisja na pre mẽ kãm harênh o ri mẽ hkôt pa. Mẽ panhõ Pahihti na. Kêp Tĩrtũm Kra htã na pre mẽ pahpyrà nê ì ho amnhĩ nhĩpêx nê wrỳ nê katorxà nhõxà hkre rũm kato. Jakamã kêp Tĩrtũm Kra pix kêt mãănên katorxà hkôt kêp higêt Tawi hkanrêhã htãmnhwỳ.

⁴ Kêp Tĩrtũm Kra htã nhũm prem axtem nê tanhmã hamaxpêr to nê kupĩ. Nom nhũm Tĩrtũm kêp amnhĩ Kra hã akupỹm ho htĩr. Jakamã na pu htem harênh ma nê kãm pajamaxpêr o:

—Jejus kêp Tĩrtũm Kraa. Mẽ kot kêp hpĩr tã nhũm akupỹm ho htĩr. Jakamã nhũm Tĩrtũm pyrà nê hihtỳx o hihtỳx. Anê.

⁵ Tã ã Tĩrtũm kot Kra nhĩpêx anhỹrja ri na mãănên pa ixto mex nê mẽ akaxyw ixãm. Jakamã na pa hte ma krĩ piitã hkôt mẽ kãm tanhmã Jejus Kris jarênh to ho ri mẽ hkôt ixpa. Ijaew mã nê Ijaew kêt xwỳnhjê mã. Mẽ kot harênh mar nê amnhĩ kaxyw kãm hamaxpêr nê kapêr kôt pix mã amnhĩ nhĩpêx mex kaxyw. ⁶⁻⁷ Nê mẽ apê Rôm nhõ xwỳnhjaja. Na ka prem Jejus kôt amnhĩ xunhwỳ nhũm Tĩrtũm ja hã mẽ apumu nê mẽ ato hkra nê

mê apê Jejus mẽ wa hkwy hã mẽ ajarê. Mẽ ate hkôt amnhĩ nhĩpêx kaxyw nhũm pre ã mẽ ajarênh anê.

Tã ot pa kagã nhĩpêx nê mẽ awȳr mēnh kaxyw. Tĩrtũm kot mẽ ato hkra xw̄ynhjê hw̄ȳr. Tĩrtũm kãm mẽ ajapêê.

Na pa hte mẽ ato mẽ panhĩpêêxã maati Tĩrtũm mẽ Pahihti Jejus Kris wa hw̄ȳr rãhã ri ixpa. Nê mẽ ato wa hw̄ȳr o:

—Kwa kêr ka wa Rôm kamã war akrajê pumunh mex nê mẽ kutã anojarêr rãhã nê. Kê mẽ hamakêtkati nê ãmnhĩx ri tanhmã amnhĩ nhĩpêx to ho ri pa. Anê.

Pawre kot Rôm nhõ xw̄ynhjê pumunh prãm ã amnhĩ jarênh

Atre 28.15-16; Rômãn 15.22-29

⁸ Nê na ka prem amnhĩ kaxyw Jejus Kris mã ajamaxpêr nê hkôt amnhĩ xunhw̄ȳ nhũm krĩ piitã hkôt mẽ pa xw̄ynhjaja mẽ ajarênh ma. Nê mẽ ate amnhĩ nhĩpêx nyw ã mẽ ajarênh ma nê axpên mã tanhmã mẽ ajarênh to ho pa. Nê mẽ ajarênh o:

—Kwa na xep Rôm kãm mẽ hkwȳjaja amnhĩ kaxyw Jejus mã hamaxpêr tỳx nê. Nê hkôt amnhĩ nhĩpêx mex rãhã ho ri pa. Anê.

Pa ã mẽ kot mẽ ajarênh anhỹrja ma nê ixkĩnh tỳx nê. Nê Tĩrtũm mã mẽ anhỹ hã ixkĩnh ã amnhĩ jarênh o ri ixpa. ⁹ Na pa hte mẽ ato hw̄ȳr rãhã ho ri ixpa. Nê nhỹri mẽ kãm Tĩrtũm Kra Jejus kapêr jarênh o ri ixpa nê mẽ amã ijamaxpêr nê mẽ ato kuw̄ȳ. Nê tanhmã Tĩrtũm mã amnhĩ nhĩpêx to ho ixpa pê mẽ amã ijamaxpêr nê mẽ ato kuw̄ȳ. Tĩrtũm kot ja hã ixpumunh mex. ¹⁰ Na pa hte tanhmã kãm

amnhî jarênh to kaxyw nê mẽ akaxyw amnhî to kuma nê kãm:

—Pa Tîrtûm? Na pa ra inhmã ma Rôm wÿr inhmôr nê kamã akôt ixkwÿjê pumunh prãm tÿx kumrêx. Xà kot ka tokyx mẽ hwÿr inhmê nà? Anê.

¹¹ Na pa ra inhmã mẽ awÿr inhmôr prãm tÿx nê. Na pre Tîrtûm Karõ tanhmã ixkrã hto pa ÿ hã kapêr ã kagà mar tÿx nê. Nê hkôt mẽmoj mex pumunh rax nê. Tã ra inhmã ma mẽ awÿr inhmôr nê amnhî xô ri mẽ amã harênh prãm nê. Mẽ ate inhmar nê aprî hã Jejus Kris kôt amnhî xunhwÿr tÿx nê hkôt amnhî nhîpêx mex rãhã ho ri apa kaxyw. ¹² Kot paj nhÿrmã ma mẽ awÿr mō. Nê mẽ awÿr pōj pu mẽ axpên pumu nê pahkînh nê. Mẽ pahte amnhî kaxyw Jejus Kris mã pajamaxpêr mex o papa hã axpên pumu nê pahkînh nê. Nê mẽ pahpiitã hkôt amnhî nhîpêx mex o ri papa.

¹³ E ixkwÿjaja. Xatã ixte mẽ awÿr ixkrã htã nhÿm mẽmoj xatã tanhmã ixpê àmtàr to pa kormã jar ixpa. Nom kot paj nhÿrmã ma mẽ awÿr mō. Mẽ ate ja hã inhmar kaxyw na pa ã Tîrtûm noo mã mẽ amã amnhî jarênh anê. Na pa pre krî hkwÿ kamã mẽ apê Ijaew kêt xwÿnh kwÿjê hwÿr ixpa. Nê mẽ kãm Jejus kot mẽ panê tanhmã amnhî nhîpêx to hã harênh o ri mẽ hkôt ixpa. Nhÿm mẽ hkwÿjaja inhma nê hkôt amnhî xunhwÿ. Ja kaxyw na pa inhmã ma mẽ anhō krî hwÿr inhmôr prãm nê. Mẽ akwÿjaja kot ixkapêr mar nê mẽ apyrã nê Jejus kôt amnhî xunhwÿr kaxyw. ¹⁴ Na pre ra Tîrtûm ixte kapêr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwÿnhjê kaxyw. Mẽ kãm ma ho mẽ pa xwÿnhjê mẽ mẽ kãm ma hkêt o mẽ pa xwÿnhjê mã. Nê mẽ kot kagà pumunh

xwÿnhjê mẽ mẽ kot kagà pumunh kêt xwÿnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa kaxyw. ¹⁵ Jakamã na pa ra inhmã mẽ apê Rôm nhõ xwÿnhjê hwÿr inhmõr prãm nê. Ixte mẽ anhõ krĩ kamã mẽ piitã mẽ kãm ja jarênh o ri ixpa nhũm mẽ kot inhmar nê mẽ pahpyrà nê Jejus kôt amnhĩ xunhwÿr kaxyw.

Jejus kot mẽ panê htyk ã harênh

Sikũn Ximotre 1.6-12

¹⁶ Nê Jejus kot mẽ panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhĩ kaxyw hkôt hamaxpêr nê hkôt amnhĩ xunhwÿ. Hãmri nhũm Tĩrtũm ja hã mẽ omu nê mẽ nê mẽ kot amnhĩ tomnuj o hapêx pa nê mẽ ho hkra. Nom mẽ ixpê Ijaew nhõ xwÿnhjê pix kêt. Mãänên mẽ apê Ijaew kêt xwÿnhjaja nhũm kãm mẽ pajapê ho axpên pyræk. Jakamã na pu htem Jejus kôt amnhĩ xunhwÿ nhũm Tĩrtũm ja hã mẽ pahpumu nê mẽ pahto hkra. Ja kaxyw àhpumunh tÿx o àhpumunh tÿx. ¹⁷ ãm mẽ kot amnhĩ kaxyw Jejus mã hamaxpêr xwÿnh pixjaja na hte mẽ ho hkra. Kapêr ã kagà htũm kot tanhmã ja jarênh to nê harênh kot:

Na hte Tĩrtũm mẽ kot amnhĩ kaxyw Kra mã hamaxpêr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anê.

Mẽ pahpiitã mẽ pahte amnhĩ tomnuj xwÿnh ã mẽ pajarênh

Atre 14.15, 17.22-29; Apokarip 9.20-21

18 Nê mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harēnh to. Na htem Tĩrtũm kapēr ma nom amnhĩ tomnuj gryk ã ãm kuma. Nê mẽ hkwyjaja kot kapēr mar pymaj kapēr õ ho mẽ kêp àmnàr rãhã ho ri pa nhũm Tĩrtũm ja hã mẽ omu nhũm ja kêp omnuj nê. 19-20 Te mẽ kot Tĩrtũm kot amnhĩ nhĩpêx ã omunh kêt pyrãk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kêp Tĩrtũm ã omunh mex nê. Nê kêp mẽmoj piitã ho kator xwỳnh ã omunh mex nê. Nê mex o mex ã omu nê hihtỳx o hihtỳx hã omu. Tĩrtũm kot amnhĩ nhĩpêx kot amnhĩrit mex nhũm mẽ kot omunh mex tã hkôt amnhĩ xunhwỳr kêt nê. Nê axtem nê hamaxpēr o:

—Tk. Tĩrtũm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japēr. Anê.

Ra mẽ kot amnhĩ nhĩpêx ã omunh mex tã ri ã hamaxpēr anê. Jakamã nhũm Tĩrtũm tee ri ja hã mẽ omu nhũm ja kêp omnuj tỳx nê. 21 Mẽ kot amnhĩ nhĩpêx ã omunh mex tã amnhĩ kaxyw tanhmã kãm hamaxpēr hto hkêt. Rỳ arĩ hamaxpēr japēr nê kãm:

—Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhỳr o amnhĩ kaxyw kãm kapēr kêt nê. Nê ãm htỳx tanhmã hamaxpēr punuj to pix o ri pa. Te kamàt kô kamã ri mẽ pa xwỳnhjê kot amnhĩ nhĩpêx pyrã nê mẽmoj mex pumunh kêt nê.

22 Mě kot àhpumunh tỳx ã amnhĩ to jarkrar o ri pa htã no ãm te mẽ hkrã kanhĩn kêt nẽ mẽ hamaxpěr kêt pyræk o amnhĩ nhĩpêx. 23 Jakamã na htem amnhĩm mẽmo karõ nhĩpêx. Mẽmo htyk mã xwỳnhjê hõ karõ nhĩpêx. Tanhmãn panhĩ karõ rỳ mẽmo mry karõ rỳ mẽmo kuwênh karõ. Rỳ mẽmo kagã karõ nhĩpêx. Hãmri nẽ ho õ sãnti nẽ te ri ho Tĩrtũm nhĩpêx pyræk o hipêx. Jao hpar pẽ hkõn krã ho rôrøk nẽ amnhĩ to kuwỳ nẽ kãm amnhĩ jagrer pẽ kãm mex o mex ã harẽ. Tĩrtũmja sãnti rom htĩr o htĩr tã nhũm mẽ axtem nẽ sãnti gryk ã hkaga nẽ ã amnhĩ nhĩpêx o pa anẽ. 24 Jakamã nhũm tee ri ã mẽ kot amnhĩ nhĩpêx anhỹr ã mẽ omu nẽ amnhĩ pyrã nẽ mẽ hkaga nẽ ãm mẽ omu. Jakamã nhũm mẽ ãm amnhĩ krã hkõt tanhmã ri amnhĩ tomnuj to ho pa. Nẽ axpẽn kãm ri tanhmã hpijaàm kêt to. Á na htem htỳx ri amnhĩ tomnuj anhỹr o pa.

25 Tĩrtũm kapěrja ãm hãmri htã nhũm mẽ axtem nẽ te amnhĩ pum rênh pyræk o hipêx nẽ kãm hamaxpěr kêt nẽ. Nẽ hpãnhã ri mẽ hêx xwỳnhjê kapěr pix ma nhũm ja te mẽ kãm mex pyræk. Na htem ã amnhĩ nhĩpêx anẽ hãmri nẽ axtem nẽ Tĩrtũm kot mẽmoj nhĩpêx pix parpê rôrøk nẽ amnhĩm mex o mex ã harẽ. Nom kot hipêx xwỳnh Tĩrtũm parpê mãn ã amnhĩ nhĩpêx anhỹr kêt nẽ. Nom kot mẽmoj nhĩpêx xwỳnhhta mex o mex jakamã koja mẽ kot hkõt amnhĩ nhĩpêx xwỳnhjaja jajê rom kãm mex o mex ã harênh tũm rãhã ho ri pa. 26 No mẽ kot amnhĩ tomnuj xwỳnhjaja na hte Tĩrtũm amnhĩ pyrã nẽ mẽ hkaga nhũm mẽ htỳx amnhĩ krã hkõt ri tanhmã amnhĩ tomnuj to ho ri pa. Jao mẽni hkwỳjaja axtem nẽ axpẽn gryk ã

mjên kaga nê axpên nhĩõ ho mjên. ²⁷ Nhũm mẽmy hkwyjaja mãânên axtem nê amnhĩ kwỳjê my gryk ã hprõ kaga nê axpên nhĩõ ho hprõ. Na htem ã axpên kamã hpijaàm kêt o pa anê. Mýrapê koja mẽ à pix kãm amnhĩ xà htỳx kamã hamak o pa. ²⁸ Na htem amnhĩ tomnuj gryk ã Tĩrtũm mã hamaxpêr kêt nhũm tee ri amnhĩ tã mẽ omu nê hamaxpêr o:

—Mẽ kãm amnhĩ tomnuj pix prãm jakamã kwār mẽ mãmri ã amnhĩ nhĩpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nê.

²⁹ Hãmri nê mẽmoj punuj pix mã hamaxpêr.

Nê kãm amnhĩ mex pix prãm mã hamaxpêr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Nê kãm axpên kaxyw tanhmã hamaxpêr punuj to pix prãm.

Nê kãm tanhmã axpên to kapêr punuj to pix prãm.

³⁰ Nê kãm mẽmoj tã axpên to hêx pix prãm.

Nê kãm Tĩrtũm prãm kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhĩ to jarkrar rãhã ho ri pa.

Nê tanhmã amnhĩ tomnuj to pix kukamã hamaxpêr. Nhũm mẽ katorxà nê mẽ hipêxà tee ri ja nê tanhmã mẽ kãm kapêr to no nhũm mẽ mar kêt kumrêx.

³¹ ã mẽ kot amnhĩ nhĩpêx anhỹr o ri mẽ pa xwỳnhjaja na hte Tĩrtũm kãm mẽmoj mex nhũm

mê kêp omnuj nê nhũm Tĩrtũm kêp mẽmoj omnuj nhũm mẽ kãm mex nê. Nê axpên mã mẽmoj tanhmã ho hã amnhĩ jarênh tã ho anhỹr kêt nê. Nê axpên kãm ukaprĩ ho ri pa hkêt nê. ³² Tĩrtũm kapêr ã kagà htũm kot tanhmã mẽ hkukamã mẽ harênh to nê mẽ harênh kot:

Ã mẽ kot amnhĩ nhĩpêx anhỹr o ri mẽ pa xwỳnhjaja
koja mẽ nhỹrmã ty hãmri nê amnhĩ xà htỳx
kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nê. Arĩ ã amnhĩ nhĩpêx anhỹr o pa rãhã nê. Nhũm mẽ hkwỳjaja mẽ kot amnhĩ tomnuj ã mẽ omu nê mẽ uràk nê ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà nê mẽ omu nê hkĩnh nê. Na htem ã amnhĩ nhĩpêx anhỹrja gryk ã Tĩrtũm kaga nhũm tee ri amnhĩ tã mẽ omu nê amnhĩ pyrà nê mẽ hkaga nê ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

2

Mẽ kot amnhĩ tomnuj xwỳnhjê hkukamã mẽ harênh

Matêwre 7.1-5; Sikũn Tesarôn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nê kot ka mẽ atô ã mẽ kot amnhĩ tomnuj anhỹr xwỳnhjê kot amnhĩ nhĩpêx ã mẽ harênh ma nê ã ajamaxpêr anê nê ajamaxpêr o:

—Tk. Mẽ kot amnhĩ tomnuj pix o ri pa xwỳnh kênã. No pa na ã ixte amnhĩ nhĩpêx anhỹr o ri ixpa hkêt. Mẽ kurom ixte tãm amnhĩ nhĩpêx o ri ixpa xwỳnh na pa.

Anh̄yr o amnh̄i jarē. Kwa nà mē ā ajamaxpēr anh̄yr kêt nē. Mē pajaxwỳja na pu htem tōhā mē urāk nē tanhmā amnh̄i tomnuj to. Tā ka mē ā mē kot amnh̄i tomnuj ā mē harēnh anē nē te ka ate amnh̄i jarēnh pyrāk. ² Tīrtūm kapēr ā kagà htūm kot mē kot amnh̄i tomnuj o ri mē pa xwỳnhjē jarēnh kot:

Mē kot amnh̄i tomnuj mỳrapê koja mē nh̄yrmā amnh̄i xà htỳx kamā hamak rāhā ho ri pa.
Anē.

Ām hāmri ā mē harēnh kot anh̄yr. ³ Mān ka mē atō tanhmā amnh̄i kukamā ajamaxpēr to nē ajamaxpēr o:

—Nà koja Tīrtūm nh̄yrmā amnh̄i nē kuwy hwỳr mē kot amnh̄i tomnuj xwỳnhjē rē. No pa koja hwỳr inhmēnh kêt nē. Anē.

Kwa mē ā ajamaxpēr anh̄yr kêt nē. Kot ka mē ā amnh̄i kukamā ajamaxpēr anh̄yr tā tōhā mē urāk nē tanhmā amnh̄i tomnuj to. Jakamā koja Tīrtūm mē urāk nē hā tanhmā mē ato. ⁴ Kot kaj mē atō tanhmā amnh̄i tomnuj to hāmri nē ām ja hā amnh̄i pumu nē ajamaxpēr o:

—Ixte amnh̄i tomnuj xwỳnh tā na hte Tīrtūm ja hā ixpumu nē ām ixpumu nē hā tanhmā ixto hkêt nē. Kēp mē ixkamā ukaprī xwỳnh jakamā na hte gryk tokyx anh̄yr kêt nē. Jakamā kot paj arī tanhmā amnh̄i tomnuj to ho ri ixpa nē aa jam inhūrer kêt nē. Tīrtūm kot ja hā tanhmā ixtore kaxyw hā.

Anh̄yr o ajamaxpēr. No ām ja kot anh̄yr kêt. Na hte Tīrtūm kormā amnh̄i tā mē pajamā. Mē pahte amnh̄i tomnuj kaga nē hpānhā hkôt amnh̄i xunhwỳr kaxyw na hte kormā amnh̄i tā mē pajamā.

Jakamã na kormã tanhmã ate amnhĩ tomnuj tota ã tanhmã ato hkêt nẽ.

⁵ Mẽ akrã hihtỳx jakamã mẽ amã hkôt amnhĩ xunhwỳr prãm kêt. Na ka htem tanhmã amnhĩ tomnuj to pix kukamã ajamexpêr o ri apa. Nẽ gaa nẽ ra anhỳr kumrêx. Nhũm Tĩrtũm tee ri ja hã mẽ apumu nhũm ja kêp omnuj tỳx o mỗ. Jakamã koja nhỹrmã tanhmã mẽ ajarênh to nẽ gryk tỳx kãm tanhmã mẽ atomnuj tỳx to. ãm hãmri na hte mẽ pahte amnhĩ nhĩpêx ã mẽ pahpumunh xà hkôt ahpỳnhã tanhmã mẽ panhĩpêx to.

⁶ Koja nhỹrmã mẽ pahpiitã kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwỳnhjaja nhũm mẽ ho mex nẽ. Nẽ mẽ kot amnhĩ tomnuj o ri mẽ pa xwỳnhjaja nhũm mẽ homnuj nẽ. Koja nhỹrmã mẽ pahpiitã mẽ pahto hpimràatã ã mẽ panhĩpêx anê. ⁷ Mẽ kot hkôt tãm ri amnhĩ nhĩpêx o pa pê kãm Tĩrtũm kot amnhĩm mẽ mex ã mẽ harênh prãm xwỳnhjaja koja nhỹrmã amnhĩm mẽ mex ã mẽ harê. Hãmri nhũm mẽ kuri htĩr tũm nẽ hkĩnh nẽ mex kumrêx nẽ pa ho pa. ⁸ Nom mẽ kot amnhĩ mã pix mã ri hamaxpêr o ri mẽ pa xwỳnhjaja. Nẽ mẽ kot tanhmã amnhĩ tomnuj to gryk ã Tĩrtũm kapêr kaga xwỳnhjaja koja kãm mẽ hkĩnh kêt nẽ tanhmã mẽ homnuj tỳx to. ⁹ Mẽ kot amnhĩ tomnuj xwỳnh piitã koja mẽ nhỹrmã amnhĩ xà htỳx kamã hamak rãhã nẽ pa ho pa. Ijaew kumrêxjaja nẽ hpãnhã Ijaew kêt xwỳnhjaja nhũm mẽ amnhĩ xà htỳx kamã hamak rãhã nẽ pa ho pa. Mẽ kot amnhĩ tomnuj tỳx o paja mỳrapê.

¹⁰ No kêt tãm mẽ kot amnhĩ nhĩpêx xwỳnhjaja

koja Tĩrtũm mẽ ho mex rax rãhã ho pa ho pa. Nẽ amnhĩm mẽ kot amnhĩ to mex xwỳnhjê hã mẽ harẽ. Nẽ tanhmã mẽ ho mex to nhũm mẽ kamã amnhĩ krit nẽ pa ho pa. Hamakêtkati nẽ hkĩnh nẽ àmnhĩx ri pa ho pa. Ijaew kwỳ kumrẽxjaja nẽ mãânẽn Ijaew kêt xwỳnh kwỳjaja nhũm mẽ mex nẽ hamakêtkati nẽ hkĩnh nẽ àmnhĩx ri pa ho pa. ¹¹ Koja Tĩrtũm nhỹrmã ahpỳnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarẽn to pê tanhmã mẽ panhĩpêx to. Mẽ ixpê Ijaewjaja nẽ mẽ apê Ijaew kêt xwỳnhjaja nhũm ã mẽ pahpiitã mẽ panhĩpêx anẽ.

¹² Amnepêm na pre finat Mojes mã tanhmã kapêr to nhũm kuma nẽ ô ri hã kagà hpa. Mẽ ixpê Ijaew ri na kapêr ã kagàja. Ra mẽ ixte mar tỳx jakamã koja mẽ ixtõ ra kapêr mar tỳx tã hkôt amnhĩ nhĩpêx kêt hãmri nhũm Tĩrtũm tee ri amnhĩ tã omu nẽ ã amnhĩ nhĩpêx anhỹrja mỳrapê nhỹrmã ma mẽ kot amnhĩ xà htỳx kamã hamak tũm xàta wỳr kumẽ. Kot kapêr mar tỳx tã hkôt amnhĩ nhĩpêx kêt mỳrapê nhũm ã hipêx anẽ. No kêt mẽ apê Ijaew kêt xwỳnhjaja mẽ ixkĩnhã mẽ ari Tĩrtũm kapêr ã kagà hkêt jakamã koja mẽ ate kapêr nhĩrôp mẽ akuhê hã mẽ apumunh kôt tanhmã mẽ anhĩpêx to hkêt nẽ. Koja hpãnhã mẽ ate tanhmã amnhĩ tomnuj to ho apa mỳrapê mẽ kot amnhĩ xà htỳx kamã hamak o pa tũm xàta wỳr mẽ arẽ.

¹³ Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwỳnh ã mẽ harẽn kêt nẽ. ãm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwỳnh ã mẽ harẽ. ¹⁴ No mẽ hkwỳjaja kormã kot kapêr mar kêt tã te ra mẽ kot mar mex

pyràk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrã nê Tĩrtũm kapêr mar tỳx nê hkôt amnhĩ nhĩpêx o ri pata pyrãk. ¹⁵ Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapêr kot mẽ hkrãm gjêx pyrãk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nê hkaprĩ nê. Nê tãm amnhĩ nhĩpêx ã amnhĩ pumu nê hkĩnh nê.

¹⁶ Tã koja nhỹrmã Tĩrtũm Jejus Kris mã anê nhũm kuma hãmri nê mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harênh to. Nê mẽ hamaxpêr kôt mẽ omunh mex xà hkôt tanhmã mẽ harênh to. Mẽ papajaja mẽ pahte axpên jamaxpêr kôt axpên pumunh kêt tã Jejus kot mẽ pajamaxpêr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harênh o ixpa pê ã mẽ kãm ixujarênh anhỹr o ri ixpa.

Pawre kot hkwyjê mã kapêr

Rômãn 3.19-20

¹⁷ Nê ixpyrà nê mẽ apê Ijaew kwỳjaja na ka mẽ axtem nê Ijaew kêt xwýnhjê mã tanhmã amnhĩ to jarkrar o ri apa nê mẽ kãm:

—Nà mẽ ixpê Ijaew ri Tĩrtũm kapêr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra. ¹⁸ Nê mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par nê mẽ kot amnhĩ to mex xà pumunh par nê mẽ kot amnhĩ tomnuj xà pumunh par. Mẽ apê Ijaew

kêt xwỳnhjê rom mẽ ixte mẽmoj piitã omunh par kumrẽx. Anẽ.

¹⁹⁻²⁰ Nẽ amnhĩ jarẽnh o:

—Nà te mẽ ixpê mẽ nohkre xwỳnhjê pa hã mẽ hamỳnh nẽ ri mẽ ho ixpa xwỳnh pyràk. Jakamã Ijaew kêt xwỳnh pê htỳx ri mẽ pa xwỳnhjaja na pa htem mẽ kãm Tĩrtũm kapẽr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

²¹ Anhỹr ã amnhĩ jarẽnh nẽ mẽ ate kapẽr o mẽ ahkre ho apa htã hkôt amnhĩ nhĩpêx kêt nẽ.

Nẽ mẽ ate mẽ kot axpẽn pê àhkĩnh nẽ mẽ hkurê htã no ãm mẽ kamjaja axpẽn pê axàhkĩnh o ri apa.

²² Nẽ mẽ amã sãnti hkĩnh kêt ã amnhĩ jarẽnh tã axtem nẽ hwỳr agjê nẽ hpar pê kàxpore nhĩkwỹ xwỳnh o axàhkĩnh o ri apa.

Nẽ mẽ kot axpẽn prõ ho amnhĩkati nẽ mẽ hkurê ho apa htã mẽ kamjaja ã ri amnhĩ nhĩpêx anhỹr o ri apa.

²³ Nẽ mẽ ate Tĩrtũm kapẽr ã kagà mex o mex ã harẽnh tã hkôt amnhĩ nhĩpêx hkêt nẽ. Jakamã nhũm mẽ akwỳjaja ja hã mẽ apumu nẽ mẽ apyrà nẽ Tĩrtũm ã hpijaam kêt o pa.

²⁴ Tĩrtũm kapẽr ã kagà htũm kot tanhmã mẽ ate amnhĩ nhĩpêx ã mẽ ajarẽnh to nẽ mẽ ajarẽnh kot: Mẽ kệp Ijaew kêt xwỳnhjaja na htem Ijaew kot htỳx ri amnhĩ nhĩpêx o ri mẽ pa hã mẽ omu nẽ mẽ ý hã tanhmã Tĩrtũm o kapẽr punuj to ho ri pa. Anẽ.

²⁵ Mẽ pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kệp

měmy kwrýt kà jakà. Finat Mojes kot Tirtùm nhỹ hã mẽ panhĩgêjtjẽ mã hã karõ xà hkôt na pu htem ã mẽ hipêx anẽ. Mẽ pahte Tirtùm mã mẽ pahkrajê nhõr ã amnhĩ to amnhĩrĩt kaxyw. Jakamã na pu htem arĩ Mojes kapêr kôt ã mẽ hipêx anẽ nhũm Tirtùm kãm ja mex nẽ. Nom kot pu mẽ kapêr kwým ri tanhmã amnhĩ nhĩpêx to ho papa nhũm ja kêp omnuj tỳx nẽ hãmri pu mẽ tee ri mẽ pahkrajê my kwrýt kà jakàr kaprỳ. Na hte Tirtùm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nẽ. Nom mẽ pahte kapêr kôt amnhĩ nhĩpêx mex o papa pẽ mẽmy kwrýt kà jakàrja nhũm kãm mex nẽ. ²⁶ Ijaew kêt xwýnhjaja kot ã mẽ hkrajê nhĩpêx anhỹr kêt tã ra mẽ hkwyjaja Tirtùm kapêr ma nẽ hkôt amnhĩ nhĩpêx o ri pa. Jao te mẽ kot amnhĩ my kwrýt kà jakàr pyràk o amnhĩ nhĩpêx. Jakamã nhũm Tirtùm ja hã mẽ omu nẽ mẽ kãm:

—Nà ãm hãmri. Mẽ ate amnhĩ my kwrýt kà jakàr kêt tã mẽ apê ixkra na ka mẽ. Anẽ.

²⁷ Mẽ kot amnhĩ jakàr kêt tã Tirtùm kapêr kôt amnhĩ nhĩpêx mex o ri pa nhũm amnhĩ tã mẽ omu nẽ mẽ arom amnhĩm mẽ kot amnhĩ to mex xwýnh ã mẽ harẽ. Mẽ kot amnhĩ jakàr kêt tãã.

No mẽ kajaja mẽ ate Tirtùm nhỹ hã Mojes kapêr ã kagà mar tỳx tã hkôt amnhĩ nhĩpêx kêt nẽ. Ja mýrapê koja ja hã mẽ apumu nẽ Ijaew kêt xwýnhjê kĩnhã mẽ ate amnhĩ tomnuj xwýnh ã mẽ ajarẽ. Ra mẽ ate amnhĩ jakàr tã mẽ ate amnhĩ tomnuj xwýnh ã mẽ ajarẽ.

²⁸ Nẽ kot ka mẽ atõ tanhmã amnhĩ to jarkrar to nẽ amnhĩ jarênh o:

—Nà ixpê Ijaew jakamã na hte Tĩrtũm mẽ kot inhmý kwryt kà krãhyr kôt ixto kraa. Anẽ.

Nom xà na hte Tĩrtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Nà htem ãm htỳx ã amnhĩ to jarkrar anhỹr kaprỳ ho pa.

²⁹ Nẽ Tĩrtũm Karõ kot mẽ hkarõ mã gjêx xwỳnhjaja kêp Tĩrtũm kra jakamã na htem Tĩrtũm kãm hprãm xà hkôt amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nẽ. Rỳ htỳx hamaxpêr o:

—Nà kot paj Mojes kapêr ã kagà hkôt amnhĩ nhĩpêx nhũm Tĩrtũm ja hã ixpumu nẽ amnhĩm inhmex ã ijarẽ nẽ ixto hkra.

Anhỹr o hamaxpêr kêt nẽ. Na htem hamaxpêr o:

—Nà ra Tĩrtũm Karõ kot ixkarõm àr jakamã ixpê hkra nhũm amnhĩm inhmex ã ijarẽ. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmrĩ ixkwỳjaja amnhĩm inhmex kêt ã ijarẽ. Anẽ.

Kêr ka mẽ ã ajamaxpêr anhỹr o ri pa. ã mẽ hamaxpêr anhỹr na mex o mex.

3

¹ Nẽ mãn ka mẽ ra tee ri tanhmã amnhĩ kukamã ajamaxpêr to nẽ ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtre hkêt nẽ? Mẽ kêp Ijaew kêt xwỳnhjaja kot amnhĩ jakàr kêt tã nhũm Tĩrtũm mẽ pahpyrà nẽ mẽ ho hkra. Anẽ.

Kwa mẽ ã ri ajamaxpêr anhỹr kêt nẽ. ² Mẽ pahpê Ijaew na pre Tĩrtũm Ijaew kêt xwỳnhjê rom mẽ pahto mex rax nẽ. Na pre amnepê mã mẽ

panhîgêt mã tanhmã kapêr to. Mẽ pahpiitã mẽ pahte mar nẽ hkôt amnhĩ nhîpêx kaxyw. Nom Ijaew kêt xwýnhjê nhîgêt mã ã kapêr anhÿr kêt nẽ. ãm mẽ pahpê Ijaew nhîgêt pix mã kapêr. Jakamã mẽ pahpê Ijaew mã ja mex kumrêx. ³ Nom kot kaj mẽ atõ ja ma nẽ ajamaxpêr o:

—Nà Tĩrtũm kot mẽ ixto mex mã mẽ ixtã amnhĩ jarênh tã no nhũm xep mẽ inhîgêt kwýjaja hkôt amnhĩ nhîpêx kêt nẽ. Na xep prem kapêr kwým ri amnhĩ tomnuj o pa. Jakamã ko. Koja Tĩrtũm mẽ ixpê mẽ hkanrêhã mẽ htãmnhwýjaja tanhmã mẽ ixto mex to japêr ko. Anê.

⁴ Kwa mẽ ri ã ajamaxpêr anhÿr kêt nẽ. Tĩrtũm na hte mẽ pahpiitã mẽ pakurom mẽmoj tã amnhĩ jarênh o hêx kêt nẽ. Tã ra kot tanhmã mẽ pahtã amnhĩ jarênh to xà hkôt koja ã mẽ pahto mex anê. Kapêr ã kagà htũm kot mẽhõ tanhmã Tĩrtũm mã kapêr to nẽ harênh kot:

Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhîpêx o ri apa. Jakamã na htem ãm axpên mã axêx ã akapêr ã ajarênh kaprý. Anhÿr o harê.

⁵ No kot ka mẽ atõ atýx ajamaxpêr nẽ ajamaxpêr o:

—Xà koja Tĩrtũm tanhmã mẽ ixte amnhĩ tomnuj to hã mẽ ixpumu nẽ gryk? Nà koja gryk kêt nẽ. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nẽ ixrom Tĩrtũm tapxipix kot amnhĩ to mex o pa xwýnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix mã mãn kot tãm amnhĩ nhîpêx xwýnh ã harê. Hãmri nhũm Tĩrtũm amnhĩ tã ixpumu nẽ tanhmã ixto hkêt nẽ. Koja tanhmã

ixto japêr hãmri nê ixpyrà nê amnhĩ tomnuj nê. Anê.

Kot kaj mẽ ã ajamaxpêr anê nê ãm amnhĩ krã hkôt ã ajamaxpêr anhÿr kaprÿ. Nom ã ajamaxpêr anhÿrja Tĩrtũm jamaxpêr kôt kêt. ⁶ Kwa mẽ ri ã ajamaxpêr punuj anhÿr kêt nê. Tĩrtũm kot mẽ pahpyrà nê aa kot amnhĩ tomnujre hã. Kop ãm mẽ pahpyrà nê tanhmã kot amnhĩ tomnuj to ronhÿx tanhmã kot we amnhĩ to nê mẽ pahte amnhĩ tomnuj xwÿnh ã mẽ pajarê? Nhÿx mẽ pahpyrà nê ã amnhĩ jarênh anê. Nà ã mẽ ajamaxpêr anhÿrja mex kêt.

⁷⁻⁸ E pa ixprĩ hã mẽ amã ja jarê ka mẽ inhma. Kot kaj mẽ atõ amnhĩ kukamã ajamaxpêr o:

—E kot paj mãmrĩ ri mẽmoj tã ixêx o ri ixpa kê mẽ ixêx nhi hã ixpumu nê ixrom Tĩrtũm pix mã mãn kot amnhĩ to mex ã harê. Nê ãm pix mã mãn hêx kêt xwÿnh ã harê. Hãmri nhũm Tĩrtũm amnhĩ tã ixpumu nê mẽ ã mẽ kot harênh anhÿrja ma nhũm ja kãm mex nê nhũm hkĩnh nê. Jakamã ixêx o ri ixpaja ã tanhmã ixto hkêt nê. Ra mẽ kot ixrom tãm kot amnhĩ nhĩpêx o pa xwÿnh ã harênh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nê. Kêr kê mẽ ja hã ixpumu nê ixrom Tĩrtũm tapxipix kot amnhĩ to mex xwÿnh ã harê.

Anhÿr o ajamaxpêr nom mẽ ajamaxpêrja kot anhÿr kêt. Na hte akwÿjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. ã mẽ ajamaxpêr anhÿr o ri apa xwÿnhjaja koja Tĩrtũm mẽ atomnuj tÿx nê kãm ga.

*Mě mẽ pahte amnhĩ tomnuj xwỳnh ã mẽ pajarēnh
Wam Korĩt 6.9; Karatas 3.22; Xitre 3.3*

⁹ Tã tanhmã kot puj mẽ pahpê Ijaew amnhĩ jarēnh to? Xà kot pu mẽ pahte amnhĩ to mex o Ijaew kêt xwỳnhjê jakrenh ã amnhĩ jarē? Nà mẽ pahte ã amnhĩ nhĩpêx anhỹyre hã. Mě pahpê Ijaew nẽ Ijaew kêt xwỳnhjaja. Mě pahpiitã mẽ pahte amnhĩ tomnuj o axpẽn pyræk. Na pa pre ra mẽ amã ja jarē. ¹⁰ Tĩrtũm kapêr ã kagà htũm kot ja jarēnh kot:

Měhõ na we aa kot amnhĩ tomnuj kêt kumrêx nẽ pa?

¹¹ Nẽ mẽhõ na we kot mẽmoj mex piitã omunh par? Nẽ mẽhõ na kãm Tĩrtũm prãm?

¹² Nà amrakati kumrêx. Na mẽ ra piitã hkaga hpa. Nẽ kapêr kwỳm ri tanhmã amnhĩ tomnuj to ho pa. ãm mẽhõ pyxire nẽ amnhĩ to mex o ri pa hkêt kumrêx.

¹³ Na htem kapêr punuj pix o ri pa.

Jakamã Tĩrtũm noo mã mẽ kot amnhĩ nhĩpêxja te kot mẽmoj tyk nẽ hkro punuj pyræk.

Na htem ãm ri hêx pix kukamã ri hamaxpêr o pa. Tanhmã mẽ hêx to xàja te kêp kagã xoprê nhõ wenẽn xihtỳx pyræk.

¹⁴ Nẽ na htem mẽ piitã mẽmoj nhĩxi ho ri axpẽn mã mẽ hixi jarēnh o pa. Nẽ ri tanhmã axpẽn japrỳ hto ho pa.

¹⁵ Nẽ tanhmã kapêr mã gêt kãm mẽ kãm kapêr to.

¹⁶ Nẽ tanhmã mẽ hkwỳjê homnuj to. Jakamã nhũm mẽ piitã ri hkaprĩ nẽ mex kêt nẽ pa.

¹⁷ Nhũm htem ãm axpẽn mã mẽ gryk xà pix o kapêr o pa.

18 Nē Tīrtūm ā hpijaàm kêt o pa. Na htem kapēr ma nē ãm kuma nē kãm hkĩnh kêt o pa.

Ā na htem amnhĩ nhĩpêx anhÿr rāhā ho pa. Anē.

Ā Tīrtūm kapēr ā kagà htūm kot mē pajarēnh anhÿr.

19 Mē pahpê Ijaew ra mē pahte ja jarēnh mar tÿx. Tīrtūm kapēr ā kagà htūm kwÿ na. Na hte ã mē kot amnhĩ tomnuj xwÿnhjê jarēnh anē. Nē mǎānēn mē papajaja. Mē pahpê Ijaew na hte ã mē pajarēnh anē. No ãm mē papapxipix hkêt. Krĩ piitā hkôt ri mē pa xwÿnhjaja nhūm ā mē harēnh kot anhÿr. Ijaew kêt xwÿnhjaja nē mē pahpê Ijaew. Mē pahpiitā mē pahte amnhĩ tomnuj xwÿnh jakamā mēmo kaxyw kot pu mē pahte amnhĩ tomnuj kêt ã ri amnhĩ to jarkrar o papa? Kot puj mē ã amnhĩ jarēnh anhÿr kaprÿ. Jakamā koja Tīrtūm mē pahpiitā mē pahte amnhĩ tomnuj mÿrapê tanhmā mē panhĩpêx to. 20 Mē pahtō koja mē pahte kapēr kôt pix mǎ amnhĩ nhĩpêx o papa hǎ mē pajarē? Nē mē pahtō mǎ koja mē pamā kapēr nē mē pamā:

—Nà na ka hte akatàt kôt ixkapēr kôt pix mǎ amnhĩ nhĩpêx mex nē. Ām hāmri na ka hte ã amnhĩ nhĩpêx anhÿr o apa.

Anhÿr o mē pahtō mǎ kot we ã kapēr anē? Nà aa kot mē pahtō mǎ kapēr anhÿr kêt. Na pu htem ãm kapēr ma nē tee ri amnhĩ kukamā pajamāxpēr. Mē pahte amnhĩ tomnuj ã amnhĩ pumunh kaxyw na pre mē pamā kapēr ã kagà htūmja gō. Mē pahtō mē pahte kapēr ã kagà hkôt amnhĩ nhĩpêx mex o papa hkêt kēnā kot kêt ri amnhĩm mē pahte amnhĩ to mex xwÿnh ã mē pajarē.

*Tanhmā Tīrtūm kot mē pahto hkra to hǎ harēnh
Atre 17.30-31; Karatas 2.16-21; Piripos 3.7-9;*

Xitre 3.5; Xiakre 2.10

²¹ Nê na hte Tirtûm mẽ pahte kapêr kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nê. Jakamã mẽhõ kukwak ri koja we ã mẽ pajarênh anê? Nà nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anê. Tã mẽhõ kukwak ri kot ã mẽ pajarênh anhÿr xwýnhhta na pre ra mẽ pamã ho amnhĩrít. Amnepêm Tirtûm kapêr ã kagà htûm kamã na pre mẽhõ hkukamã tanhmã harênh to. Nê Tirtûm nhÿ hã mẽ kapêr jarênh o pa xwýnhjaja haxwÿja kukamã tanhmã harênh to ho pa. ²² Jejus Krisja na prem hkukamã harênh o pa. Tãm na pu htem hkôt amnhĩ xunhwÿ nê amnhĩ kaxyw kãm pajamaxpêr rãhã ho papa nhũm Tirtûm ja pix ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarê. Mẽ kot Jejus kôt amnhĩ xunhwÿr xwýnh piitãã. Mẽ ixpê Ijaew nê mẽ apê Ijaew kêt xwýnhjaja. Mẽ pahpiitã mẽ pahte axpên pyræk jakamã kot puj mẽ pahtõ Jejus kôt amnhĩ xãm nhũm Tirtûm Kra Jejus kot amnhĩ to mex pix o pa kukwak ri mẽ pahpumu nê amnhĩm pajarênh o:

—Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nê amnhĩ to mex o pa. Anê.

²³ No mẽ pahtõ na mẽ pahte Tirtûm mẽ Jejus wa uræk nê amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwýnh kênã. ²⁴ Tã Tirtûm kot mẽmoj tã mẽ pakutã nojarêt rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwýnh ã mẽ pajarênh o pa. Mẽ pahte Jejus kôt

amnhĩ xunhwỳr xwỳnh piitãã nhũm ã mẽ pajarēnh anē. Ra Jejus kot htyk o mẽ pahte amnhĩ tomnuj piitã hpānhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhĩ to mex xwỳnhjê hã mẽ pajarē. Te mẽ pahte amnhĩ tomnuj kêt kumrēx pyrāk mẽ pajarē. ²⁵⁻²⁶ Na pre mẽ pahwỳr Jejus mẽ nhũm mẽ pahwỳr wrỳ nē mẽ panē ty nē htyk o mẽ pahte amnhĩ tomnuj piitã hpānhã amnhĩrer pa. Jakamã kot pu mẽ pahtō amnhĩ kaxyw hkôt pajamexpēr nhũm Tĩrtũm ja hã mẽ pahpumu nē Kra kukwak ri amnhĩ katut kôt mẽ pahte amnhĩ tomnuj piitã rēnh pa. Jao te aa mẽ pahte amnhĩ tomnuj kêt kumrēx pyrāk ã mẽ pahpumu.

No kêt amnepēm kormã Jejus wrỳk nē mẽ panē htyk kêt ri mẽ pa xwỳnhjaja. Tanhmã na pre Tĩrtũm mẽ kot hkôt amnhĩ xunhwỳr xwỳnhjê nhĩpêx to? Kormã Jejus mẽ panē htyk kêt ri mẽ pa xwỳnhjaja tanhmã na pre mẽ hipêx to? Nà na pre mẽ hkwỳjaja amnhĩ kaxyw Tĩrtũm kôt hamaxpēr nē hkôt amnhĩ xunhwỳ nhũm amnhĩ tã mẽ omu nē amnhĩm mẽ harēnh o:

—Nà ãm hãmri. Koja nhỹrmã Ixkra ma mẽ hwỳr wrỳ nē mẽ nē ty nē htyk o mẽ kot amnhĩ tomnuj pānhã amnhĩrer pa. Jakamã koja mẽ tãmjaja amnhĩ tomnuj pānhã amnhĩrer kêt nē. Anē.

Tã nhũm Jejus tãm mẽ pahwỳr wrỳ nē mẽ pahpiitã mẽ panē ty. Jakamã nhũm Tĩrtũm ra mẽ pahte hkôt amnhĩ xunhwỳr xwỳnhjaja Kra kukwak ri amnhĩ katut kôt mẽ pahte amnhĩ tomnuj piitã rēnh pa. No na hte amarĩ ã mẽ panhĩpêx anhỹr kêt nē. ãm Jejus tyk pix kukwak ri na hte ã mẽ

panhîpêx anê. Ām hāmri na hte ā mẽ panhîpêx mex anê. Na hte tām mẽ panhîpêx rāhā ho pa. ²⁷Jakamā kot puj mẽ ā pajamaxpêr anê nê pajamaxpêr o:

—Nà na pa hte amnhî to mex rāhā o ri ixpa. Amnhî to mex o mẽ piitā mẽ hakrenh pa.

Anhÿr o pajamaxpêr kêt nê. Koja mēhō ā hamaxpêr anê nê ām amnhî jarēnh o hêx. Na hte Tirtūm mẽ pahte amnhî to mex ā mẽ pahpumunh kôt amnhīm mẽ pahte amnhî to mex xwÿnh ā mẽ pajarēnh kêt nê. Mē pahte amnhî to mex rāhāre hā. Nom na pu htem amnhî kaxyw Jesus mā pajamaxpêr nê hkôt amnhî xunhwÿ nhūm ja hā mẽ pahpumu nê rī kormā amnhīm mẽ pamex ā mẽ pajarē.

²⁸E pa axte tanhmā mẽ amā ja jarēnh to ka mẽ aprī hā inhma. Mēmoj pumunh kôt na hte Tirtūm mẽ pahte amnhî to mex xwÿnh ā mẽ pajarēnh wehe? Xà mẽ pahte kapêr tūm kôt amnhî nhîpêx o ri papa hā mẽ pahpumunh kôt? Nà na hte ja hā mẽ pahpumunh kôt ā mẽ pajarēnh anhÿr kêt nê. Mē pahte hkôt amnhî nhîpêx rāhā ho papare hā. Ām mẽ pahte amnhî kaxyw Kra Jesus kôt pajamaxpêr nê hkôt amnhî xunhwÿr ā mẽ pahpumunh kôt pix mā na hte mẽ pahte amnhî to mex xwÿnh ā mẽ pajarē. Ja pix ā mẽ pahpumunh kôt na hte ā mẽ pajarēnh anê.

²⁹Nē xà Tirtūm kēp mẽ ixpê Ijaew pix nhō Tirtūm pix na? Nà kēp mẽ ixpix nhō Tirtūm kêt. Kēp mẽ ixpê Ijaew nhō Tirtūm nē määnēn kēp mẽ apê Ijaew kêt xwÿnhjê nhō Tirtūm.

³⁰Nē Tirtūm ām pyxi mex. Axtem hō kêt. Na hte mẽ pahpiitā mẽ panhîpêx o axpēn pyrāk. Jakamā

na hte mẽ kot amnhĩ kaxyw Jejus kôt hamaxpêr o mẽ pa xwỳnhjê pumu nẽ mẽ kot amnhĩ to mex xwỳnh ã mẽ harê. Mẽ ixpê Ijaew nẽ mãânên mẽ apê Ijaew kêt xwỳnhjaja.

³¹ Tã koja mễhỗ htỳx hamaxpêr o:

—Nà ixte amnhĩ kaxyw Jejus kôt ijamaxpêr mex o ixpa nhũm Tĩrtũm kot amnhĩm inhmex ã ijarênh jakamã kot paj axte kapêr kôt amnhĩ nhĩpêx kêt nẽ. Kot paj ãm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kênã.

Anhỹr o ajamaxpêr japêr. Kwa mẽ ã ri ajamaxpêr anhỹr kêt nẽ. Na htem amnhĩ kaxyw Jejus kôt hamaxpêr hãmri nẽ kãm hkôt amnhĩ nhĩpêx prãm rãhã nẽ pa ho pa.

4

Apraãw kot amnhĩ kaxyw Tĩrtũm kôt hamaxpêr Karatas 3.6-18; Xiakre 2.23

¹ Nẽ mẽ panhĩgêt finat Apraãwja kêp mẽ pahpê Ijaew pàr krax. Tã mẽmoj tã na pre Tĩrtũm omu nẽ kot amnhĩ to mex xwỳnh ã harê? ² Xà kot kãm tanhmã amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harênh anê? Nà ja kôt kêt. Kop apu ja kôt ã kot harênh anhỹr ronhỹx Apraãw amnhĩ tã omu nẽ Tĩrtũm mã amnhĩ to jarkrar nẽ kãm:

—Pa Tĩrtũm? E mãn ka ixpumu. Na pa hte akapêr kôt amnhĩ nhĩpêx mex o ri ixpa.

Anhỹr o nhỹx pre kãm amnhĩ to jarkrar. No na pre tanhmã kãm amnhĩ to jarkrar to hkêt nẽ. ³ Tã mẽmoj tã omunh xà hkôt na pre Tĩrtũm amnhĩm mex ã harê? Nà Tĩrtũm kapêr ã kagà htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kôt hamaxpěr nẽ hkôt amnhĩ xãm nhũm amnhĩ tã omu nẽ amnhĩm mex ã harẽ. Anẽ.

⁴ Mẽ õ patrãwjaja na htem kãm mẽ àpênh xwýnhjaja àpênh mex ã mẽ omunh xà hkôt mẽ kãm amnhĩre.

⁵ No Tĩrtũm na hte ã mẽ panhĩpêx anhỹr kêt nẽ. Na hte mẽ pahte tãm amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nẽ. ãm mẽ pahte amnhĩ kaxyw Kra Jejus kôt pajamaxpěr nẽ hkôt amnhĩ xunhwýr ã mẽ pahpumunh kôt pix mã na hte amnhĩm ã mẽ pajarênh anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kôt pajamaxpěr xwýnh pixjaja na hte ã mẽ pajarênh anẽ.

⁶ Jakamã na hte mẽ pamã amnhĩ jarênh o:

—Ixte mẽ amex ã mẽ ajarênh tã no ãm mẽ ate amnhĩ to mex kôt mẽ apumunh kôt na pa ã mẽ ajarênh anhỹr kêt nẽ. ãm mẽ ate amnhĩ kaxyw Ixkra mẽ wa ixkôt ajamaxpěr nẽ wa ixkôt amnhĩ xunhwýr ã mẽ apumunh kôt na pa hte ã mẽ ajarênh anẽ. Anẽ.

Pu mẽ ã kot pamã kapěr anhỹr ã amnhĩ tã kuma nẽ pahkĩnh nẽ. Pahi finat Tawi na pre haxwýja ja jarênh o:

⁷ Na hte Tĩrtũm amnhĩ katut kôt mẽ pahte amnhĩ tomnuj piitã rênh pa nẽ axte kãm hamaxpěr kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

⁸ Nẽ amnhĩ kukamã pajamaxpěr o: “Hêxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkaprĩ nẽ.

Hāmri nē amnhī to Tīrtūm wỳ nhūm inhma nē
ixte amnhī tomnuj o hapêx pa nē axte kām
hamaxpēr kêt nē.

Nà ām hāmri. Ja mex kumrêx.” Anē.

⁹ Tā mẽ kot ja hā amnhī pumunh nē hkīnh
xwỳnhjaja mẽmojaja na mẽ? Xà mẽ kot amnhī my
kwrýt kà jakàr xwỳnh pix kwỳjaja na pre pahi Taw-
ija ā mẽ harēnh anē nà? Nà mẽ tapxipixjaja kêt.
Māānēn mẽ kot amnhī jakàr kêt xwỳnh kwỳjaja.
Tanhmā na pre ra Tīrtūm kapēr ā kagà htūm kot
finat Apraāw jarēnh to? Na pre harēnh o:

Na pre Apraāw amnhī kaxyw Tīrtūm kôt
hamaxpēr nē hkôt amnhī xām nhūm amnhī
tā omu nē amnhīm mex ā harē. Anē.

¹⁰ Xà Apraāw ra kot amnhī my kwrýt kà krāhyr
nhīrô pê na pre Tīrtūm amnhīm mex ā harē? Nà
kormā kot amnhī krāhyr kêt ri na pre ā harēnh
anē. ¹¹ Kormā kot amnhī krāhyr kêt ri kām kapēr
nē kām:

—E ate amnhī kaxyw inhmā ajamaxpēr nē ixkôt
amnhī xām ā ixte apumunh kôt na pa amnhīm
amex ā ajarē.

Anhỹr o kām kapēr hāmri nē rī kormā kām
tanhmā amnhī krāhyr to hā kām karō nhūm kuma
nē mar xà hkôt amnhī my kwrýt kà hkwy krāhta.
Kot Tīrtūm mā amnhī nhōr ā amnhī to amnhīrīt
kaxyw ā amnhī nhīpêx anē.

Nom kormā amnhī krāhyr kêt ri na pre Tīrtūm
amnhīm mex ā harē. Tā Ijaew kêt xwỳnhjaja kot
amnhī jakàr kêt tā mẽ hkwyjaja Apraāw pyrà nē
amnhī kaxyw Tīrtūm mā hamaxpēr nē kām amnhī
nhōr jakamā Apraāw te kêp mẽ hpàr krax maati
pyràk. ¹² Nē māānēn mẽ pahpê Ijaew. Kot puj mẽ

pahtõ amnhĩ kaxyw Tĩrtũm kõt pajamaxpěr nhũm amnhĩ tã mẽ pahpumu nẽ mẽ pamex ã mẽ pajarẽ. No ãm mẽ pahte amnhĩ jakàr ã mẽ pahpumunh kõt ã mẽ pajarẽnh anhỹr kêt nẽ. Æm Apraãw pyrà nẽ amnhĩ kaxyw Tĩrtũm kõt pajamaxpěr pix ã mẽ pahpumunh kõt na hte mẽ pamex ã mẽ pajarẽ. Kormã Apraãw kot amnhĩ my kwryt kà krãhyr kêt ri ra kot amnhĩ kaxyw Tĩrtũm mã hamaxpěr jakamã kęp mẽ pahpê Ijaew mẽ pahte uràk nẽ amnhĩ kaxyw Tĩrtũm mã pajamaxpěr xwýnhjê hpàr krax maati. Ijaew kêt xwýnhjê pyrà nẽ kęp mẽ pahpàr krax maati.

*Tĩrtũm kot Apraãw mã mẽmoj mex jarẽnh
Karatas 3.22*

¹³ Amnepêm na pre Tĩrtũm Apraãw mã tanhmã kapěr to nẽ kãm:

—E koja nhỹrmã akanrẽhã akra nẽ atàmnhwỳjaja amýrpê apyrà nẽ krĩ piitã hkõt mẽ kęp mẽ õ pahi. Anẽ.

Tã tanhmã Apraãw kot amnhĩ nhĩpêx to hã omunh xà hkõt na pre ã kãm kapěr anẽ? Xà kot kãm tanhmã amnhĩ nhĩpêx to hã karõ nhũm kot hkõt amnhĩ nhĩpêx mex ã omunh xà hkõt na pre hkĩnh nẽ ã kãm kapěr anẽ? Nà kot anhỹr kêt. Mẽ pahtõ kot pu we Tĩrtũm kapěr xà hkõt pix mã amnhĩ nhĩpêx mex rãhã ho ri papa? Mẽ pahpê hihtỳx kênã. Æm kot amnhĩ kaxyw Tĩrtũm kõt hamaxpěr nhũm kot amnhĩ tã omunh nẽ amnhĩm mex ã harẽnh kõt pix mã na pre ã kãm kapěr anẽ.

¹⁴ Kop apu kot kãm tanhmã kapěr to nẽ kãm:

—E Apraãw. Kot kaj ixkapěr piitã ama nẽ hkõt amnhĩ nhĩpêx mex rãhã ho ri apa. Hã koja nhỹrmã

akanrêhã akra nê atàmnhwỳjaja kêp krĩ piitã hkôt mẽo pahшти.

Anhỹr o kãm kapêr ronhỹx ãm kãm ã kapêr anhỹr kaprỳ. Apraãw aa kot kapêr piitã hkôt amnhĩ nhĩpêx mex o pare hã. Kóp apu ã kãm kapêr anhỹr ronhỹx pre kuma nê tee ri amnhĩ kukamã hamaxpêr nê hamaxpêr o:

—Kwa nã. Ra ixte Tĩrtũm kôt amnhĩ xãm tã tanhmã kot pa amnhĩ to nê kapêr piitã hkôt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhỹr o ixpa hprãm kaprỳ. Jakamã koja nhỹrmã ixkanrêhã ixkra nê ixtàmnhwỳjaja kêp mẽ õ pahi hkêt nê pa. Hêxta waa nê. ¹⁵ Kojã Tĩrtũm ixte kapêr kwỳm ri tanhmã ixte amnhĩ tomnuj to hã ixpumu nê tanhmã ixtomnuj to. No mẽhõ kot we kapêr piitã hkôt amnhĩ nhĩpêx mex rãhã ho pa? Nã amrakati kumrêx.

Anhỹr o nhỹx pre hamaxpêr. ¹⁶ No na pre Tĩrtũm ã kãm kapêr anhỹr kêt nê. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkôt ajamaxpêr nê ixkôt amnhĩ xãm jakamã kot paj amarĩ ato mex nê. Anê.

Tĩrtũm na hte mẽmoj tã amnhĩ jarênh o amnhĩ to hêx kêt nê. Na hte mẽmoj tã amnhĩ jarênh xà hkôt tanhmã mẽmoj nhĩpêx to ho ri pa. Jakamã koja mẽ pahte Apraãw pyrã nê amnhĩ kaxyw hkôt pajamaxpêr xwỳnh piitã mẽ pahto mex nê.

Nê xà na pre ã mẽ pamã kapêr anê nê mẽ pamã:

—E kot kaj mẽ ixkapêr kôt pix mã ri amnhĩ nhĩpêx o ri apa hã kot paj mẽ ato mex rax nê.

Anhỹr o mẽ pamã kapêr? Nã na pre ã mẽ pamã kapêr anhỹr kêt nê. Na pre mẽ pamã:

—Kot kaj mẽ finat Apraãw pyrà nẽ amnhĩ kaxyw ixkôt ajamaxpěr nẽ ixkôt amnhĩ xunhwỳ hã kot paj mẽ ato mex nẽ.

Anhỹr o mẽ pamã kapěr. Tã Apraãw kumrẽx kot mẽ pakukamã amnhĩ kaxyw hkôt hamaxpěr jakamã te kệp mẽ pahpiitã mẽ pahte uràk nẽ ã amnhĩ nhĩpêx anhỹr xwỳnhjê pàr krax maati pyràk.

¹⁷ Amnepêm na pre Tĩrtũm tanhmã Apraãw mã kapěr to. Kot tanhmã kãm kapěr toja Tĩrtũm kapěr ã kagà htũm kamã na. Na pre kãm:

Kot kaj apê ahpỹnhã ri mẽ urojê hpàr krax. Anẽ. Kormã Apraãw kra hkêt tã nhũm hkra hkukamã ã kãm kapěr anẽ. Hãmri nhũm kuma nẽ hkôt hamaxpěr kurê kumrẽx nẽ hamaxpěr o:

—Hêxta waa nẽ. Ra ixprõ mẽ wa ijamẽ wa ixpigêt tỳx nẽ wa ixkra hkêt kumrẽx. Kot paj wa tanhmã amnhĩ to nẽ tokyx ty. Tã ra Tĩrtũm kot ixkra nẽ ixtãmnhwỳjê hkukamã ã inhmã mẽ harẽnh anhỹr kênã. Jakamã kot pa xep wa ixpigêt tỳx tã tanhmã amnhĩ to nẽ ixkra. Nà kot pa xep wa anẽ. Nẽ koja ixkrajã tanhmã amnhĩ to nẽ ixpê htyk japêr tã koja Tĩrtũm akupỹm inhmã ho htĩr. Nà koja inhmã ho anẽ. Ra kot inhmã ixkra nẽ ixkanrêhã ixtãmnhwỳ xohtô jarẽnh kênã. Anẽ.

¹⁸⁻¹⁹ Na pre ra hpigêt tỳx nẽ. Ra hã amgrà pê 100 nẽ hkurê kêt nẽ pa. Nhũm hprõ mããnẽn hpigêx tỳx nẽ. Nẽ õhy kamã hkra hkêt kumrẽx. Kormã wa hkra hkêt tã nhũm Tĩrtũm Apraãw mã hkra nẽ htãmnhwỳ xohtô hã harẽ. Nẽ kệp mẽ urojê xohtôjê pàr krax ã kãm harẽ. Hãmri nhũm kuma nẽ amnhĩ kaxyw hkôt hamaxpěr tỳx kurê kumrẽx. ²⁰ Nẽ ã amnhĩ nhĩpêx anhỹr rãhã ho pa. Na pre war amnhĩ

kra hã amnhĩ jarēnh ma nē tee ri amnhĩ kukamã hamaxpēr kêt nē. Ām Tĩrtũm tãm kot wa kãm wa hkra jarēnh pix mã hamaxpēr pē amnhĩ kaxyw kãm hamaxpēr tỳx o ri wa pa. Nē hamaxpēr o:

—Nà ra wa ixpigêt tỳx kumrēx tã koja xep Tĩrtũm wa inhmã wa ixkra hõ gõ. Nà koja wa inhmã kugõ. Hêxta waa nē. Ām hãmri Tĩrtũmja mex o mex.
²¹ Nà kot wa inhmã wa ixkra jarēnh xà hkôt koja wa inhmã kugõ. Ja kaxyw àhpumunh o àhpumunh. Tĩrtũmja hêx kêt. Anē.

²² Hãmri nhũm Tĩrtũm ã hamaxpēr anhỹr ã omu nē amnhĩm mex ã harē. Nē kot kãm amnhĩ jarēnh xà hkôt wa kãm wa hkraja gõ.

²³ Nom na pre amnhĩm Apraãwja pix mex ã harēnh kêt nē. ²⁴ Kot puj mẽ pahtõ uràk nē amnhĩ kaxyw hkôt pajamaxpēr nhũm amnhĩ tã mẽ pahpumu nē ra kot Apraãw jarēnhhta pyrà nē amnhĩm mẽ pamex ã mẽ pajarē. Na pre mẽ panhõ Pahihti Jejus ty nhũm Tĩrtũm akupỹm ho htĩr. Tã mẽ papajaja na pu prem amnhĩ kaxyw Jejus kôt pajamaxpēr nhũm Tĩrtũm ja hã mẽ pahpumunh kôt mẽ pahte amnhĩ to mex xwỳnh ã mẽ pajarē.
²⁵ Na pre mẽ pahwỳr Kra Jejus mẽ nhũm mẽ pahwỳr wrỳ. Tã nhũm mẽ axtem nē kupĩ nom nhũm amarĩ htyk kêt nē. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tĩrtũm mẽ pahwỳr kumē. Jakamã nhũm prem kupĩ nhũm akupỹm ho htĩr. Tã mẽmo kaxyw na pre Tĩrtũm ã mẽ pahwỳr Kraja mēnh nhũm mẽ panē htyk anē nhũm akupỹm ho htĩr? ãm kot kukwak ri amnhĩm mẽ pahte amnhĩ kaxyw hkôt pajamaxpēr

xwỳnhjaja mẽ pahte amnhĩ to mex xwỳnh ã mẽ pajarēnh pix kaxyw.

5

Tĩrtũm kot mẽ pahto hkwỳ hã harēnh

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

¹ Nẽ na pu prem amnhĩ tomnuj o ri papa nhũm Tĩrtũm ja hã mẽ pahpumu nhũm ja kęp omnuj nẽ. Jakamã nhũm Jejus amnhĩ grõnh kõt wrỳ nẽ mẽ panê ty. Nhũm Tĩrtũm htykja kukwak ri mẽ pahto hkwỳ. Mẽ pahte amnhĩ kaxyw hkõt pajamaxpěr nẽ hkõt amnhĩ xunhwỳr ã mẽ pahpumu hãmri nẽ ã mẽ panhĩpêx anẽ pu mẽ ra pahpê hkwỳ hã papa.

² Na pre Jejus Tĩrtũm mã mẽ pajarēnh o:

—E jajê pumu. Na mẽ ra amnhĩ kaxyw pamã hamaxpěr nẽ pahkõt amnhĩ xunhwỳ. Anẽ.

Hãmri nhũm kuma nẽ mẽ pahto mex nẽ mẽ pakutã nojarêt rãhã ho pa. Tã kot puj mẽ pahpê hkrajaja nhỹrmã pano ho Tĩrtũm mex o mex xwỳnhja pumu. Jakamã na pu htem amnhĩ kukamã ã pajamaxpěr anhỹr o pahkĩnh nẽ papa nẽ pajamaxpěr o:

—Hêxta waa nẽ. Kot paj nhỹrmã inhno ho Tĩrtũm mex o mex ã omu nẽ kuri ixpa ho ixpa. Nã ãm hãmri. Inhmã omunh prãm tỳx kumrêx. Anẽ.

³⁻⁴ Nẽ na htem Jejus ã mẽ pahtomnuj nẽ pu mẽ pahpunuj nẽ ri papa. Pamex kêt nẽ tã tee ri amnhĩ kukamã pajamaxpěr o ri pahkaprĩ nẽ papa hkêt nẽ. Kwār mẽ mãmri ã mẽ panhĩpêx anẽ. Pu mẽ pahpunuj kurê Jejus kõt amnhĩ xunhwỳr tỳx o kormã mō. Nẽ mẽ umaj hkaga hkêt nẽ. Arĩ amnhĩ wỳr kamã pajamak o papa. Jao amnhĩ kaxyw

kumã pix mã kãm pajamaxpër tỳx rãhã pahkĩnh nẽ ri papa.

Kot puj mẽ ã amnhĩ nhĩpêx anhỹr o ri papa nhũm Tĩrtũm ja hã mẽ pahpumũ nhũm ja kãm mex nẽ. Hãmri nhũm ja kaxyw tanhmã mẽ pahto paxihtỳx to pu mẽ pahpunuj tã hkôt pajamaxpër tỳx rãhã nẽ.

⁵ Nẽ ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpër kaprỳ hkêt nẽ. Ra kot mẽ pamã amnhĩ Karõ nhõr nhũm kot mẽ pahkarõ mã gjêx kênã kot pu kêt mẽ ri tee ri amnhĩ kaxyw kãm pajamaxpër kaprỳ. Na hte Karõja mẽ pahkarõ kamã mẽ pamã Tĩrtũm kapër jarẽnh o amnhĩrit nẽ kãm mẽ pajapê htỳx ã harẽnh o amnhĩrit rãhã nẽ.

⁶ Amnepê mã na pre mẽ piitã amnhĩ tomnuj o ri pa nẽ tee ri kãm amnhĩ to mex rãhã hprãm kaprỳ. Mẽhõ kot we ja kaxyw tanhmã mẽ hkrã hto? Jakamã nhũm Tĩrtũm ja hã mẽ omũ hãmri nẽ mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwỳr wrỳ. Ixte mẽ nẽ atyk kaxyw agrõnh kôt mẽ hwỳr amẽnũ jakamã kot kaj wrỳ nẽ mẽ kãm ixkapër jarẽnh o ri mẽ hkôt apa. Rãhã nhũm mẽ hkwỳjaja apĩ ka mẽ piitã mẽ nẽ ty. Anẽ.

Hãmri nhũm kuma nẽ kãm:

—Tõe. Nà kot paj amã hprãm xà hkôt ã amnhĩ nhĩpêx anẽ. Anẽ.

Hãmri nẽ man amnhĩ grõnh kôt mẽ pahwỳr wrỳ.
⁷⁻⁸ Xà koja mẽhõ kãm axpẽn japê xà axpẽn nẽ ty nà? Xà kot mẽhõ tãm kot amnhĩ nhĩpêx xwỳnh tã nhũm mẽ kot hpĩr kaxyw nhũm hkrãmnhwỳja kãm

hapê nê. Nê nê amnhĩ grônh kôt mẽ kãm xa nhũm mẽ kupĩ nhũm nê ty? Nà kot apu nê htyk japêr ko. No mẽ papajaja. Na pu htem mēhō hkràmnhwỳta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapê nê. Nê kãm mẽ pajapê xàj mẽ pahwỳr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapê hã ã mẽ pahwỳr mēnh anê. ⁹ Na pre ty nhũm hkamrô hkwỳ axkapĩ nhũm Tĩrtũm ja hã omunh xà hkôt tãm amnhĩm mẽ paxunhwỳ. Tã Jejus kukwak ri koja ma mẽ kot amnhĩ xà htyx kamã hamak tũm xàta wỳr mẽ parēnh kêt nê. Mẽ pahpê hkwỳ kēnã kot kêt hwỳr mẽ parê.

¹⁰ Nom kormã mẽ pahpê hkwỳ hkêt ri na pu prem te ra kutã amnhĩ xunhwỳr pyræk o amnhĩ nhĩpêx. Tã nhũm Kra mẽ panê ty pu mẽ hkôt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwỳ. Nê ra akupỹm Kra ho htĩr jakamã kot puj mẽ pahte hkôt amnhĩ xunhwỳr xwỳnhjaja nhỹrmã wa uræk nê wa kuri pahtĩr tũm nê pamex kumrêx nê papa ho papa.

¹¹ Nê mẽ pahpê kuwy rax wỳr mẽ papa mã xwỳnh kêt jakamã na pu htem pahkĩnh nê pajamakêtkati nê ri papa. Nom ja pix ã na pu htem ã amnhĩ nhĩpêx anhỹr kêt nê. Mẽ pahpê Tĩrtũm kràmnhwỳ jakamã na pu htem mããnēn pahkĩnh nê ri papa. Pahihti Jejus Kris kot mẽ panê htyk ã omunh xà hkôt na pre Tĩrtũm mẽ pahte hkôt amnhĩ xunhwỳr xwỳnhjê ho hkwỳ jakamã na pu htem pahkĩnh nê pajamakêtkati nê ri papa.

*Atãw mẽ Kris wa harēnh
Wam Korit 15.20-22, 45-49*

12-13 Nē amnepēm na pre Tirtũm finat Mojes mã tanhmã kapēr to. Hãmri nhũm kuma nē Ijaew kot tanhmã amnhĩ nhĩpêx to ho pa kaxyw mẽ kãm mẽmojta ã karõ nē mẽ kãm hã hkagà. Mẽ kot kamã harēnh nē mar nē Tirtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karõja ma nē tanhmã axpẽn mã kapēr to nē axpẽn mã:

—Kwa na pu htem ã amnhĩ nhĩpêx anhÿr kêt nē. Na pu htem ãm amnhĩ tomnuj tÿx kumrêx o ri papa nē amnhĩ to mex kêt kumrêx. Anē.

Ãm hãmri na prem ã amnhĩ jarēnh anē. Mẽ pahpiitã mẽ pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã mẽ pahte amnhĩ tomnuj to ho hkrax. Mÿrapê na pre htĩr tũm nē ri pa ho pa hkêt nē. Na pre ri pa nē gaa nē rĩ hpigêt tÿx nē ty. Tã mÿr pê ri mẽ papa xwÿnhjaja na pu htem uràk nē tanhmã amnhĩ tomnuj to ho ri papa. Mÿrapê na pu htem ri papa nē gaa nē Atãw pyrã nē pahtyk pa. Tirtũm kot mẽ pahtã Atãw mã kapēr xà hkôt. ¹⁴⁻¹⁹ Jakamã na prem kormã Mojes kator xwÿj ri pika piitã hkôt ri pa nē gaa nē haxwÿja htyk pa. Mẽ kot amnhĩ tomnuj mÿrapê ty. Atãw pyrã nē Tirtũm kot mẽmo xõ nē hkurê xwÿnhhta krēr kêt tã uràk nē tanhmã amnhĩ tomnuj to ho ri pa. Hãmri nē mÿrapê ty.

Na pre ã Atãwja mẽ pahpiitã mẽ pamã Tirtũm kapēr nhĩrõp ãm nē amnhĩ tomnuj o hkrax anē nē mẽmo xõta krē. Jao te mẽ pahpiitã mẽ pahte uràk nē kumẽ hkur pyræk o mẽ panhĩpêx. Mÿrapê nhũm htem arĩ pika piitã hkôt hapõj nē kormã hprĩre htã ra Atãw pyrã nē tanhmã amnhĩ tomnuj

to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkôt mẽ pakukamã hamaxpěr o:

—Nà koja mẽ Atãw pyrà nẽ amnhĩ tomnuj o ri pa. Mýrapê kot paj ma mẽ kot amnhĩ xà htýx kamã hamak tũm xàta wýr mẽ rẽn pa. Anẽ.

Tã Jejus Kris mẽ Atãw wa harẽnha kot axpẽn pyræk jakamã na hte Atãw kanrẽhã hkra nẽ htãmnhwýjaja Atãw kot amnhĩ nhĩpêx kôt amnhĩ nhĩpêx o ri pa rãhã nẽ. Uræk nẽ amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwýr xwýnhjaja Jejus kôt amnhĩ nhĩpêx rãhã ho ri pa. Te mẽ kęp hkanrẽhã hkra nẽ htãmnhwýjê pyrà nẽ uræk nẽ tãm amnhĩ nhĩpêx. Na htem ã ahpýnhã amnhĩ nhĩpêx anhýr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwýr xwýnhjaja na hte Tĩrtũm ja hã mẽ pahpumunh kôt mẽ pahto hkra. Kot puj mẽ nhýrmã pahtyk tã nhũm akupým mẽ pahto mẽ pahtír pu mẽ wa kuri pahtír tũm nẽ papa ho papa.

Atãw kot Tĩrtũm kapěr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Nom nhũm Jejus Atãw rom kot Tĩrtũm kapěr mar nẽ hkôt amnhĩ nhĩpêx rãhã jakamã na hte Tĩrtũm mẽ pahte hkôt amnhĩ xunhwýr xwýnhjaja amnhĩm mẽ pahte amnhĩ to mex xwýnh ã mẽ pajarê.

Nhũm Atãw kot Jejus kĩnhã Tĩrtũm kapěr nhĩrôp ãm mýrapê na hte mýr pẽ mẽ pa xwýnhjaja ohtô nẽ pa nẽ gaa nẽ Atãw pyrà nẽ htyk pa. Hãmri nẽ kormã htír ri amnhĩ to mex o pa hkêt mýrapê ma mẽ kot amnhĩ xà htýx kamã hamak tũm xàta wýr ma

hapêx. Tã nhũm Tĩrtũmja mex o mex jakamã na hte Jejus Kris mẽ wa mẽ pakamã ukapĩ nẽ. Jakamã na pre mẽ pahwỳr Jejus mẽ nhũm mẽ pahwỳr wrỳ hãmri nẽ htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỳr kukwak ri mẽ pahte hkôt amnhĩ xunhwỳr xwỳnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwỳnh ã mẽ pajarẽ. Tã nhũm Jejus mẽ pakamã ukapĩ nẽ mẽ panê ty nhũm Tĩrtũm ja hã omunh xà hkôt ra mẽ pahte amnhĩ kaxyw hkôt pajamaxpêr xwỳnhjaja te mẽ pahte aa tanhmã amnhĩ tomnuj to hkêt pyrak o mẽ panhĩpêx. Na hte amarĩ ã mẽ panhĩpêx anẽ.

Nẽ Atãw kot amnhĩ tomnuj mỳrapê na htem piitã ri pa nẽ tanhmã amnhĩ to nẽ ty rỳ ri pa nẽ gaa nẽ wejre nẽ ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwỳr xwỳnhjê kutã nojarêt rãhã nẽ mẽ pakukamã hamaxpêr o:

—Nà mẽ kot Ixkra hkôt amnhĩ xunhwỳr xwỳnhjaja na pa mẽ omunh pa. Tã kot paj Ixkrata kukwak ri tãm mẽ unhwỳ nhũm mẽ nhỹrmã wa ixri mex nẽ htĩr tũm nẽ pa ho pa. Anẽ.

²⁰⁻²¹ Nẽ na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nẽ mẽ kot kapêr mar nẽ hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nẽ amnhĩ xô ri mẽ kãm hã kagà nẽ mẽ kãm harênh o ri mẽ hkôt pa. No nhũm prem kapêr ma nẽ ãm kuma

ně hkwỹm pix mã ri tanhmã amnhĩ tomnuj to ho pa. Ně pika piitã hkôt ja arĩ rãhãã. Ja mỹrapê koja mẽ nhỹrmã ty ně ma mẽ kot amnhĩ xà htỳx kamã hamak tũm xàta wỳr ma pa. Nom Tĩrtũm arĩ kãm pika piitã hkôt mẽ papa xwỳnhjê japê ně. Mẽ pahte amnhĩ tomnuj o papa tã nhũm kãm mẽ pahto mex prãm ně. Jakamã na pre mẽ pahwỳr Kra Jejus Kris mẽ nhũm mẽ pahwỳr wrỳ. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamxpêr xwỳnhjaja nhỹrmã Tĩrtũm mẽ wa kuri pahtĩr tũm ně pa mex ně papa ho papa.

6

Mẽ kot mẽ pahkrã kumrãr ã mẽ harẽnh

Sikũn Korĩ 5.17; Karatas 2.19-20, 5.24, 6.14; Epes 4.17-24; Korosê 3.1-11; Wam Pêtre 4.1-6

¹ Ně mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê ně. Ně arĩ mẽ pakutã nojarêt rãhã ně. Jakamã xà kot kaj mẽ atũ ã harẽnh anhỹrja ma ně atỳx ri ã ajamxpêr anẽ ně ajamxpêr o:

—Nà Tĩrtũm kãm ijapê ně kot ixkutã nojarêt rãhã ho ri pa jakamã mo kaxyw kot pa Jejus kôt amnhĩ nhĩpêx o ri ixpa? Nà kot paj ho anhỹr kêt ně. Anẽ.

Ka ã mẽ atũ atỳx ri ajamxpêr anhỹr japêr. Kwa xà ajamxpêrja mex? Nà mex kêt. ² ã ajamxpêr anhỹrja mẽ hamxpêr mex xà hkôt kêt. Ra mẽ pahte Jejus kôt amnhĩ xunhwỳr ně mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyræk. Jakamã kot puj mẽ arĩ tanhmã amnhĩ tomnuj to

ho ri papa hkêt nê. ³ Měmo kaxyw na htem Tĩrtũm mã mẽ pahkrã kumrã? Nà mẽ pahte ra Jejus kôt amnhĩ xunhwỳr ã amnhĩ to amnhĩrĩt kaxyw. Te Jejus htyk nhũm mẽ pahte amnhĩ tomnujja haxwỳja hkôt htyk nê hapêx par pyràk o amnhĩrĩt kaxyw. Jakamã na pu htem pajamaxpêr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

⁴ Na htem Tĩrtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũmja te mẽ kot Jejus kôt haxwỳja haxàr pyràk. Hãmri nhũm mẽ akupỹm mẽ pahto api. Te Tĩrtũm hihtỳx o hihtỳx o kot akupỹm Kra Jejus ho htĩr pyràk. Te mẽ pahtyk tã nhũm akupỹm kot mẽ pahto mẽ pahtĩr pyràk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw. ⁵ Nhũm mẽ pahte amnhĩ nhĩpêx tũmja te Jejus kôt htyk nê hapêx par pyràk. Nê mẽ pahte amnhĩ nhĩpêx nywja te Jejus akupỹm htĩr pyràk o amnhĩ nhĩpêx.

⁶ Amnepêm na pu pre htem amnhĩ tomnuj rãhã ho ri papa. Te mẽ kãm mẽ àpênh xwỳnhjaja kot mẽ õ patrãw mã àpênh rãhãta pyràk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamaxpêr punujja te pĩ kahpa hã Jejus kôt harir nê htyk nê hapêx par pyràk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamaxpêr nyw pix o pajamaxpêr papa kaxyw. ⁷ Na hte mẽ htyk xwỳnhjaja axte tanhmã amnhĩ tomnuj to hkêt nê. Tã kêr pu mẽ uràk nê axte ã amnhĩ nhĩpêx anhỳr kêt nê. ⁸ Na pu prem Jejus kot

mě panê htyk ã harēnh ma nē pajamaxpēr o:

—Nà ra Jejus kot mẽ panê htyk jakamã kot paj ixte amnhĩ nhĩpêx tũm kaga hpa nē hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nē axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhĩpêx nyw pix o amnhĩ nhĩpêx o ri ixpa. Aně.

⁹ Nē Jejus htyk nhũm Tĩrtũm akupỹm ho htĩr jakamã koja axte htyk kêt nē. Ra mẽ pahte ja mar mex. ¹⁰ Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupỹm htĩr o htĩr nē kaxkwa kamã Tĩrtũm mã tanhmã amnhĩ nhĩpêx to ho ri pa. ¹¹ Tã mẽ papajaja kot puj mẽ ã kot amnhĩ nhĩpêx anhỹrja ma nē ã pajamaxpēr aně nē pajamaxpēr o:

—Nà ãm hãmri. Te ixte Jejus pyrã nē ra ixtyk pyræk jakamã kot paj axte amnhĩ tomnuj o ri ixpa hkêt nē. Te ixte Jejus pyrã nē akupỹm ixtĩr nē ãm Tĩrtũm kôt pix mã amnhĩ nhĩpêx o ri ixpata pyræk o kot paj hpãnhã amnhĩ nhĩpêx o ri ixpa. Aně.

¹² Jakamã kot ka mẽ atõ nhỹrmã tanhmã amnhĩ kukamã ajamaxpēr punuj to japêr hãmri nē ajamaxpēr o:

—Nà inhmã ã amnhĩ tomnuj anhỹr prãm nē. Omnuj tã kot paj ho aně. Nà ixte ho anhỹr mã kēnã.

Anhỹr o ajamaxpēr japêr tã kwa mẽ ã ajamaxpēr anhỹr kêt nē.

¹³ Kêt Tĩrtũm mã mãn amnhĩ gõ nē hkôt amnhĩ nhĩpêx o ri apa. Hãmri nē amnhĩ krã kamã mẽmoj mex pix mã ajamaxpēr nē tãm akapêr. Nē mẽ kot amnhĩ to mex xwỹnhjê kôt pix mã mãn ri apa. Na ka pre htem akapêr punuj nē. Nē ajamaxpēr punuj nē.

Ně mẽ kot amnhĩ tomnuj o mẽ pa xwỳnhjê hkôt ri apa.

Ně kagôxỳhti japrô nẽ ho akôm o ri mẽ hkôt apa. Tã ra hpãnhã Tĩrtũm mã amnhĩ gô nẽ axte ã amnhĩ nhĩpêx anhỹr kêt nẽ.

¹⁴ Amnepêem na pu prem tanhmã mẽ pahte amnhĩ nhĩpêx to ho papa hkukamã pajamaxpêr nẽ pajamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nẽ amnhĩ to mex o ri ixpa nhũm Tĩrtũm ja hã ixpumu nẽ amnhĩm inhmex ã ijarẽ. Nà kot paj anẽ.

Anhỹr tã no ãm tee ri mẽ pamã hkôt amnhĩ nhĩpêx o ri papa hprãm kaprỳ nẽ arĩ ri kapêr kwỳm tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tĩrtũm kot ixkutã nojarêr rãhã ho pa xwỳnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anẽ.

Anhỹr jakamã ra amnhĩ kaxyw kãm pajamaxpêr tỳx o mẽmoj punuj kutã amnhĩ to htỳx nẽ.

Mẽ pahte Tĩrtũm mã tanhmã amnhĩ nhĩpêx to hã mẽ pajarênh

Juãw 8.34

¹⁵ Tã ã kot anhỹr jakamã tanhmã kot puj wem pajamaxpêr to? Xà kot pu mẽ ã pajamaxpêr anẽ nẽ pajamaxpêr o:

—Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nẽ. ãm kêp ixkutã nojarêr rãhã nẽ amarĩ

amnhĩm inhmex ã ijarẽnh xwỳnh jakamã kot paj arĩ amnhĩ tomnuj rãhã nẽ aa ja kaga hkêt nẽ.

Anhỹr o kot puj mẽ pajamexpêr? Nà kot puj mẽ ã pajamexpêr anhỹr kêt nẽ. ã mẽ pajamexpêr anhỹrja mex kêt. ¹⁶ Kojã mẽhõ nhỹri kot amnhĩ tomnuj tỳx xwỳnhjê hõ pumu nẽ kãm amnhĩ jarẽnh japêr nẽ kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixpa. Jakamã e inhmã mẽmoj tâ karõ pa ama nẽ amã tanhmã ho ho ri ixpa.

Anhỹr o kãm kapêr japêr. Hãmri nẽ ã amnhĩ nhĩpêx anhỹr tâ amnhĩ tomnuj pix o ri pa. Tã ã mẽ kot amnhĩ nhĩpêx anhỹr o mẽ pa xwỳnhjaja kojã nhỹrmã ty hãmri mẽ kot amnhĩ xà htỳx kamã hamak tũm xàta wỳr ma hapêx.

No kojã mẽhõ Tĩrtũm mã amnhĩ jarẽnh nẽ kãm:

—Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixpa.

Anhỹr o kãm amnhĩ jarẽ nẽ hkôt amnhĩ nhĩpêx mex o pa. Nẽ tãm amnhĩ nhĩpêx o ri pa. Hãmri nẽ nhỹrmã ty nẽ ma õ krĩ hwỳr api nẽ Jejus mẽ Tĩrtũm wa kuri htĩr tũm nẽ mex rãhã nẽ pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhũrer prãm tâ nhũm te tãm kot amnhĩ tâ mẽ ato htỳx pyrãk o mẽ anhĩpêx ka mẽ tee ri kãm anhũrer prãm kaprỳ. Tã nhũm Tĩrtũm tanhmã mẽ akrã hto ka mẽ kapêr ma nẽ amnhĩ kaxyw hkôt ajamexpêr tỳx nẽ ãm hkôt pix mã amnhĩ nhĩpêx. Pa ja hã mẽ ajarẽnh ma nẽ mẽ anhỹ hã ixkĩnh nẽ. Nẽ Tĩrtũm mã ixte mẽ ajarẽnh mar nẽ mẽ anhỹ hã ixkĩnh ã amnhĩ jarẽ. ¹⁸ Na pre

Tĩrtũm tanhmã mẽ akrã hto ka mẽ amnhĩ tomnuj mã anhũrer pa nẽ hpãnhã hkõt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyræk o kot paj mẽ amã awjarẽ. Nà amnepêm na ka prem ajamaxpêr punuj kõt amnhĩ tomnuj o ri apa. Nẽ gaa nẽ ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhỹr kêt nẽ. Pãnhã tãm ri ajamaxpêr o ri apa. Jao gaa nẽ ra Tĩrtũm kãm hprãm xà hkõt tãm amnhĩ nhĩpêx mex nẽ. ²⁰ Na ka prem tee ri amã amnhĩ tomnuj mã anhũrer prãm kaprỹ. Te tãm kot amnhĩ tã mẽ ato htỹx nẽ amnhĩ kõt mẽ ato pa pyræk o mẽ anhĩpêx. ²¹ Xàn ka prem ã amnhĩ tomnuj anhỹr o apa nẽ akĩnh nẽ ajamakêtkati nẽ ri apa? Nà na ka prem akĩnh nẽ apa hkêt nẽ. Tã na ka prem Jejus kõt amnhĩ xunhwỹ nẽ tee ri ate tanhmã amnhĩ tomnuj to hã amnhĩ pumu nẽ akaprĩ nẽ apijaàm nẽ. ã mẽ kot amnhĩ tomnuj anhỹr o pa xwỹnhjaja na htem ja mýrapê ty nẽ ma mẽ kot amnhĩ xà htỹx kamã hamak tũm xàta wýr pa. ²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htỹx nẽ amnhĩ kõt mẽ ato pa pyræk ka mẽ ra ãm hkõt pix mã amnhĩ nhĩpêx mex o ri apa. Nẽ hpãnhã amã kapêr kõt pix mã amnhĩ nhĩpêx mex prãm. Nẽ hkõt pix mã amnhĩ nhĩpêx hprãm. Jakamã kot kaj mẽ nhỹrmã kuri amex kumrêx nẽ atĩr tũm nẽ ri apa ho apa.

²³ Na hte mẽ kãm àpênh o ri mẽ pa xwỹnhjaja mẽ kãm mẽmoj tã apê nẽ àpênh pa nẽ hpãnhã amnhĩrer

xà jamỳ. Ja pyrà nẽ koja mẽ kot amnhĩ tomnuj xwỳnhjaja nhỹrmã ty hãmri nẽ ma mẽ kot amnhĩ xà htỳx kamã hamak tũm xàta wỳr ma pa.

No mẽ pahte amnhĩ kaxyw Jejus Kris kôt pajamxpěr xwỳnhjaja na hte Tĩrtũm ja hã mẽ pahpumu nẽ mẽ pajarẽn h o:

—Nà ãm hãmri. Jajaja koja nhỹrmã Ixkra mẽ wa Ixkuri mex kumrẽx nẽ htĩr tũm nẽ pa ho pa. Hêxta waa nẽ. Nà ãm hãmri koja mẽ anẽ. Anẽ.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarẽn anẽ? Nà ãm mẽ pahte Kra Jejus Kris kôt amnhĩ xunhwỳr ã mẽ pahpumunh kôt pix mã na hte ã mẽ pajarẽn anẽ.

7

Mẽ pahte amnhĩ tomnuj kot axte amnhĩ tã mẽ pahto htỳx kêt ã harẽn

Rômãn 8.2, 10.4; Karatas 4.1; Epes 2.2; Korosẽ

3.7

¹ E Jejus kôt ixkwỳjaja. Nà Tĩrtũm kot mẽ pakaxyw tanhmã Mojes mã kapěr tota na ka mẽ ra mar tỳx nẽ. Na pu htem kormã pahtĩr ri hkôt amnhĩ nhĩpêx o ri papa. Tã ty hãmri nẽ axte hkôt amnhĩ nhĩpêx kêt nẽ. Ra mẽ ate ja mar tỳx. E pa mẽ amã ja hã ejêp jarê ka mẽ inhma. ² Nà finat Mojes kot Tĩrtũm nhỹ hã mẽnijaja kot tanhmã amnhĩ nhĩpêx to ho pa hã mẽ kãm karõja. Koja mẽhõ ho mjên hãmri nẽ ãm kôt pix mã ri pa ho pa nẽ aa hkaga hkêt nẽ. No koja nhỹrmã mjên kêp ty nhũm ahte ri pa. Hãmri nẽ kãm axte mẽhõ ho mjên prãm nẽ mãmri axte mẽhõ ho mjên. Ja tanhmã kute hkêt. ³ Nom koja wam mjên arĩ htĩr japêr nhũm hprõ tanhmã hamaxpěr to nẽ hkaga nẽ hpãnhã

nhâm mēhō ho mjên. Hã koja Tĩrtũm pê ja homnuj nē. Nom koja mjên ra kēp ty nhũm mỳrpê axte kãm mēhō ho mjên prãm nē mãmri ho mjên. Ja na Tĩrtũm pê homnuj kêt. Ra wam mjênja htyk kênã. ã Tĩrtũm kot Mojēs mã mē pakaxyw mēmoj tã karō kot anhỹr.

⁴ Tã ja pyrã nē na pu prem amnepēm pajamaxpēr o:

—Ixte Tĩrtũm kapēr kôt pix mã amnhĩ nhĩpêx o ri ixpa jakamã nhũm Tĩrtũm ja hã ixpumu nē amnhĩm inhmex ã ijarē. Anē.

Tã pu mē ra tanhmã pajamaxpēr to nē hpãnhã pajamaxpēr õ ho pajamaxpēr o:

—Nã na xep hte Tĩrtũm mē ixte kapēr kôt amnhĩ nhĩpêx ã mē ixpumunh kôt amnhĩm mē inhmex xwỹnh ã mē ijarēnh kêt nē. Mē ixte hkôt amnhĩ nhĩpêx mex o ri ixpare hã. Kêt ãm Kris kot mē inhnê htyk nhũm mē ixte amnhĩ kaxyw hkôt ijaxmaxpēr nē hkôt amnhĩ xunhwỹr pix ã mē ixpumunh kôt na hte mē inhmex ã mē ijarē. ãm ja pix ã mē ixpumunh kôt na hte mē ixto hkra nē mē ixkutã nojarêt o pa. Kra Jejus pix kukwak ri na hte ã mē inhiĩpêx anhỹr o pa. Anē.

ã mē pajamaxpēr nyw kot anhỹr. Jakamã te mē pahte mēhō kot mjên nyw xwỹnh gryk ã axte mjên htyk xwỹnh mã hamaxpēr kēeta pyrãk o na pu htem amnhĩ nhĩpêx o papa. Jao Kris kapēr kôt pix mã amnhĩ nhĩpêx o ri papa. Nē Tĩrtũm noo mã tãm ri amnhĩ nhĩpêx. Nē axte mē pahte amnhĩ tomnuj kukamã tanhmã pajamaxpēr to hkêt nē.

⁵ Nē amnepê mã mē pahte amnhĩ krã hkôt tanhmã mē pahte amnhĩ nhĩpêx to ho ri papata ã

na pu prem amnhĩ tomnuj pix o ri papa. Ra mẽ pahte Tĩrtũm kapẽr mar tỳx tã kuma nẽ ãm kuma nẽ ri papa nẽ ri hkõt amnhĩ nhĩpêx kêt nẽ. Mỳrapê nhũm Tĩrtũm tee ri ja hã mẽ pahpumu nẽ mẽ pahtyk nẽ ma mẽ kot amnhĩ xà htỳx kamã hamak tũm xà hwỳr papa mã xwỳnhjê hã mẽ pajarẽ.

⁶ Nẽ amnepêm na pu pre htem ã pajamaxpẽr anhỹr o:

—Nà kot paj Tĩrtũm kapẽr kõt pix mã amnhĩ nhĩpêx o ri ixpa nhũm amnhĩ tã ixpumu nẽ ixte amnhĩ tomnuj kêt xwỳnh ã ijarẽ.

Anhỹr o pajamaxpẽr no ãm tee ri ã pajamaxpẽr anhỹr kaprỳ. Nẽ arĩ tanhmã amnhĩ tomnuj to ho ri papa. Tã hpãnhã te Jejus Kris kõt pahtyk pyrak o amnhĩ nhĩpêx nẽ hpãnhã Karõ nhỹ hã tãm amnhĩ nhĩpêx. Jao ra tee ri mẽ pamã Tĩrtũm kapẽr kõt amnhĩ nhĩpêx prãm kaprỳ hkêt nẽ. Ra Tĩrtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapẽr ã kagà htũm kot tanhmã mẽ pajarẽnh to

Rômãn 3.20, 5.20; Karatas 3.23-24

⁷ Tã Tĩrtũm mẽ pahte kapẽr kõt ri amnhĩ nhĩpêx ã mẽ pahpumunh kõt amnhĩm mẽ pamex ã mẽ pajarẽnh kêt jakamã mẽmo kaxyw na kapẽr ã kagà htũmja? Nà mẽ pahte mar nẽ pahprĩ hã Tĩrtũm noo mã mẽ kot amnhĩ tomnuj xà jarẽnh mar nẽ omunh mex kaxyw na. Na hte mẽ pahkwỳjê kukrêx kĩnh o pamã ho panhõ hprãm nẽ mẽ pamã karõ. ã kot mẽmoj punuj piitã nẽ mẽ pamã karõ kot anhỹr. Tã mẽ pahte ja mar kêt ronhỹx pu mẽ Tĩrtũm kêp ja homnuj ã harẽnh mar kêt nẽ.

⁸ Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kînh o ho pamã panhõ hprãmja mãânên kêp ja homnuj ã harênh mar tâ nom aa hkaga hkêt nê arĩ pamã axpên kukrêx kînh o pamã ho panhõ hprãm tỳx rãhã ho ri papa. Kop ãm Tĩrtũm kapêr kêt ronhỹx pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyræk. ⁹ Amnepê mã ixte Tĩrtũm kapêr mar kêt ri na pa pre ixtỳx ri amnhĩ kukamã ijamaxpêr o ri ixpa nê ijamaxpêr o:

—E kot paj nhỹrmã Tĩrtũm ri ixtĩr tũm nê inhmex nê ixpa ho ixpa.

Anhỹr tã hpãnhã pamã axpên kukrêx kînh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nà ã ixte amnhĩ nhĩpêx anhỹr o ixpa jakamã kot paj nhỹrmã ty nhũm Tĩrtũm akupỹm ixto ixtĩr pa kuri ixtĩr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwỳnh na pa. Kot paj nhỹrmã ty nhũm Tĩrtũm ma mẽ kot amnhĩ xà htỳx kamã hamak tũm xàta wỳr amnhĩ nê inhmê. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa. ¹⁰ Tã hpãnhã axtem ijamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhỹrmã ixtỳk tã hwỳr api nê kuri ixtĩr tũm nê inhmex nê ixpa ho ixpa. Nà kot paj anê.

Anhỹr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprỳ. Na pa pre xatã

kapēr nhīrōp ixkuhê nē tee ri ja hã amnhĩ pumu nē ijamaxpēr o:

—Kwa tanhmã kot pa amnhĩ nhĩpêx to nē ãm Tĩrtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhỹr prãm tỳx kaprỳ. ãm ixte amnhĩ tomnuj pix o ri ixpa xwỳnh jakamã ãm hãmri koja amnhĩ nê kuwyta wỳr inhmẽ. Nà koja ixto anẽ. Hêxta waa nẽ. Tanhmã kot paj we ja nê kãm ixkapēr to? Anẽ.

¹¹ No mēhõ koja Tĩrtũm kapēr kôt amnhĩ nhĩpêx mex o ri pa? Na pu htem pahpiitã tee ri pamã ho anhỹr prãm kaprỳ. Mẽ pahpê hihtỳx kumrêx jakamã na pa pre ixtỳx ixte Tĩrtũm kuri ixtĩr tũm nē ri ixpa hã amnhĩ kukamã amnhĩ jarēnh kaprỳ. ãm xatã kapēr nhīrōp ixkuhê nē amnhĩ tomnuj pix o ri ixpaja mỳrapê koja mẽ kot amnhĩ xà htỳx kamã hamak tũm xãta wỳr amnhĩ nē inhmẽ. ¹² Kot anhỹr tã tanhmã kot puj mẽ Tĩrtũm kapēr ã kagà htũmta jarēnh to? Nà kot mẽ pamã mẽ pahte amnhĩ nhĩpêx ã karõta mex kumrêx. Mex o mex. ¹³ Mex kumrêx tã na htem kuma nē tee ri kãm hkôt amnhĩ nhĩpêx hprãm kaprỳ. Jao nhỹrmã ty nē ma kuwy hwỳr pa. Kêt pa na pa pre ra mar nē omunh mex tã hkôt amnhĩ nhĩpêx mex kêt nẽ. Jao ra ixte amnhĩ tomnuj xwỳnh ã amnhĩ pumu. Na pa pre tee ri inhmã hkôt amnhĩ nhĩpêx o ri ixpa hprãm tã no ãm xatã kapēr nhīrōp ixkuhê nē hkwỳm ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nē amnhĩ kukamã ijamaxpēr o:

—Nà na pa hte ãm tee ri inhmã Tĩrtũm kôt amnhĩ nhĩpêx prãm kaprỳ no ãm ho anhỹr kêt nẽ. ãm ixte amnhĩ tomnuj pix o ixpa xwỳnh na pa. Ja mỳrapê

koja Tĩrtũm amnhĩ nê ma kuwy hwỳr inhmẽ. Nà
koja ixto anẽ. Anẽ.

*Mẽ pahte mẽ pamã amnhĩ tomnuj kaga hprãm
kaprỳ hã mẽ pajarẽnh*

Karatas 5.17

¹⁴ Nẽ Tĩrtũm kapêr ã kagà htũmta Tĩrtũm kapêr
na. Nẽ Tĩrtũm kĩnhã ãm inhĩ pix na pa ri ixpa
jakamã tanhmã kot pa amnhĩ to nẽ kapêr kôt ri
amnhĩ nhĩpêx mex o ri ixpa? ¹⁵ Inhmã tãm ixte
amnhĩ nhĩpêx prãm tã no ãm amnhĩ tomnuj pix o ri
ixpa. Mẽmoj ixpê omnuj tã pa hte ra hkôt tanhmã
amnhĩ tomnuj to ho ri ixpa. Hãmri nẽ ja hã amnhĩ
pumu nẽ tee ri amnhĩ kukamã ijamaxpêr o:

—Hêxta waa nẽ. Mon pa hte axtem nẽ ã amnhĩ
nhĩpêx anhỳr o ri ixpa? Mẽmoj ixpê omnuj nhũm
inhmã ho anhỳr prãm kêt tã ra ho anẽ. Nhũm
mẽmoj mex nhũm inhmã ho anhỳr prãm tã ho
anhỳr kêt nẽ. Mon pa hte axtem nẽ ã amnhĩ nhĩpêx
anhỳr o ri ixpa? Anẽ.

¹⁶ ã ixte amnhĩ nhĩpêx anhỳr o ri ixpa htã ra
Tĩrtũm kapêr mexta ma hãmri nẽ ra ijamaxpêr o:

—Nà Tĩrtũm kapêrja mex kumrêx tã pa tee ri
inhmã hkôt amnhĩ nhĩpêx mex hprãm kaprỳ ho ri
ixpa. Hêxta waa nẽ. Anẽ.

¹⁷ Inhmã amnhĩ tomnuj prãm kêt tã arĩ
ixkaxwỳnh kãm ijamaxpêr punuj nhỹ hã ã amnhĩ
nhĩpêx anhỳr o ri ixpa. ¹⁸ Nẽ inhmã tãm amnhĩ
nhĩpêx prãm tã no ãm tee ri ã inhmã amnhĩ nhĩpêx
anhỳr prãm kaprỳ. Tanhmã kot pa amnhĩ to nẽ tãm
amnhĩ nhĩpêx o ri ixpa? Na pa tee ri inhmã ja ho
anhỳr prãm kaprỳ. Ixte amnhĩ tomnuj xwỳnh na
pa. Nẽ aa ixte amnhĩ to mex kêt kumrêx xwỳnh.

19 Inhmã mëmoj mex kôt pix mã amnhĩ nhĩpêx prãm tã no ãm ã amnhĩ nhĩpêx anhÿr kêt nê. Nê ãm hkwÿm ri tanhmã amnhĩ tomnuj to ho ri ixpa. Mëmoj ixpê omnuj tã pa hkôt amnhĩ nhĩpêx o ri ixpa. 20 Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mëmoj ixpê omnuj pa inhmã ho anhÿr prãm kêt tã ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa. 21 Nê mëmoj mex nhũm inhmã hkôt amnhĩ nhĩpêx prãm tã ra hkwÿm ri amnhĩ nhĩpêx. ã ixte amnhĩ nhĩpêx anhÿr xwÿnh na pa. 22 Nê inhmã Tĩrtũm kapêr mar nê hkôt ri amnhĩ nhĩpêx prãm tã 23 nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhÿr tã no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ. 24 Hêxta waa nê. Na pa ixkaprĩ htÿx nê ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mẽ kot amnhĩ xà htÿx kamã hamak tũm xãta wÿr ma mō. Mēhō kot tanhmã ixkrã hto pa ã amnhĩ nhĩpêx anhÿrja kaga? 25 Nà mẽ panhō Pahiti Jejus Krisja pix. Tãm koja ixte amnhĩ tomnuj kutã tanhmã ixto ixihtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tĩrtũm mã kãm:

—Pa Tĩrtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihýt̃x to pa rĩ kormã Tĩrtũm kapër kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. Æ ixte anhÿr xwÿnh na pa.

8

Tĩrtũm Karõ kot mẽ pahto tãm mẽ pahte amnhĩ nhĩpêx xwÿnh ã harênh

Karatas 5.16-26

¹ Nẽ Jejus Kris kêp mẽmoj punuj kutã mẽ pahto mẽ paxihýt̃x xwÿnh jakamã mẽ pahte hkôt amnhĩ xunhwÿr xwÿnhjaja na pu htem ÿ hã amnhĩ tomnuj o ri papa hkêt nẽ. Jao mẽ pahte kuwy hwÿr papa mã xwÿnh kêt. ² Te ra mẽ pahtyk nhũm Tĩrtũm kot akupÿm mẽ pahto mẽ pahĩr pyrãk jakamã nhũm Karõja mẽ pahkarõ mã agjê pu mẽ ÿ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihýt̃x. Kêp mẽ pajamaxpêr punuj kutã mẽ pahto mẽ paxihýt̃x xwÿnh jakamã kot puj mẽ nhÿrmã mẽ kot amnhĩ xà ht̃x kamã hamak tũm xàta wÿr papa hkêt nẽ.

³ Nom kormã mẽ pahte Jejus kôt amnhĩ xunhwÿr kêt ri na pu prem tee ri pamã Tĩrtũm kapër piitã hkôt amnhĩ nhĩpêx prãm kaprÿ nhũm mẽ pahpê hiht̃x kumrêx. Jakamã tanhmã koja Tĩrtũm amnhĩ to nẽ amnhĩ mã mẽ pamex xwÿnh ã mẽ pajarê? Na pre tee ri amnhĩ tã mẽ pajamã hãmri nẽ mẽ pahwÿr Kraja mẽ nhũm man mẽ pahwÿr wrÿ nẽ mẽ pahpyrà nẽ ï ho mẽ pakamã kato. Nom mẽ parom aa tanhmã amnhĩ tomnuj

to hkêt kumrêx nê ri pa. Tã mẽ kot hpĩr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamaxpêr punuj kutã mẽ pahto paxihtỳx xwỳnh. Na pu htem hkôt amnhĩ xunhwỳ hãmri nê kukwak ri amnhĩ tomnuj o ri papa hkêt nê. ⁴Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nê axte mẽ pahte amnhĩ nhĩpêx tũm kôt amnhĩ nhĩpêx kêt nê. Hãmri hpãnhã Tĩrtũm Karõ kot amnhĩ nhĩpêx kôt pix mã amnhĩ nhĩpêx. Nê hamaxpêr kôt pix mã pajamaxpêr. Ja kaxyw na pre Tĩrtũm mẽ pahwỳr Kraja mẽ nhũm wrỳ nê mẽ pahpiitã mẽ panê ty.

⁵ Nê mẽ kot amnhĩ krã hkôt tanhmã amnhĩ nhĩpêx to ho ri mẽ pa xwỳnhjaja na htem htỳx ri tanhmã hamaxpêr to xà hkôt amnhĩ nhĩpêx o ri pa. No kêt Tĩrtũm Karõ kot mẽ pahkarõ mã gjêx xwỳnhjaja na pu htem mẽ kurom te Jejus jamaxpêr pyràk o pajamaxpêr o papa.

⁶ Nê mẽ kot amnhĩ krã hkôt amnhĩ nhĩpêx xwỳnhjaja koja mẽ nhỹrmã ty nê ma kuwy hwỳr pa nê kamã pa ho pa. No mẽ pahte Tĩrtũm Karõ hkôt amnhĩ nhĩpêx xwỳnhjaja kot puj mẽ pajamaxpêr nyw o pajamaxpêr nê amnhĩ nhĩpêx nyw o amnhĩ nhĩpêx. Jao paxàmnhĩx ri pajamakêtkati nê ri papa. Nê nhỹrmã ty hãmri nê Tĩrtũm mẽ Jejus wa kuri akupỳm pahtĩr tũm nê pamex kumrêx nê papa ho papa.

⁷ Nê mẽ kot amnhĩ krã hkôt ri amnhĩ nhĩpêx xwỳnhjaja kãm Tĩrtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkôt amnhĩ nhĩpêx? ⁸ Koja mēhõ amnhĩ krã hkôt kãm hprãm xà hkôt pix mã amnhĩ nhĩpêx hãmri nhũm

Tĩrtũm tee ri ja hã omu nẽ hkĩnh kêt nẽ. ⁹ No mẽ papajaja na pu htem mẽ urak nẽ ã amnhĩ nhĩpêx anhỹr kêt nẽ. Ra Tĩrtũm Karõ kot mẽ pahkarõ mã gjêx jakamã na pu htem hkõt pix mã amnhĩ nhĩpêx hprãm. No koja Tĩrtũm Karõ mẽhõ kaxwỳnh mã àr kêt nẽ nhũm kệp hkra hkêt nẽ.

¹⁰⁻¹¹ Tã mẽ papajaja. Mẽ pahte amnhĩ tomnuj mỳrapê koja mẽ pakrãhkàja nhỹrmã ty. No nhũm Tĩrtũm ra kot amnhĩm mẽ pahte amnhĩ to mex xwỳnh ã mẽ pajarẽnh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nẽ. Mẽ pakrãhkà pix koja ty nhũm mẽ pahkarõja ma kaxkwa hwỳr àpir kurê kumrêx. Tã nhũm nhỹrmã Tĩrtũm akupỹm mẽ pakrãhkà ho htĩr nẽ akupỹm mẽ pahkarõja mẽ pakrãhkàm hagiê pu mẽ wa kuri pahtĩr tũm nẽ papa ho papa. ¹² Jakamã e kwa ixkwỳjaja. Kêr pu mẽ axte ri mẽ pajamaxpêr tũm kõt amnhĩ nhĩpêx o ri papa hkêt nẽ. ¹³ Kot puj mẽ arĩ ã amnhĩ nhĩpêx anhỹr o ri papa hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr papa. Jakamã kêr pu mẽ mêmo arĩgro hã pamã tanhmã amnhĩ tomnuj to hprãm hãmri nẽ amnhĩ kukamã pajamaxpêr o:

—Nà inhmã ã amnhĩ nhĩpêx anhỹr prãm tã kot paj Tĩrtũm Karõ nhỹ hã ja kutã amnhĩ to htỳx nẽ ho anhỹr kêt nẽ. Anẽ.

Kot puj mẽ ã pajamaxpêr anẽ hãmri nẽ nhỹrmã kuwy wỳr papa hkêt nẽ. Pãnhã Tĩrtũm mẽ Jesus wa kuri pamex nẽ pahtĩr tũm nẽ ri papa ho papa. ¹⁴ Mẽ kot Tĩrtũm Karõ hkõt amnhĩ nhĩpêx xwỳnhjaja kệp Tĩrtũm kraa.

¹⁵ Nom amnepêm kormã mẽ pahte hkõt amnhĩ

xunhwÿr kêt ri. Nê kormã mẽ pamã kapêr mar prãm kêt ri nhũm kot amnhĩ tã mẽ pahpumunh nê tanhmã mẽ pahto pumaj na pu prem pamã uma ho ri papa. Tã hkôt amnhĩ xunhwÿ nhũm Karõja mẽ pahkarõ mã gjêx jakamã na pu htem ra pamã uma hkêt nê ri papa. Karõ kot mẽ pahpê Tĩrtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nê ri papa. Nê paxãmnhĩx pajamakêtkati nê kãm amnhĩ jarê nê kãm amnhĩ jarênh o:

—Pa Inhĩpêêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ija-maxpêr. Anê.

Jao ra mẽ pamã uma hkêt nê ri papa. ¹⁶ Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o:

—Nà Tĩrtũm Karõ kot ixkarõ mã àr jakamã ixpê hkra na pa. Anê.

*Nhÿrmã mẽmoj piitã akupÿm mex par ã harênh
Sikũn Korõt 4.16-18; Korosê 3.4; Wam Pêtre 4.13*

¹⁷ Nê mẽ kãm Tĩrtũm prãm kêt xwÿnhjaja na htem te mẽ kot Tĩrtũm Kra Jejus nhĩpêx pyræk o mẽ panhĩpêx pu mẽ pahpunuj nê ri papa. Nom kot puj mẽ nhÿrmã Tĩrtũm mex o mex xwÿnhja kuri pamex kumrêx nê papa. Mẽ pahpê hkra jakamã kot puj mẽ Kra Jejus pyrà nê õ krĩ kamã kuri pamex kumrêx nê ri papa ho papa. ¹⁸ Jar Jejus ã mẽ pahpunuj nê ri papa htã kot puj mẽ nhÿrmã kuri pamex kumrêx nê papa ho papa. Hãmri nê mẽ pamex o pamex ã amnhĩ pumu nê jar pika ja kamã tanhmã mẽ pahpunuj toja mã axte pajamaxpêr kêt kumrêx.

19 Nê pika hkôt Tĩrtũm kot mẽmoj ho kator xwỳnhjaja na htem Tĩrtũm kot mẽ pahto mex par jatur xàm mẽnh ã arĩgro jamār rāhā ho pa. àk nê mry nê pĩ nê gô nê mẽmoj piitā mẽ pajamār o pa. Te kot mẽ pakukamā hamaxpēr o:

—Kwa mẽmo arĩgro hā koja Tĩrtũm hkrajê piitā ho amnhĩrĩt nê mẽ ho mex par jatur xàm kumẽ pu mẽ ja hā mẽ omu? Hêxta waa nê. Inhmā tokyx ja hā mẽ omunh prām tỳx. Koja tokyx ã mẽ hipêx anê pa ixkĩnh tỳx kumrêx.

Anhỹr o hamaxpēr pyrāk. 20 Mẽmo kaxyw na hte mryja ã mẽ pakukamā hamaxpēr anê? Nà amnepê mã Tĩrtũm kot mẽmoj piitā ho katorta ã nhũm pre piitā mex o mex. Pĩ nê mry nê gô. Mẽmoj piitā mex kumrêx rāhā nê. Aa grà nê htyk kêt kumrêx. Tã Atāw kot amnhĩ tomnuj mỳrapê nhũm ra ỹ hā mẽmoj piitā homnu par jakamā na hte mẽmoj htĩr nê pa nê gaa nê ty nê hapêx. Nê mẽ pahpur kām ahkagrôt punuj hapôj. Atāw kot amnhĩ tomnuj mỳrapê nhũm Tĩrtũm kapêr xà hkôt ã mẽmoj omnu hpar anê. 21 Nom koja arĩ rāhā ho rāhā hkêt nê. Koja nhỹrmā Tĩrtũm akupỹm mẽmoj piitā ho mex pa nhũm mex o mex nê axte grà rỳ axte htyk nê hapêx kêt nê. Nê axte omnu nê hikwỹ hkêt nê. Koja mẽ pahpyrà nê mex o mex. Jakamā na htem Tĩrtũm kot mẽ pahto mex par jatur xàm mẽnh xà hā arĩgro jamār rāhā ho pa. 22 Te mẽhõ ni hpijagri kaxyw õhy xà htỳx nê tokyx kām hpijagri hprām xà àmra ho nōr pyrāk o amnhĩ nhĩpêx pẽ mẽ pahto mex jatur xàm mẽnh ã arĩgrota jamār o pa.

23 Nê mẽ papajaja na pu htem tanhmā pahpunuj to nê jajê pyrà nê te amnhĩ kamnhêr o rĩ papa

pyràk. Rỳ tanhmã paxà kute nẽ ri papa. Rỳ pamã prãm nẽ paxàa nẽ ri papa. Nẽ tanhmã mẽ pahpunuj to nẽ ri papa. Jao te pĩ nẽ gô nẽ mryja pyrà nẽ amnhĩ tâ Tĩrtũm kot mẽ pahto mex par jatur xàm mẽnh ã arĩgro jamãr rãhã ho ri papa.

Na pre Tĩrtũm mẽ pahwỳr Karõ rẽ nhũm mẽ pahkarõ mã agjê nẽ mẽ pakukamã Tĩrtũm tanhmã kot mẽ pahto mex to hã mẽ pamã ho amnhĩrĩt nẽ mẽ pamã ho amnhĩrĩt o:

—Koja nhỹrmã Tĩrtũm mẽ ato mex par jatur xàm kumẽ nẽ mẽ piitã mẽ kãm mẽ apê hkra hã mẽ ato amnhĩrĩt. Hãmri nẽ mẽ amã mẽ anhĩ nyw gô ka mẽ axte axà nẽ ri apa nẽ atyk kêt nẽ. Hãmri nẽ Tĩrtũm ri amex kumrêx nẽ ri apa ho apa. Nà kot kaj mẽ nhỹrmã ã amnhĩ nhĩpêx anẽ. Anẽ.

Ã Tĩrtũm Karõ kot mẽ pakukamã mẽ pajarênh anhỹr jakamã na pu htem amnhĩ tâ kot mẽ pahto mex jatur xàm mẽnh pix jamãr o ri papa. ²⁴ Nom na kormã ã mẽ pahto mex anhỹr kêt nẽ. Kormã mẽ pamã mẽ panhĩ nyw nhõr kêt nẽ. Nom ra kot mẽ pahto hkra jakamã pu mẽ ja hã amnhĩ pumu nẽ pajamexpêr o:

—Nà ra Tĩrtũm kot ixto hkra jakamã koja nhỹrmã mããnên inhmã inhĩ nyw gô. Nà koja inhmã kugô.

²⁵ Anhỹr o pajamexpêr tâ kormã. Na pu htem kormã amnhĩ tâ hamãr rãhã ho ri papa nẽ aa hkaga hkêt nẽ papa.

Mẽ pahte Tĩrtũm Karõ nhỹ hã Tĩrtũm mã amnhĩ jarênh

²⁶ Nẽ na pu htem Tĩrtũm mã amnhĩ jarênh kaxyw nhũm hte Karõja mẽ pahto ajuta pu mẽ ỹ hã pakatàt kôt kãm tanhmã amnhĩ jarênh to. No kot

puj mẽ amnhĩ krã hkôt kãm amnhĩ jarēnh mex kêt nē. Na pu htem ja kaxyw tee ri amnhĩ kukamã pajamaxpēr o:

—Kwa tanhmã kot pa Tĩrtũm mã amnhĩ jarēnh to? Tanhmã kot pa mẽmoj tã ixàhwýr to rý amnhĩ to hwýr to? Nà kot paj amnhĩ krã hkôt ja ho anhýr mex kêt nē. Hêxta waa nē. Anē.

No nhũm Tĩrtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ý hã kãm amnhĩ jarēnh mex nē pakatàt kôt mẽmoj tã kuwý. Te Karõja tanhmã mẽ pakute hã mẽ pahpumunh nē mẽ pakamã ukaprĩ xàj tãm mẽ pahto hwýr pyræk.

²⁷ Jakamã pu mẽ ý hã tanhmã Tĩrtũm mã amnhĩ jarēnh to nhũm mẽ pamar kuré kumrêx. Ra kot mẽ pajamaxpēr kôt mẽ pahpumunh par kênã. Nhũm ra Karõ kot mẽ pahkarõ mã gjêx jakamã na pu htem kãm hprãm xà hkôt kãm amnhĩ jarē nē tanhmã amnhĩ to paxàhwýr to.

Tĩrtũm kot mẽ pamã mẽmoj piitã ho mex ã harēnh Römän 8.37; Piripos 1.12; Wam Pêtre 5.10

²⁸ Nē mẽ pamã Tĩrtũm kĩnh xwýnhjaja. Tĩrtũm kot mẽ pahto hkra xwýnhjaja. Kojã mẽmoj mẽ pakamã tanhmã amnhĩ to htã kêr pu mẽ ãm ja hã amnhĩ pumu nē tee ri amnhĩ kukamã pajamaxpēr kêt nē. Kojã te mẽ pahpê omnuj pyræk tã kojã nhýrmã hpãnhã mẽ pamã mex nē. Kojã Tĩrtũm nhýrmã tanhmã mẽ pamã mẽmojta o mex to. ²⁹ Amnepê mã mẽmoj piitã hkêt ri na pre Tĩrtũm mẽ pakukamã tanhmã mẽ pajarēnh to nē mẽ pajarēnh o:

—E kot paj nhÿrmã mẽ kot Ixkra Jejus kôt amnhĩ xunhwÿr xwÿnhjê ho ixkra jakamã nhÿm mẽ Jejus pyrã nê kêp ixkraa. Nê uràk nê ixkapêr kôt amnhĩ nhĩpêx o pa. Jao pa ra ixkra xohtô nê. Nà ja na inhmã hprãm. Anê.

³⁰ Tã pu htem pajapôj nê ri papa. Hãmri nê kapêr ma nê amnhĩ kaxyw Kra Jejus kôt pajamaxpêr nê hkôt amnhĩ xunhwÿ. Hãmri nhÿm Tĩrtũm ja hã mẽ pahpumu nê pahto hkra nê amnhĩm mẽ pamex xwÿnh ã mẽ pajarê nê mẽ pahto mex nê. Nê te ho Kra Jejus nhĩpêx pyrãk o mẽ panhĩpêx. Jao nhÿrmã wa kuri mẽ pahtĩr tũm nê papa ho papa mã xwÿnh ã mẽ pajarê.

*Mêhõ kot Tĩrtũm pê aa mẽ papytãr kêt ã harênh
Römän 5.1*

³¹ Tã ã Tĩrtũm kãm mẽ pajapê nê mẽ pahto mex kot anhÿr. ã kot mẽ panhĩpêx mex anhÿr jakamã ra mẽ pahkôt pa ho pa rãhãã. Jakamã mêhõ koja ãhkra pê mẽ pahpytã? Nê mêhõ koja tanhmã ri kêp mẽ pahto? Nà koja kêp mẽ papytãr rÿ tanhmã kêp mẽ pahto hkêt nê. ³² Tĩrtũm kãm Kra Jejus japê htÿx tã na pre mẽ pahpê nê hkêt nê mẽ pahwÿr kumê. Te kot mẽ pamã òr pyrãk o hipêx nhÿm mẽ pahwÿr wrÿ nê mẽ panê ty. Tã ra Tĩrtũm kot mẽ pamã òr jakamã koja mãânên kãm mẽ pahte Kra hkôt amnhĩ xunhwÿr xwÿnhjê japê nê mẽ pahto mex rãhã ho ri pa. Nà koja ã mẽ pahto mex anê.

³³ Jakamã mêhõ koja kãm mẽ pahte amnhĩ tomnuj xwÿnh ã mẽ pajarê? Ra tãm kot mẽ pahto hkra nê mẽ pahte amnhĩ to mex xwÿnh ã mẽ pajarênh kênã kot kêt mêhõ kãm tanhmã mẽ pahto kapêr punuj to nhÿm mẽ kuma. Koja mẽ tee ri kãm

tanhmã mẽ pahto kapër to kaprỳ. ³⁴ Na pre ra Jejus Kris mẽ pahte amnhĩ tomnuj pãnhã amnhĩrer kaxyw mẽ panê ty nhũm Tĩrtũm akupỹm ho htĩr. Hãmri nhũm ma akupỹm kaxkwa hwỳr api nê Pahi Maati krĩ xà kamã Tĩrtũm nhĩhkô hã hkrĩ ho hkrĩ. Nê Tĩrtũm mã mẽ pakutã nojarêt rãhã ho kuri hkrĩ ho hkrĩ. Jakamã mēhõ koja kēp mẽ kot amnhĩ xà htỳx kamã hamak tũm xàta wỳr mẽ pajano? Nà amrakati kumrẽx.

³⁵ Nê Krisja kaxkwa kamã Tĩrtũm nhĩhkô hã hkrĩ ho hkrĩ htã mããnēn jar mẽ pahkôt pa ho pa. Kãm mẽ pajapê htỳx jakamã kot puj mẽ tanhmã pahpunuj to htã nhũm arĩ kãm mẽ pajapê nê mẽ pahkôt pa ho pa.

Rỳ nhũm mẽ kot hkôt amnhĩ xunhwỳr kêt xwỳnhjaja tanhmã hã mẽ pahto htã nhũm arĩ kãm mẽ pajapê kamã mẽ pahkôt pa ho pa.

Rỳ mẽ pamã prãm nê ri papa. Rỳ mẽ paxê hkêt nê pamã kry nê ri papa htã nhũm arĩ kãm mẽ pajapê kamã mẽ pahkôt pa ho pa.

Rỳ ra mẽ kot hã mẽ panhĩmex kaxyw rỳ hã mẽ pahpar kumrẽx. Tã nhũm arĩ kãm mẽ pajapê kamã mẽ pahkôt pa ho pa rãhã nê.

Kãm mẽ pajapê kamã mẽ pahkôt pa ho pa rãhã jakamã pu mẽ tee ri amnhĩ kukamã pajamaxpēr kêt nê. ãm hkôt paxãmnhĩx ri pajamakêtkati nê ri papa ho papa. ³⁶ Tĩrtũm kapër ã kagà htũm te mẽ papajaja mẽ pahte kãm tanhmã amnhĩ jarēnh to pyrã nê mẽ pajarēnh kot:

Pa Tĩrtũm. Na htem atã mẽ ixtomnuj tỳx o pa.

Nê ra mẽ kot mẽ inhĩmex kaxyw.

Ně mẽ inhĩpêx o te mẽ kot ôwêhti ho mõi mẽ hpar
kaxyw tanhmã hipêx to pyræk.

Jakamã na pa mẽ ra ixtyk kaxyw.

Anhÿr o kot mẽ pajarênh. ³⁷ Tã kwãr mẽ ã mẽ
panhĩpêx anê. Arĩ Kris kãm mẽ pajapê kamã mẽ
pahkôt pa ho pa rãhã jakamã mẽ kot tanhmã
mẽ pahto htã pu mẽ arĩ amnhĩ kaxyw kãm paja-
maxpêr tÿx rãhã ho ri papa. Nhũm arĩ mẽ kutã mẽ
pahto paxihtÿx pu mẽ arĩ mẽ kãm pakuhê.

³⁸ Mẽmoj koja tanhmã mẽ pahto nhũm Tĩrtũm
tee ri ja hã mẽ pahpumu mẽ kãm mẽ pajapê hkêt
nê? Nà amrakati kumrêx. Koja mēhõ rÿ mẽmoj
mẽ pahpê àmnàr kêt nê. Na hte jar pika ja kamã
Kris kãm mẽ pajapê kamã mẽ pahkôt pa ho pa.
Ně kot puj mẽ nhÿrmã ty nhũm arĩ kãm mẽ pajapê
kamã mẽ pahkôt pa ho pa rãhã nê. Jakamã koja
mêkarõ rÿ mẽkarõmnuti rÿ jar pika ja kamã mẽ kãm
Tĩrtũm prãm kêt xwÿnhjaja mẽ pahpê àmnàr kêt nê.
Rÿ mẽmoj tanhmã kute. Rÿ kormã hapu hã mẽmoj
tanhmã kute. Koja mẽmoj piitã tee ri tanhmã kêp
mẽ pahto htã nhũm Kris arĩ kãm mẽ pajapê kamã
mẽ pahkôt pa ho pa rãhã nê nhũm mẽmoj tee ri mẽ
pahpê àmnàr kaprÿ. ³⁹ Nê koja kÿj rũm mẽmoj wrÿ
nê tanhmã kêp mẽ pahto japêr. Rÿ pyka rũm mẽmoj
kato mẽ tanhmã kêp mẽ pahto japêr. Rÿ kuwy rÿ
køk xapêr tÿx tanhmã kêp mẽ pahto. Tã nhũm mẽ
panhõ Pahihtĩ Jejus Kris arĩ kãm mẽ pajapê kamã
mẽ pahkôt pa ho pa rãhã nê. Te Tĩrtũm kãm mẽ
pajapê pyræk o kãm mẽ pajapê htÿx kãm mẽ pahkôt
pa ho pa rãhã jakamã nhũm mẽmoj tee ri mẽ pahpê
àmnàr kaprÿ.

9

*Ijaew jarēnh**Atre 3.25; Rômãn 3.1-2*

¹⁻² Nē na pa tee ri ixkwỳ Ijaew kot tanhmã amnhĩ nhĩpêx to ho pa hã mẽ omu nē ixkaprĩ nē. Ixpyrà nē mẽ kêp Ijaew tã ixkĩnhã amnhĩ kaxyw Kris kôt hamaxpēr kêt jakamã nhũm Kris tee ri kãm mẽ hamakêtkati nē àmnhĩx ri mẽ pa hprãm kaprỳ. Pa tee ri mẽ hkukamã ijamaxpēr nē ixkaprĩ nē ri ixpa. Nē aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhĩ tã ijarēnh tã inhmã mẽ hkĩnh kênã. ãm hãmri na pa ã amnhĩ jarēnh anē. Tĩrtũm Karõ kot ja hã ixpumunh mex nē inhmã:

—Nà ãm hãmri na ka amã mẽ hkĩnh ã amnhĩ jarē. Anē.

³ Mẽ kêp ixkwỳ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhĩ kaxyw Kris kôt hamaxpēr kêt jakamã kop ãm Tĩrtũm kot mẽ nē kuwy hwỳr pa inhmēnh ronhỹx ja inhmã mex. Nhỹx pa kãm:

—Kwa Tĩrtũm. Amnhĩ nē kuwy hwỳr ixkwỳjê rēnh kêt nē. Inhmã mẽ hapê htỳx kumrêx. Mẽ hpãnhã pa mãn mẽ nē hwỳr inhmẽ nà.

Anhỹr o nhỹx pa kãm ixkapēr. Nom kot paj amnhĩ to ã ixàhwỳr anhỹr kaprỳ. Tĩrtũm kot mẽ kamã ukaprĩ htã no nhũm mẽ amnhĩ kaxyw Kris mã hamaxpēr kêt jakamã tanhmã koja amnhĩ to nē mẽ hpãnhã pa mẽ nē kuwy wỳr inhmẽ nhũm mẽ ixrom kuri htĩr tũm nē pa ho pa? Mẽ kot hkôt amnhĩ xunhwỳȳre hã. ⁴ Mẽ ixpê Ijaew nhĩgêtjaja na pre Tĩrtũm amnepê mã mẽ ho mex rax nē. Nē kãm mẽ ho hkra hprãm nē. Nhũm prem tanhmã

kot amnhĩ nhĩpêx mex to hã no ho omunh o pa. Nẽ hirã htỳx kãm ri pa hã omu nhũm mẽ kãm:

—E kot kaj mẽ ixkapêr ma mẽ ixkôt amnhĩ nhĩpêx o ri apa. Hã kot paj mẽ akôt ixpa ho ixpa mẽ mẽ ato mex mẽ ka mẽ axpêñ kanrêhã axàmnàr rax mẽ. Hãmri pa mẽ amã pika mex gõ ka mẽ kamã ajamakêtkati mẽ axàmnhĩx ri apa ho apa.

Anhỹr o mẽ kãm kapêr. Hãmri mẽ mẽ kaxyw Mojes mã tanhmã kapêr to mẽ mẽ kaxyw kãm mẽmoj piitã hã karõ. Mẽ kot tanhmã amnhĩ tomnuj to hãmri mẽ tee ri ja hã amnhĩ pumunh mẽ tanhmã amnhĩ to Tĩrtũm wỳr to nhũm kot mẽ mar mẽ mẽ nê ja ho hapêx par kaxyw. Finat Mojes kot amnhĩ xô ri mẽ kãm ujarêñh nhũm mẽ kot mar mẽ hkôt amnhĩ nhĩpêx mex o ri pa kaxyw. ⁵ Mẽ ixkukamã mẽ ixpãmjaja. Apraãw mẽ Ijak mẽ Jako kanrêhã mẽ hkra mẽ mẽ htàmnhwỳjaja na pre mẽ. Mẽ hwỳr na pre Tĩrtũmjaja Kra Jejus Kris mẽ nhũm mẽ hwỳr wrỳ mẽ mẽ kamã ĩ ho ĩ ho kator jakamã haxwỳja kêp Ijaew na pre. Kêp Mêpahpãm mẽ mex o mex mẽ hihtỳx o hihtỳx tã Ijaew wỳr wrỳ mẽ mẽ kamã kato. Hãmri nhũm Ijaew kêt xwỳnhjaja harêñh ma mẽ tee ri hamaxpêr mẽ hamaxpêr o:

—Hêxta waa mẽ. Kêp ãm Jejus mẽ papa kamã mãn kator ronhỹx mẽ pamã mex kumrêx. Anê.

⁶ No nhũm kormã Ijaew hwỳr wrỳk kêt ri nhũm Tĩrtũm ra kot mẽ ho hkra kaxyw mẽ hã amnhĩ jarê nhũm mẽ hkwỳja kãm ja prãm kêt mẽ hkaga. Tã xà na pre Tĩrtũm kot mẽ ho hkra hã amnhĩ jarêñh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê mẽ hã amnhĩ to hêx. Jakamã na pre mẽ hkwỳjaja hkwỳjê rom hkaga hkêt mẽ nhũm amnhĩ tã mẽ omu mẽ mẽ ho hkra. Nom mẽ piitã mẽ

ho hkra hkêt nê. Mê hkwỳjaja kot hkaga jakamã nhũm ãm mẽ hkwỳjê pix o hkra.

⁷ Nê finat Apraãwja na pre hkanrêhã hkra nê htãmnhwỳ xohtô nê. Tã xà na pre Tĩrtũm htãmnhwỳ piitã mẽ ho hkra hã amnhĩ jarê? Nà mẽ piitã ã mẽ harênh anhỹr kêt nê. ãm mẽ hkwỳjê pix na pre mẽ ho hkra hã mẽ harê. Apraãw kra Ijak kôt hkanrêhã htãmnhwỳ pixjaja nhũm kot mẽ ho hkra hã mẽ harê.

⁸⁻⁹ Nê Apraãw kormã hprõ kamã hkra hkêt ri na pre kãm àpênh xwỳnh kamã hkra nhũm kato nê myre nê hixi pê Ismael. Nom kêp Apraãw prõ kumrêx kamã hkra hkêt. Prõ kuprỳ kamã hkra na pre. Tã nhũm Tĩrtũm kãm hkra kumrêx kukamã harê nê kãm:

—E kot paj ma tẽ hãmri nê mẽmo arĩgro hã akupỹn awỳr tẽ nhũm ra aprõ hpijagri nhũm war akra myre. Anê.

Tã nhũm hprõ Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prõ kamã hkra jakamã Tĩrtũm nom kêp Apraãw kra kumrêx. Jakamã hkra Ijak kanrêhã htãmnhwỳjaja na pre Tĩrtũm kot mẽ ho hkra hã mẽ harê. Ra kot Apraãw mã ja hã amnhĩ jarênh xà hkôt.

¹⁰ Tã nhũm Ijakja hprêk nê Repek o hprõ. Nê gaa nê ra haxwỳja wa hkra nhũm hkraja wa ahpõ nê kato nê wa hamê my. Kot wa pê Ejau nhũm kot hapu pê Jako. ¹¹⁻¹² Nom nhũm kormã wa kator kêt ri nhũm Tĩrtũm wa hkukamã tanhmã wa harênh to. àhpumunh xà hkôt wa katorxà mã wa harê nê kãm:

—E kot paj amã war akra wa hkukamã tanhmã wa harênh to ka inhma. Nà koja wa kato nê gaa nê

hprêk hāmri nhũm kot haputa amnhĩ to rax o kot wa jakre. Anẽ.

Kot wata koja kot hapu kĩnhã amnhĩ to grire nẽ ri pa nhũm ã wa hkukamã wa harẽnh anẽ. Kãm wa kot tanhmã amnhĩ nhĩpêx to hprãm xà hkôt ã wa harẽnh anẽ. Kormã wa kot tanhmã amnhĩ tomnuj to rỳ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harẽnh anẽ. ¹³ Tĩrtũm kapêr ã kagà htũm kot wa harẽnh nẽ wa hã kagà kot:

Ejau rom Jako kanrêhã hkra nẽ htàmnhwỳ pixjaja na pre Tĩrtũm amnhĩm mẽ ho hkra. Anẽ.

¹⁴ Mãn ka mẽ Tĩrtũm kot ã wa harẽnh anhỹrja ma nẽ ajamaxpêr o:

—Tk. Kwa ja mexti hã. Mo na pre hamẽ wa hkanrêhã wa hkra nẽ wa htàmnhwỳ piitã ho hkra hkêt nẽ? Anẽ.

Kwa mẽ ã ajamaxpêr anhỹr kêt nẽ. Tĩrtũm na hte kãm hprãm xà hkôt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nẽ ãm omu nẽ amnhĩ tã tanhmã kãm nẽ hkêt nẽ. ¹⁵ Na pre finat Mojes mã amnhĩ jarẽnh o:

Inhmã hprãm xà hkôt na pa hte mẽ omu nẽ tanhmã mẽ kamã ixukaprĩ hto ho ri ixpa.

Nẽ inhmã hprãm xà hkôt na pa hte ahpỹnhã tanhmã mẽ hipêx to ho ri ixpa.

Anhỹr o kãm amnhĩ jarẽ. ¹⁶ Nom tanhmã mẽ pahte amnhĩ nhĩpêx to hã mẽ pahpumunh kôt na hte mẽ pakamã ukaprĩ hkêt nẽ. ãm tãm kãm hprãm xà hkôt na hte tanhmã mẽ pakamã ukaprĩ hto ho pa. ¹⁷ Amnepê mã Ejit kãm mẽ õ pahihti Paraohti hwỳr na pre Mojes mẽ nhũm ma hwỳr mỗ nẽ kãm tanhmã Tĩrtũm kapêr jarẽnh to nẽ kãm:

—E Tĩrtũm na awỳr inhmẽ pa mỗ. Tãm na pre apê Ejit nhõ xwỳnhjê nhõ pahi kaxyw axãm. Akrã hihtỳx tã nhũm mẽ kaxyw axãm. Tã ra xatã àhpumunh tỳx o tanhmã anhĩpêx to. Krĩ piitã hkôt ri mẽ pa xwỳnhjaja kot atã harênh mar nẽ àhpumunh o àhpumunh ã omunh kaxyw. Tã ixte amã ja jarênh kaxyw na pre awỳr inhmẽ pa man awỳr mỗ. Anẽ.

¹⁸ Æ na hte Tĩrtũm kãm hprãm xà hkôt tanhmã mẽ panhĩpêx anhỳr to ho pa. Jao mẽ hkwỳjê kamã ukaprĩ ho pa. No mẽ hkwỳjaja nhũm tee ri mẽ hkrã hihtỳx ã mẽ omu nẽ ãm mẽ omu nhũm mẽ amnhĩ krã hkôt ri tanhmã amnhĩ tomnuj to ho ri pa.

Tĩrtũm kêp mẽ pakamã ukaprĩ xwỳnh ã harênh

¹⁹ Nẽ kot kaj mẽ atõ Tĩrtũm kot ã mẽ hipêx anhỳrja ã harênh ma nẽ tanhmã hã ixkukjêr to nẽ inhmã:

—Kwa na xep hte Tĩrtũm ahpỳnhã tanhmã mẽ hipêx to. Nẽ mẽ hkwỳjê kamã ukaprĩ ho pa nẽ mẽ hkwỳjaja mẽ hkrã hihtỳx ã mẽ omu nẽ ãm mẽ omu nẽ mẽ kamã ukaprĩ hkêt nẽ. Jakamã kwa mo na hte mẽ kot amnhĩ tomnuj xwỳnh ã mẽ harê? Tãm kot ã mẽ hipêx anhỳr kênã kot kêt mẽ kot amnhĩ tomnuj xwỳnh ã mẽ harẽ.

Anhỳr o ajamaxpêr japêr. ²⁰ Kwa mẽ ri ã atỳx Tĩrtũm jarênh anhỳr kêt nẽ. E pa mẽ amã ejêp jarê ka mẽ inhma. Xà kot mễhõ gyw kwỳ ho amnhĩm poti nhĩpêx nhũm tee ri amnhĩ tã omu nẽ amnhĩ tã tanhmã kãm kapêr to nẽ kãm: “Tk. Kwa mon ka ri ã inhĩpêx anẽ?” Anhỳr o amnhĩ tã kãm kapêr? Nà koja kãm tanhmã nẽ hkêt nẽ. ²¹ Hipêx xwỳnh kãm hprãm xà hkôt kot ã hipêx anhỳr kênã kot kêt amnhĩ tã kãm akir. Koja amnhĩm gyw kwỳ kakwỳ

nē ho poti ho axkrut nē hipêx. Nē hō ho muxre. Ho mex kumrêx nhũm xa. Nhũm ihōja mā ho anē nē hipêx no ām wamta kīnhā ho hanhàjti nhũm omnajti nē xa. No ām tām kot hamē wa hipêx prām xā hkôt wa hipêx kēnā.

²² Tā na hte ā Tīrtūm mē panhīpêx anē. Te poti pynajre pyrā nē mē pahkwỳjê nhīpêx nhũm mē kām kapēr mar prām kêt nē htỳx ri tanhmā amnhī tomnuj to ho ri pa. Hāmri nhũm amnhī tā mē omu nē te amnhī nē mē rēnh kaxyw pyrāk o mē hipêx no ām kormā hamaxpēr o:

—Nà kot paj nhỹrmā mē kot amnhī tomnuj mỳrapê mē ho ijabêx pa nhũm mē piitā ja hā ixpumu nē inhmā ixàhpumunh o ixàhpumunh ā ijarē. Nē inhmā mēmoj punuj piitā hkīnh kêt kumrêx ā axpēn mā ijarē. Anē.

²³ Nom na hte jajê rom mē pahkwỳjê nhīpêx o te poti mexta nhīpêx pyrā nē amnhī kaxyw mē paxunhwỳ nē mē pahto hkra kaxyw. Nē mē pajarēnh o:

—Nà koja mē amnhī kaxyw Ixkra Jejus mā hamaxpēr nē hkôt amnhī xunhwỳ pa ja hā mē omu nē mē kamā ixukapri ho ri ixpa. Nē mē ho mex pē mē kutā inhnojarêt rāhā ho ri ixpa. Hāmri nhũm mē nhỹrmā Ixkra mē wa ixri htīr tūm nē mex nē pa ho pa. Kot paj ā mē ho mex anē nhũm mē amnhī tā ixpumu nē inhmā inhmex o inhmex ā ijarēnh o pa. Anē.

Ā na hte Tīrtūm ahpỹnhā mē pahpiitā mē panhīpêx anē.

²⁴ Nē na hte mē ixpê Ijaew pix o hkra hkêt nē. Na hte mǎānēn mē apê Ijaew kêt xwỳnhjê ho hkra.

²⁵ Amnepê mā mē kām kapēr jarēnh o ri mē pa

xwÿnhjê hõ pê finat Ojejja na pre te Tĩrtũm tãm kot Ijaew kêt xwÿnhjê jarẽnh pyrã nẽ mẽ harẽnh o: Amnepêm na pa pre mẽ ho ixkra hkêt tã kot paj mẽ hkwÿjê ho ixkra.

Na pa pre mẽ kamã ixukapĩ hkêt tã pa ra inhmã mẽ hapê nẽ.

²⁶ Nẽ ixte mẽ kêp ixkra hkêt ã mẽ harẽnh tã kot paj ra mẽ kêp ixkra hã mẽ harẽ.

Ixpê mẽõ Tĩrtũm kot paj ã mẽ harẽnh anẽ. Anẽ.

²⁷ Hãmri nhũm finat Ijais Ojej pãnhã tanhmã Ijaew jarẽnh to. Ijaisja Tĩrtũm nhÿ hã kapêr jarẽnh o ri pa xwÿnhjê hõ na pre. Jakamã nhũm Tĩrtũm kãm tanhmã mẽ ijarẽnh to nhũm kuma nẽ ô ri mẽ ixkukamã mẽ inhĩgêxjê mã ujarẽnh o pa nẽ hã kagà. Nẽ hã kagà ho:

Ijaew na mẽ ohtô rax kumrêx.

Te gô xujanãr mÿri pykahti grã hkryre xohtô pyrãk.

Tã koja mẽ piitã ixkôt amnhĩ xunhwÿr kêt nẽ.

Koja mẽ ãm grêre nẽ amnhĩ kaxyw inhmã hamaxpêr nẽ ixkôt amnhĩ xunhwÿ.

Jakamã mẽ tapxipixjaja koja hkwÿjê rom nhÿrmã inhõ krĩ hwÿr api.

²⁸ No mẽ kot amnhĩ kaxyw inhmã mẽ hamaxpêr kêt xwÿnhjaja kot paj tokyx tanhmã mẽ harẽnh to.

Mẽ kot amnhĩ tomnuj mÿrapê tanhmã mẽ harẽnh to nhũm mẽ ma mẽ kot amnhĩ xà htÿx kamã hamak tũm xàta wÿr ma pa.

Nà kot paj tokyx ã mẽ hipêx anẽ.

Anhÿr o mẽ harẽ. ²⁹ Nom nhũm kormã ã mẽ harẽnh anhÿr kêt ri nhũm ra wam tanhmã mẽ harẽnh to nẽ mẽ harẽnh o:

Amnepê m Sotõ mẽ Komo kamã mẽ pa xwÿnhjaja
na prem amnhĩ tomnuj tÿx rãhã ho ri pa.

Mÿrapê nhũm Tĩrtũm xàhpumunh o àhpumunh
xwÿnhja tee ri ja hã mẽ omu hãmri nẽ
kaxkwa rũm mẽ õ krĩ wa hipy mẽmoj pôõta
rẽ.

Nhũm mẽ hã rôrôk nẽ mẽ ho hkaxàr pa nhũm mẽ
hapêx.

Tã na pu htem mẽ urak nẽ amnhĩ tomnuj o ri papa.
Jakamã kop ãm Tĩrtũm kot mẽ pahkwÿjê kamã
ukapri kêt ronhÿx pu mẽ ra mẽ urak nẽ
pahpiitã pajapêx pa. Anẽ.

*Ijaew kwÿ kot Jejus kôt amnhĩ xunhwÿr kêt ã mẽ
harẽnh*

Römãn 10.1-4

³⁰ Nẽ Ijaew kêt xwÿnhjaja na prem Ijaew pyrã nẽ
kãm Tĩrtũm prãm kêt tã Jejus jarẽnh ma nẽ Ijaew
rom amnhĩ kaxyw hkôt hamaxpêr nẽ hkôt amnhĩ
xunhwÿ. Hãmri nhũm Tĩrtũm ja hã mẽ omu nẽ mẽ
ho hkra nẽ mẽ kot amnhĩ to mex xwÿnhjê hã mẽ
harẽ. ³¹⁻³² Hãmri nhũm Ijaew tee ri mẽ kot Jejus kôt
amnhĩ xunhwÿr ã mẽ omu nhũm ja mẽ kãm mex
kêt nẽ. Hãmri nhũm mẽ hamaxpêr o:

—Tk. Kwa ra mẽ ixte finat Mojes kapêr kôt
amnhĩ nhĩpêx mex o ri mẽ ixpa xwÿnh jakamã koja
Tĩrtũm ja hã mẽ ixpumu nẽ mẽ ixte amnhĩ to mex
xwÿnhjê hã mẽ ijarẽ nẽ mẽ inhnê mẽ ixte amnhĩ
tomnuj rênh pa. No kot paj mẽ Ijaew kêt xwÿnhjê
pyrã nẽ Jejus kôt amnhĩ xunhwÿr kêt nẽ. ãm kwarĩ
ho kwarĩ.

Anhÿr ã amnhĩ jarẽ. No ãm ã mẽ hamaxpêr
anhÿrja mex kêt. Na prem htÿx Tĩrtũm noo mã
kot amnhĩ to mex ã amnhĩ jarẽnh kaprÿ nẽ arĩ

ri tanhmã amnhĩ tomnuj to ho ri pa. Te pry kamã kên nôr nhũm mẽ kot nhãm nê mênh kaxyw hkamnâr nê ho amnhĩ par krã hi kukênh pyrâk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprãm xàj te Jejus kapêrja nhãm amnhĩ nê rênh pyrâk o hipêx. Jakamã koja mẽ Tĩrtũm nhõ krĩ hwỳr àpir kêt nê.
³³ Tĩrtũm kapêr ã kagà htũm kot ja jarênh kot:

E mẽ inhma. Kot paj nhỹrmã Ijaewjê hwỳr mēhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nôr nhũm mẽ kot nhãm pry nê mênh kaxyw hkamnâr nê ho amnhĩ par krã hi kukênh pyrâk o koja mẽ amnhĩ nhĩpêx.

No te mẽ kot nhãm pry nê mênh kaxyw hkamnâr kêt pyrâk xwýnhjaja koja mẽ kurom nhỹrmã ma Tĩrtũm nhõ krĩ hwỳr api.

Hãmri nê hkĩnh nê pa ho pa. Anê.

Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhĩpêx pyrâk o Jejus nhĩpêx nê amnhĩ kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhũm mẽ harê. No mẽ kot amnhĩ kaxyw hkôt hamaxpêr ronhỹx Jejus te kên kot mẽ kêp àmnâr pyrâk kêt nê. Jakamã ã mẽ harênh kot anhỹr.

10

¹ Hêxta waa nê. Ijaxwýja ixpê Ijaew. Mẽ kêp ixkwý jakamã kêp apu mẽ kot amnhĩ kaxyw Jejus mã hamaxpêr nê hkôt amnhĩ xunhwỳr ronhỹx pa ixkĩnh týx kumrêx. Inhmã mẽ kêp Tĩrtũm kra

hprãm tỳx kumrẽx kênã. Inhmã ja prãm xàj na pa hte mẽ ho Tĩrtũm wỳr rãhã ho ri ixpa. ² Ra ixte mẽ omunh mex. Mẽ kãm Tĩrtũm mã tanhmã amnhĩ nhĩpêx to hprãm tã no ãm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprỳ. ³ Nhũm pre Tĩrtũm tee ri amnhĩ tã mẽ omu nẽ hamaxpêr o:

—Koja mễhõ amnhĩ kaxyw Ixkra Kris kôt hamaxpêr nẽ hkôt amnhĩ xãm pa ja hã omu nẽ kot amnhĩ to mex xwỳnh ã harẽ nẽ ho ixkra kurê kumrẽx. Nom na hte Ijaew ohtô nẽ ã amnhĩ nhĩpêx anhỳr kêt nẽ.

Anhỳr o mẽ harẽ. ãm hãmri na ã mẽ harẽnh anẽ. Na htem ãm axtem nẽ hamaxpêr o:

—Tk. Kot paj amnhĩ kaxyw Kris kôt ijamaxpêr nẽ hkôt amnhĩ xãm kêt nẽ. Kot paj ãm pam amnhĩ krã hkôt tãm ri amnhĩ nhĩpêx o ri ixpa. Mẽ ixpê Ijaewjê mẽ ixte amnhĩ nhĩpêx xà hkôt. Hãmri nhũm Tĩrtũm ja hã ixpumu nẽ amnhĩm inhmex ã ijarẽ. Nom kot paj Kris kôt amnhĩ xãm kêt nẽ. ãm kwarĩ ho kwarĩ.

Anhỳr ã amnhĩ jarẽ. ⁴ Nom na htem ãm htỳx ri amnhĩ krã hkôt amnhĩ to mex o pa hã amnhĩ kamnhĩx kaprỳ. Koja mẽ tee ri kãm finat Mojes kapêr kôt amnhĩ nhĩpêx o ri pa hprãm kaprỳ. Jejus tapxipix na pre tãm amnhĩ nhĩpêx mex rãhã ho pa. Na pre Tĩrtũm kapêr kôt amnhĩ nhĩpêx mex o ri pa nẽ aa kapêr õ nhĩrôp ãm nẽ hkwỳm ri tanhmã amnhĩ tomnuj to hkêt nẽ. Kot amnhĩ tomnuj kêt xwỳnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwỳnh ã mẽ pajarẽ.

Tĩrtũm kãm mẽ pahpiitã mẽ pahto hkra hprãm ã harẽnh

⁵ Nẽ amnepêm na pre finat Mojes Tĩrtũm nhỹ hã Ijaew mã tanhmã ujarẽnh to nẽ hã kagà. Nẽ mẽ kãm ujarẽnh o:

—E kot kaj mẽ atõ Tĩrtũm nhỹ hã ixujarẽnh ma nẽ hkõt amnhĩ nhĩpêx mex o ri apa nẽ hkwỹm ri tanhmã amnhĩ nhĩpêx to hkêt nẽ. Hã koja Tĩrtũm hã apumu nẽ amnhĩm ate amnhĩ to mex xwỳnh ã ajarê ka nhỹrmã kuri atĩr tũm nẽ amex nẽ apa ho apa. Anẽ.

⁶ ã mẽ kãm kapêr anhỹr tã mẽ pahte Mojes kapêr xà hkõt amnhĩ nhĩpêx o papaja na mẽ pahpê hihtỳx kumrêx. Tĩrtũm kapêr tũm na. Kapêr ã kagà kamã kot mẽ pamã mẽ pahte tanhmã amnhĩ nhĩpêx to hã karõja ohtô rax kumrêx jakamã pu mẽ tee ri pamã piitã hkõt amnhĩ nhĩpêx prãm kaprỳ. Nhũm Tĩrtũm tee ri amnhĩ tã mẽ pajamã hãmri nẽ mẽ pahwỳr Kra Jejus mẽ. Jakamã na pu htem amnhĩ kaxyw hkõt pajamaxpêr nẽ hkõt amnhĩ xunhwỳnhũm Tĩrtũm hã mẽ pahpumu nẽ kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwỳr mẽnũm nhũm mẽ kot hpĩr nhũm akupỹm ho htĩr jakamã na pu htem harẽnhja ma nẽ pajamaxpêr o:

—Nà na xep pre Jejus ixto ixpê Tĩrtũm kra. Anẽ.

Nom xà na hte Tĩrtũmja ã mẽ pamã kapêr anẽ nẽ mẽ pamã:

—E kot kaj mẽ ma kaxkwa hwỳr api nẽ Kris japrô nẽ man amnhĩ kõt akupỹm o wrỳ pa ja hã mẽ apumu nẽ mẽ ato ixkra.

Anhỹr o mẽ pamã kapêr? Nà na hte ã mẽ pamã kapêr anhỹr kêt nẽ. Tanhmã kot puj mẽ amnhĩ to

ně ã amnhĩ nhĩpêx anê? ⁷ Rỳ xà na hte ã mẽ pamã kapêr anê mẽ mẽ pamã:

—E na pre Krisja ty. Jakamã mẽ kam ně ma hwỳr mra ně akupỳm amnhĩm ho htĩr. Hãmri pa ja hã mẽ apumu ně mẽ ato ixkra.

Anhỳr o mẽ pamã kapêr? Nà na hte ã mẽ pamã kapêr anhỳr kêt ně. Tanhmã kot pu mẽ amnhĩ to ně akupỳm ho htĩr? Ja pyrà ně na hte Tĩrtũm mẽ pamã mẽmoj tã karõ pu mẽ kãm ho anhỳr nhũm ja hã mẽ pahpumunh kôt mẽ pahto hkra hkêt ně. ⁸ ãm mẽ pahte amnhĩ kaxyw Jejus kôt pajamaxpêr ně hkôt amnhĩ xunhwỳr ã mẽ pahpumunh kôt pix mã na hte mẽ pahto hkra. Hãmri ně mẽ pahwỳr Karõ rê nhũm mẽ pahkarõ mã gjêx jakamã mẽ pahte Tĩrtũm kãm hprãm xà hkôt amnhĩ nhĩpêx o papaja na mẽ pahpê hihtỳx kêt. Te kapêr ra mẽ pahkrã hi kaxwỳnh kãm hikwỹ pyræk o pu mẽ piitã mẽ kãm harênh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpêr kaxyw tanhmã mẽ kãm harênh to ho ri mẽ hkôt ixpa ně mẽ kãm:

⁹ —Kot ka mẽ atõ Jejus kêp anhõ Pahihti hã harê ně Tĩrtũm kot akupỳm ho htĩr kôt ajamaxpêr. Hã koja Tĩrtũm ja hã apumu ně anê ate amnhĩ tomnuj o hapêx ně ato hkra. ãm ja pix ã mẽ pahpumunh kôt na hte mẽ pahto hkra. Anê.

¹⁰ Nễ na pu htem mẽ pahkrãhi kaxwỳnh kãm amnhĩ kaxyw Jejus mã pajamaxpêr. Nễ mẽ pajakwa ho kêp mẽ panhõ Pahihti hã harê. Hãmri nhũm Tĩrtũm ja hã mẽ pahpumu ně amnhĩm mẽ pahte amnhĩ to mex xwỳnh ã mẽ pajarê ně mẽ pahto hkra. ¹¹⁻¹³ Tã mẽ pahte amnhĩ kaxyw

Jejus kôt pajamaxpēr nē hkôt amnhĩ xunhwỳr xwỳnhjaja kot puj mẽ pahkĩnh nē papa ho papa. Mẽ pahpiitã. Ijaew nē Ijaew kêt xwỳnhjaja. Mẽ pahpiitã mẽ panhō Pahi Maatija ãm pyxi mex na. Jakamã koja Ijaewjê hō rỳ Ijaew kêt xwỳnhjê hō amnhĩ to kuwỳ nhũm kuma nē ho hkra. Kapēr ã kagà htũm kot ja jarēnh kot:

Mẽ kãm kêp Tĩrtũm kra hprãm xwỳnhjaja koja mẽ amnhĩ to Tĩrtũm wỳ nhũm mẽ kuma nē Jejus kot mẽ nē htyk kukwak ri mẽ nē mẽ kot amnhĩ tomnuj o hapêx nē mẽ ho hkra nhũm mẽ hkĩnh nē pa. Anē.

¹⁴⁻¹⁵ Xà na htem kormã amnhĩ kaxyw Kris mã hamaxpēr kêt rãhã amnhĩ to Tĩrtũm wỳ nhũm mẽ kuma nē mẽ ho hkra? Nà tanhmã kot wem amnhĩ to nē amnhĩ kaxyw kãm hamaxpēr kêt rãhã amnhĩ to kuwỳ? Na hte Tĩrtũm ma mẽ hwỳr mẽ hkwyjê rē nhũm mẽ ma mẽ hwỳr mra nē Tĩrtũm kapēr o mẽ ahkre ho ri mẽ hkôt pa. Nhũm mẽ hkwyjaja mẽ kuma nē amnhĩ kaxyw Jejus kôt hamaxpēr nē amnhĩ to Tĩrtũm wỳ. Kapēr ã kagà htũm kot ja jarēnh kot:

Koja mẽmoj mex jarēnh xwỳnhjaja ma mẽ hwỳr mra.

Nē mẽ hwỳr hpôx o mō nhũm mẽ amỳm amnhĩ wỳr mẽ omu nē hkĩnh nē. Anē.

¹⁶ Tã ra mẽ piitã kot kapēr mar tã piitã amnhĩ kaxyw hkôt hamaxpēr kêt nē. Jakamã nhũm finat Ijais tee ri ja hã mẽ omu nē Tĩrtũm mã mẽ harēnh o:

Pa Pahi Maati. Kwa ra mẽ kot akapēr mar tỳx tã akôt amnhĩ nhĩpêx kêt nē. Mẽ kãm akapēr kôt amnhĩ nhĩpêx o pa hprãm kêt. Na htem

ãm grêre nê akôt amnhĩ xunhwỳ nê akôt amnhĩ nhĩpêx o ri pa. Anê.

17 Kot anhỹr tã ãm mẽ kot Kris kapêr jarênh mar kôt pix mã na htem amnhĩ kaxyw hkôt hamaxpêr. Koja mẽ harênh mar kêt tã tanhmã koja wem amnhĩ to nê amnhĩ kaxyw hkôt hamaxpêr nê hkôt amnhĩ xunhwỳ? 18 Mãn ka mẽ atõ atỳx ã ajamaxpêr anhỹr o:

—Ko mãn Ijaew kormã Jejus kot mẽ panê tanhmã amnhĩ nhĩpêx to hã harênh mar kêt jakamã na mẽ kormã hkôt amnhĩ xunhwỳr kêt nê.

Anhỹr o ajamaxpêr. Nom ja kot anhỹr kêt. Ijaew piitã ra mẽ kot harênh mar kênã. Tĩrtũm kapêr ã kagà htũm kot ja hã mẽ harênh kot:

Na prem ma mẽ piitã mẽ kãm ja jarênh o ri mẽ hkôt pa nhũm mẽ piitã kuma. Anê.

19 Tã mãn ka prem ra ja ma nê atỳx ajamaxpêr o:

—Kot anhỹr tã no mãn kormã hprĩ hã Jejus jarênh mar kêt jakamã mẽ hkôt amnhĩ xunhwỳr kêt nê. Anê.

Nom ja haxwỳja kot anhỹr kêt. Ra mẽ kot hprĩ hã harênh mar mex tã kuma nê ãm kuma nê amnhĩ kaxyw kãm hamaxpêr kêt nê. No mẽ apê Ijaew kêt xwỳnh kwỳjaja na ka mẽ kurom harênh ma nê amnhĩ kaxyw hkôt ajamaxpêr nê hkôt amnhĩ xunhwỳr kurê kumrêx. Hãmri nhũm Ijaew tee ri ja hã mẽ apumu nê mẽ akamã gryk tỳx nê. Nom ra Tĩrtũm kot ã mẽ hkukamã mẽ kot amnhĩ nhĩpêx anhỹr ã mẽ omunh nê mẽ harênh kot anhỹr kênã. Na pre finat Mojes mẽ kãm tanhmã hã kagà hto. Te Tĩrtũm tãm kot mẽ hã kagà pyrà nê kapêr ã kagà htũm kamã kot mẽ harênh kot:

Mẽ ate mẽ kamã mẽ akahak o apa xwỳnhjaja.

Mě kot htỳx ri amnhĩ nhĩpêx o mẽ pa hã mẽ ate mẽ harênh tã no kot paj mẽ arom amnhĩm mẽ kot amnhĩ to mex xwỳnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk tỳx kumrêx.

Nê mãnên pa ixte mẽ ho mex ã ixpumu nê mẽ hã ixkamã agryk nê. Anê.

²⁰ Nê finat Ijais na pre haxwỳja ã mẽ harênh anê. Na pre kãm amnhĩ kwỳ pê Ijaew pyna hkêt nê xatã Tĩrtũm nhỹ hã tanhmã mẽ kãm Ijaew kêt xwỳnhjê jarênh to ho pa. Te Tĩrtũm tãm kot mẽ harênh pyræk o mẽ kãm:

Nã Ijaew kêt xwỳnhjaja kot Tĩrtũm japêr kêt tã koja tãm mẽ kãm amnhĩ to amnhĩrit nhũm mẽ hkôt amnhĩ xunhwỳ.

Mě kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrit. Anê.

²¹ ã Ijaew kêt xwỳnhjê jarênh kot anhỹr. Nê axte mã tanhmã Ijaewjê jarênh to kot:

Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyræk o na hte Tĩrtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nê ãm kuma nê hkôt amnhĩ nhĩpêx kêt nê. Anê.

11

Tĩrtũm kot Ijaew kamã ukapri hã harênh

Matêwre 13.10-17

¹ Tã ra Ijaew kot Tĩrtũm kaga jakamã mãn ka mẽ atõ mẽ harênh ma nê ajamaxpêr o:

—Mãn pre Tĩrtũm tee ri amnhĩ tã mẽ omu nê amnhĩ pyrà nê mẽ hkaga.

Anhÿr o ajamaxpêr. Nom na pre mẽ hkaga hkêt nê. Ijaxwÿja ixpê Ijaew na pa. Mẽ uràk nê ixpê Ijaew pàr krax pê finat Apraãw kanrêhã htàmnhwÿ Pêjamĩ kanrêhã hõ na pa. Tã xà na pre Tĩrtũm ixkaga? Nà kot ixkaga hkêt. ² Amnepê m kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarẽ. Tã nhũm amgrà xohtô nê hapêx nhũm mẽ hapôj hãmri nê Tĩrtũm kôt amnhĩ nhĩpêx o pa hkêt nê. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nê Tĩrtũm mã tanhmã mẽ harênh to nê mẽ hã kagà. Nê hã kagà ho:

³ Kwa Tĩrtũm. Mẽ ixte amã amnhĩ jarênh xà hã mẽsti hkwy na prem ra hkrakrak pa. Nê anhÿ hã akapêr jarênh o ri mẽ pa xwÿnh kwÿ nhĩmex rax nê. ãm papxipix na pa arĩ ixtĩr nê ri ixpa nom nhũm mẽ ra kot ixpĩr kaxyw ixtã amnhĩ jarẽ. Anê.

⁴ Tã tanhmã na Tĩrtũm kutã kãm kapêr to? Na pre kãm:

Nà kapxipix na ka arĩ atĩr kêt nê. Arĩ mẽ ohtô nê apyrà nê amnhĩ kaxyw ixkôt hamaxpêr. Mẽ ohtô. Arĩ mẽ kêp 7.000 nê akwÿjê rom ri sãnti Paaw kutã hkõnkrã ho hkrĩ nê kãm mex ã harênh kêt nê. Anê.

⁵ Tã arĩ ã jarãhã mẽ kot ã amnhĩ nhĩpêx anhÿr kênã. Tĩrtũm kãm Ijaew japê jakamã mẽ kamã ukaprĩ. Jakamã nhũm ra mẽ hkwyjaja mẽ pahpyrà nê amnhĩ kaxyw Kris kôt hamaxpêr nhũm Tĩrtũm mẽ ho hkra. ⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nê. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho

hkra ronhỹx amarĩ mẽ ho hkra hkêt nẽ. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tĩrtũm kot amnhĩm mẽ mex ã mẽ harẽnh prãm tã no ãm mẽ grêre nẽ hamaxpêr xà hkôt Jejus kôt amnhĩ xunhwỳ. Na htem ohtô rax nẽ kapêr ma nẽ ãm kuma nẽ tee ri kot amnhĩm mẽ mex ã mẽ harẽnh prãm xàj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprỳ. Mẽ kot hkaga jakamã te ri mẽ hamak kro nẽ Tĩrtũm kapêr mar kêt pyrà nẽ pa. ⁸ Tĩrtũm kapêr ã kagà htũm kot mẽ harẽnh kot:

Tĩrtũm na hte mẽ kãm kapêr mar prãm kêt xwỳnhjê pumu nẽ ãm mẽ omu nhũm htem htỳx ri pa ho pa. Nẽ Tĩrtũm mã hamaxpêr kêt o ri pa. Mẽ kot kapêr mar tã hprĩ hã mar tỳx kêt nẽ. Nẽ mẽ kot kapêr ã kagà kamã harẽnh tã hprĩ hã mar tỳx kêt nẽ. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre nẽ mẽ hamak kro xwỳnh kot amnhĩ nhĩpêx pyræk. Anẽ.

⁹ Nẽ amnepêm na pre pahĩ finat Tawija amnhĩ kwỳ Ijaew jarẽnh o:

Na htem htỳx ri hkĩnh kãm apkur o pa.

Te tutre kãm prãm nẽ kot rapuuti hwỳr àr nẽ tee ri kãm kator prãm kaprỳ pyræk.

Ja pyrà nẽ mẽ kot Tĩrtũm kapêr mar kêt mỳrapê koja Tĩrtũm tanhmã mẽ ho nhũm mẽ tee ri kãm mex prãm kaprỳ.

¹⁰ Te mẽ nohkre xwỳnhjaja tee ri mẽ hpa nhĩpêx o pa pyræk.

Nē omnuj nē à nē ho gjêx o ri pa pyrāk o amnhī
nhīpêx o ri pa.

Anhÿr o mē harê. ¹¹ Tā arī Ijaew Jejus kaga nē
kām kapêr mar prām kêt jakamā xà na Tirtūm tee
ri ja hā mē omu nē mē hkaga kumrêx? Nà kot mē
hkaga hkêt. Ām mē tāmjaja kêp Jejus prām nōkati
jakamā nhūm tee ri ja hā mē omu nē mē hpānhā
Ijaew kêt xwÿnhjê mā amnhī to amnhīrīt nē mē
hkwÿjê ho hkra. Jakamā koja Ijaew kwÿjaja ja hā
mē omu nē tee ri hamaxpêr nē hamaxpêr o:

—Kwa na xep Ijaew kêt xwÿnh kwÿjaja Jejus kôt
amnhī xunhwÿ nhūm Tirtūm ja hā mē omu nē mē
ho hkra. Kwa mon pu prem axtem nē ri Jejus
kaga? E pu mē kuxwar amnhī kaxyw hkôt mǎn
pajamaxpêr nē hkôt amnhī xunhwÿ kê Tirtūm ja
hā mē pahpumu nē Ijaew kêt xwÿnhjê pyrà nē mē
pahto hkra. Hāmri nē amnhī mā mē pahte amnhī
to mex xwÿnh ā mē pajarê. Anê.

Ā Ijaewjaja hamaxpêr anhÿr kaxyw na pre
Tirtūm Ijaew kêt xwÿnhjê mā amnhī to amnhīrīt.
¹² Hāmri nhūm mē amnhī tā omu nē hkīnh nē pa.
No nhūm Ijaew kwÿjaja. Mē kām Jejus prām nōkati
ho mē pa xwÿnhjaja mē hkīnhā hkaprī nē pa. Tā
koja mē nhÿrmā amnhī kaprī hā amnhī pumu nē
amnhī kīnh kêt ā amnhī pumu hāmri nē Tirtūm kôt
amnhī xunhwÿr nē amnhī kaxyw Kra Jejus Kris
mā hamaxpêr japêr. Koja mē ā amnhī nhīpêx anê
hāmri nē Ijaew kêt xwÿnhjê pyrà nē hkīnh nē ri
pa. Hāmri nhūm Tirtūm ja hā mē omu nē Ijaew kêt
xwÿnhjê mē mē ho hpimràatā mē ho mex rax nē
nhūm mē hkīnh nē hamakêtkati nē pa ho pa.

Tirtūm kot Ijaew kêt xwÿnhjê ho hkra hā harēnh

13 E kot paj hpãnhã mẽ apê Ijaew kêt xwýnhjê mã ixkapêr nê mẽ atã kagà. Na pre Jejus ma mẽ awýr inhmẽ. ý hã ixte mẽ ajahkre ho ri mẽ akôt ixpa kaxyw. Pa pre ma krĩ hkwý kamã mẽ akwýjê hwýr mō nê ixkĩnh kãm mẽ kãm kapêr jarênh o ri mẽ hkôt ixpa. Nhũm mẽ hkwýjaja inhma nê amnhĩ kaxyw Jejus kôt hamaxpêr nê hkôt amnhĩ xunhwý. ¹⁴ Tã koja apu ixkwýjaja mẽ harênh mar japêr. Ijaew tee ri mẽ apê Ijaew kêt xwýnhjê jarênhja ma hãmri nê ra amnhĩ kamã gryk japêr. Jao mẽ apyrà nê Jejus kôt amnhĩ xunhwý nê nhỹrmã kuri htĩr tũm nê mex nê pa ho pa. ¹⁵ Kormã mẽ kot amnhĩ kaxyw kãm hamaxpêr kêt jakamã na pre Tĩrtũm hpãnhã mẽ apê Ijaew kêt xwýnhjê mã amnhĩ to amnhĩrĩt. Ka mẽ ra krĩ piitã hkôt axohtô nê hkôt amnhĩ xunhwý nê hkôt amnhĩ nhĩpêx mex o ri apa. Tã koja Ijaewjaja nhỹrmã amnhĩ kaxyw Tĩrtũm mã hamaxpêr nê mẽ apyrà nê Jejus kôt amnhĩ xunhwýr japêr. Hãmri nê te mēhō hkra kēp htyk nhũm hkaprĩ htã nhũm hkraja tanhmã amnhĩ to nê akupỹm kãm htĩr nhũm kot omunh nê hkĩnh tỳx kumrēxta pyrək o amnhĩ nhĩpêx. Jao Tĩrtũm mẽ kot hkôt amnhĩ xunhwýr ã mẽ omu nê hkĩnh nê. Pu mẽ pahpimràatã urək nê pahkĩnh nê ri papa.

16 E pa mẽ amã mẽ ujarênhja ã ejēp kwý jarē. Koja mẽmo pĩ hpàr jarē mex nê hã koja pàr mex nê xa. Ja pyrà nê Ijaew pàr krax finat Apraãwja kumrēx na pre amnhĩ kaxyw Tĩrtũm mã hamaxpêr nhũm ho hkra. Jakamã koja nhỹrmã hkanrêhã htãmnhwýjaja urək nê amnhĩ kaxyw kãm hamaxpêr nhũm mã mẽ ho anê nê mããnēn mẽ ho

hkra nhũm mẽ mex nê pa. Te kot mẽmo pĩ hpàr jarê mexja nhỹ hã pàr mexta pyràk.

¹⁷ Nê na htem akunĩ kamã mẽmo pĩ hpa jakà nê hamỳ nê ma amnhĩ kôt o mra. Nê ixkre kapem ra mẽ kot mẽmo pĩ hkreja hpa jakàr nê rênh xwỳnh xwakre kamã wam pĩ hpa jakàr xwỳnhhta nhô nê axpên tã hkaxpre nê gaa nê axpên jamỳnh mex nê grà hkêt nê. Nê arĩ htĩr mex nê. Te kêp hpa kumrêx pyràk. Tã Ijaew kwỳ kot amnhĩ kaxyw Jejus kôt hamaxpêr xwỳnhjaja te mẽ kêp ixkre kapem pĩ hpàrta pyràk. No mẽ hkwyjaja mẽ kot Jejus kaga xwỳnhjaja te mẽ kêp mẽ kot kêp hpa jakàr nê rênhta pyràk. Jakamã nhũm Tĩrtũm te mẽ kot pàr pê hpa jakàr nê rênhta pyràk o mẽ hipêx nê mẽ hkaga. Nê axtem te mẽ kot mẽmoj pàr pa jakàr nê hpãnhã kamã axtem pĩ hpa janhôr nê hã hkaxpreta pyràk o mẽ apê Ijaew kêt xwỳnhjê nhĩpêx nê mẽ amã amnhĩ to amnhĩrĩt. Ka mẽ ra amnhĩ kaxyw Jejus mã ajamaxpêr nê hkôt amnhĩ xunhwỳ nhũm Tĩrtũm mẽ ato mex nê.

¹⁸ Tã kêr ka mẽ arĩ Ijaew o mex o ri apa. Tanhmã ri mẽ hipêx to mã ajamaxpêr to hkêt nê. Rỳ ajamaxpêr o:

—Nà ãm hãmri na Tĩrtũm mẽ hkaga nê ãm kãm mẽ papxipixjê japê.

Anhỹr o ajamaxpêr kêt nê. Ijaew te ixkre kapem pĩ hpàr mexta pyràk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nê hã harirta pyràk. Kêt akunĩ rũm pĩ hpa jakàr kukwak ri na hte ixkre kapem pàrta htĩr nê kuhê hkêt nê. Kop apu pàrta mex kêt ronhỹx ra akunĩ rũm hpaja grà pa. Ja pyrà nê Ijaew kukwak ri kot kaj mẽ nhỹrmã Tĩrtũm ri atĩr tũm nê apa ho

apa. Jakamā kwa kêr ka mẽ ate amnhĩ to rũnh o mẽ hakrenh ã amnhĩ to jarkrar kêr nẽ. ¹⁹ Mãn ka mẽ atõ ajamaxpěr o:

—Ra Tĩrtũm kot Ijaew kaga nẽ hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kênã. Anẽ.

²⁰ Nã ãm hãmri na pre Tĩrtũm Ijaew kwý kaga. Mẽ kot Jejus kôt amnhĩ xunhwýr kêt mýrapê na pre te mẽmo pĩ hpa jakàr nẽ rênhta pyræk o mẽ hipêx. Ka mẽ ra mẽ kurom amnhĩ kaxyw hkôt ajamaxpěr jakamã nhũm Tĩrtũm te kot akunĩ kamã pĩ hpa jakàr nẽ ho htẽm nẽ ixkre kapem pĩ hpàr mex ã hanhôr nẽ hã hkaxpre pyræk o mẽ anhĩpêx. Nom kwa kêr ka mẽ ja hã amnhĩ pumu nẽ ri hã Ijaewjê mã amnhĩ to jarkrar kêr nẽ. ãm amnhĩ to mex nẽ Tĩrtũm kapěr kôt amnhĩ nhĩpêx mex o ri apa. No kot kaj mẽ ã amnhĩ nhĩpêx anhýr kêt nhũm amnhĩ tã mẽ apumu nẽ ra kot Ijaew kwý nhĩpêxta pyrã nẽ tanhmã mẽ ato nẽ mẽ akaga.

²¹ ã Ijaew jarẽnh kot anhýr. Te mẽ kêp pàr mex pyræk. Tã nhũm mẽ kot Jejus kôt amnhĩ xunhwýr kêt jakamã nhũm Tĩrtũm te kot pĩ hpa jakàr nẽ rênhta pyræk o mẽ hipêx nẽ mẽ homnuj nẽ. Kot kaj mẽ uræk nẽ ã amnhĩ nhĩpêx anẽ nhũm mã mẽ ato anẽ nẽ. ²² Ijaew kot Jejus kôt amnhĩ xunhwýr kêt jakamã nhũm Tĩrtũm mẽ hpãnhã mẽ apê Ijaew kêt xwýnhjê mã amnhĩ to amnhĩrĩt. Tã ka mẽ Ijaew rom amã Jejus prãm nhũm Tĩrtũm ja hã mẽ apumu nẽ amnhĩ pyrã nẽ kãm mẽ aprãm nẽ mẽ akamã ukapri rãhã nẽ pa ho pa. Tã kwa mẽ okora. Kêr ka mẽ hkôt pix mã amnhĩ nhĩpêx o ri apa rãhã ty. Kot kaj mẽ hkaga nhũm amnhĩ tã mẽ apumu

nê te Ijaew kot hkaga xwÿnhjê nhîpêx pyrâk o mẽ anhîpêx nê mẽ akaga.

²³ Koja Ijaew nhÿrmã Jejus kôt amnhî xunhwÿr japêr nhÿm Tirtÿm ja hã mẽ omu nê mẽ ho hkra. Te mẽ kot pâr pa jakâr nê rênh nhÿm grà par xwÿnh nhÿm kot akupÿm amnhîm hamÿnh nê ixkre kapem pâr wÿr o htêm nê akupÿm hã hanhôr nê hã hkaxpre ho htÿx nhÿm kukwak ri akupÿm htirta pyrâk. Ja kêp tanhmã kute hkêt. Kot ã hipêx anhÿr kaxyw àhpumunh tÿx. ²⁴ Mẽ apê Ijaew kêt xwÿnhjaja te mẽ ate akunî kamã pî hpa jakâr nê ixkre kapem pâr ã hanhôr nê hã kaxpreta pyrâk. Jao Jejus kôt amnhî xunhwÿ nhÿm mẽ ato hkra kurê kumrêx. No Ijaew te mẽ kêp ixkre kapem pârta pyrâk jakamã Tirtÿm kot akupÿm hanhôrta tanhmã kêp kute hkêt. Kêp Tirtÿm kênã kot tanhmã kêp kute. Jakamã koja mẽ hkôt amnhî xunhwÿ nhÿm amnhî tâ mẽ omu nê mẽ ho hkra kurê kumrêx.

*Tirtÿm kot mẽ piitã mẽ kamã ukaprî hã harênh
Matêwre 23.37-39; Rukre 21.24; Juãw 10.16*

²⁵ E kot paj mẽ amã mẽmoj to amnhîrît ka mẽ inhma. Nà na pa ra mẽ amã Ijaew krã xihtÿx xwÿnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhî nhîpêx anhÿr o pa rãhã hkêt nê. Na hte Tirtÿm kormã amnhî tâ mẽ apê Ijaew kêt xwÿnhjê jamâr o pa. Amnepêm na pre amnhî kaxyw mẽ akukamã tanhmã mẽ akwÿjê jarênh to. Tã kot kaj mẽ kot tanhmã mẽ ajarênh to xwÿnh piitã Jejus kôt amnhî xunhwÿr pa nhÿm rî Ijaew amnhî to hapu nê kormã hkôt amnhî xunhwÿ. ã mẽ kot amnhî

nhĩpêx anhÿr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkôt apa hkêt nê. Mẽ pahpyrà nê mẽ kot Jejus kôt amnhĩ xunhwÿr mã xwÿnh kênã. ²⁶ Koja Tĩrtũm nhÿrmã Ijaew piitã ho hkra. Kapêr ã kagà htũm kot mẽ harênh kot:

Nhÿrmã kot mẽ ate amnhĩ tomnuj pê mẽ apytàr mã xwÿnhja Ijaew ò koja.

Jako hkanrêhã htàmnhwÿjê hõ koja.

Koja nhÿrmã wrÿ nê mẽ ate amnhĩ tomnuj pê mẽ apytà nê mẽ ate amnhĩ tomnuj o hapêx pa.
Anê.

Anhÿr o kot harênh. ²⁷ Nê mãânên ja:

Kot paj mẽ nê mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarênh xà hkôt. Anê.

²⁸ Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwÿr pyræk o amnhĩ nhĩpêx. Tã ã mẽ kot amnhĩ nhĩpêx anhÿrja ri ka mẽ kamjaja mẽ hpãnhã mẽ apê Tĩrtũm kra. Nom nhũm Tĩrtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarênh to. Mẽ hpàr kraxjê mã tanhmã mẽ hã amnhĩ jarênh to. Finat Apraãw mẽ Ijak mẽ Jakoja mã mẽ hkanrêhã mẽ htàmnhwÿjê hã tanhmã amnhĩ jarênh to.

²⁹ Na hte Tĩrtũm mẽmoj tã tanhmã amnhĩ jarênh to nê ãm hãmri hã amnhĩ jarê nê amnhĩ jarênh xà hkôt tanhmã hipêx to. No na hte mẽmoj tã amnhĩ jarênh tã gaa nê ho hamakêtkati hkêt nê. Rÿ hpãnhã axtem tanhmã hipêx to hkêt nê. Na hte mẽmoj tã amnhĩ jarênh xà hkôt tanhmã hipêx to. Tã ra amnepê mã kot Ijaew o mex ã amnhĩ jarênh

jakamã koja nhÿrmã mẽ ho mex rax nẽ ã mẽ hipêx anhÿrja o hamakêtkati hkêť nẽ.

³⁰ No mẽ kajaja mẽ apê Ijaew kêt xwÿnhjaja. Amnepêm na ka prem ajaxwÿja Tÿrtũm kêt amnhĩ nhĩpêx kêt nẽ. Tã nhũm mẽ akamã ukapřĩ nẽ kãm mẽ ajapê nẽ. Ka mẽ ra harênh ma nẽ hkôt amnhĩ xunhwÿ nẽ hkôt amnhĩ nhĩpêx mex nẽ. No ãm Ijaew kukwak ri. Mẽ kot kapêr kêt amnhĩ nhĩpêx o pa hkêť jakamã nhũm Tÿrtũm mẽ hpãnhã nhãm mẽ amã amnhĩ to amnhĩřĩt nẽ mẽ ato mex rax nẽ. Jakamã te Ijaew kukwak ri mẽ amex nẽ ri mẽ apa pyrãk. ³¹ Tã koja nhÿrmã kot mẽ anhĩpêxta pyrã nẽ Ijaew ho hkra. Nẽ mẽ apyrã nẽ mẽ kamã ukapřĩ nẽ. Mẽ kot mẽ apyrã nẽ amnhĩ kaxyw Kra hkôt hamaxpêr xwÿnhjaja nhũm mẽ apyrã nẽ mẽ ho hkra nẽ mẽ ho mex nẽ. ³² Mẽ apê Ijaew kêt xwÿnhjaja nẽ mẽ ixpê Ijaew mẽ pahte axpên pyrãk. Na pu htem pahpiitã Tÿrtũm kapêr piitã hkôt amnhĩ nhĩpêx rãhã ho ri papa hkêť nẽ. Tã kot puj mẽ tee ri ja hã amnhĩ pumu nẽ amnhĩ to kuwÿ nhũm mẽ pama nẽ amarĩ mẽ pakamã ukapřĩ nẽ mẽ pahto mex nẽ.

*Pawre kot Tÿrtũm mex o mex ã harênh
Epes 3.20; Korosẽ 1.16; Wam Korĩt 2.9, 2.16*

³³ Tÿrtũmja àhpumunh tÿx o àhpumunh tÿx. Nẽ ukapřĩ ho ukapřĩ nẽ mex o mex. Mẽ pahtõ na pu urãk nẽ ã amnhĩ nhĩpêx anhÿr o papa? Nà amrakati kumrêx. Nẽ mẽ pahtõ na pahte Tÿrtũm jamaxpêr kêt omunh? Nà mẽ pahte hamaxpêr kêt omunh kêt. ³⁴ Kapêr ã kagà htũm kot ja jarênh kot: Mẽ pahte Tÿrtũm jamaxpêr kêt omunh kêt. Nẽ kot pu mẽ pahtõ mẽmoj tã hakre hkêť nẽ.

Mê parom àhpumunh o àhpumunh xwỳnh kênã.

³⁵ Nê mẽ pahťõ kot puj we kãm pakapěr nê kãm:
 “Kwa Tĩrtũm. Ra ixte amã mẽmoj nhõrta
 pãnhã kwa amnhĩ xwar inhmã mẽmoj gõ.”
 Anẽ.

Nà mẽmoj piitã õ kênã kot puj kêt ri ã kãm mẽmoj
 nhõr ã amnhĩ jarẽnh anẽ. Anẽ.

³⁶ Tãm na pre amnhĩ kaxyw mẽmoj piitã ho kator
 pa. Nê ãm pix kukwak ri na mẽmoj piitã htĩr nê pa.
 Jakamã kwa pu mẽ kãm mex o mex ã mãn harẽnh
 rãhã ho ri papa.

12

Mẽ pahte Tĩrtũm mã amnhĩ nhõr ã mẽ pajarẽnh

*Wam Korĩt 6.20; Epes 4.1; Piripos 4.8-9; Korosẽ
 1.10; Wam Tesarõn 4.1-3; Wam Pêtre 2.11*

¹ Kwa Jejus kõt ixkwỳjaja. Tĩrtũm na hte mẽ
 pahťõ mex nê mẽ pakamã ukapĩrĩ rãhã jakamã na
 pa ã mẽ amã ixkapěr anẽ. Kwa mẽ tokyx kãm
 amnhĩ jarẽ nê kãm amnhĩ gõ. Te mẽ ate kãm hkĩnh
 xà nhõr pyrãk o amnhĩ nhĩpêx nê kãm amnhĩ gõ.
 Jao mẽ amã kapěr kõt pix mã amnhĩ nhĩpêx o
 ri apa hprãm ã kãm amnhĩ jarẽ. Nê kãm hprãm
 xà hkõt pix mã tanhmã amã amnhĩ nhĩpêx to ho
 ri apa hprãm ã kãm amnhĩ jarẽ. Kot kaj mẽ ã
 kãm amnhĩ jarẽnh anẽ nhũm amnhĩ tã mẽ ama nê
 hkĩnh nê. ã mẽ pahte kãm amnhĩ jarẽnh anhỳrja na
 kãm mar prãm.

² Nê kêt ka mẽ kãm Tĩrtũm prãm kêt xwỳnhjaja
 kot amnhĩ nhĩpêx o ri amnhĩ nhĩpêx o ri apa hkêt
 nê. Nê mẽ amnhĩ to Tĩrtũm mãn wỳ kê mẽ amã
 mẽ ajamaxpěr mex jagjê. Koja mẽ ama nê mẽ
 amã hagjê ka mẽ ra aprĩ hã hamaxpěr xà hkõt mẽ

pahte amnhĩ to mex xà pumunh mex nẽ. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nẽ hkĩnh nẽ. Pu mẽ pajaxwỳja ỹ hã pahkĩnh nẽ ri papa.

Kris kwỳjaja kot tanhmã axpẽn nhĩpêx to hã mẽ kãm karõ

Rômãn 12.1-11; Epes 4.11-16; Wam Pêtre 4.10-11

³ Nẽ na pre Tĩrtũm ixto mex nẽ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panê amnhĩ nhĩpêx to hã harênh o ri mẽ akôt ixpa kaxyw. Tã na pa ã kagàja kamã mẽ amã harênh anẽ.

Jakamã kwa kêr ka mẽ amnhĩ to jarkrar o ri mẽ kãm apa hkêt nẽ. ãm kwarĩ ho kwarĩ. Rỳ atỳx ri ajamaxpêr o:

—Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nẽ. Kêt mẽ ãm amnhĩ jarênh o:

—Na pa pre amnhĩ kaxyw Jejus kôt ijamaxpêr nhũm Tĩrtũm ixpumu nẽ ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nẽ. Anẽ.

⁴ E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohtôô. Na kamã mẽ pano nẽ mẽ pajakwa. Nẽ kamã mẽ pajamak nẽ mẽ pahte. Na pu htem mẽ pano ho rĩt nẽ mẽ pajakwa ho pakapêr. Nẽ mẽ pajamak o ri ama nẽ mẽ pahte ho ri mra. ⁵ Ja pyrà nẽ Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohtôô. Jakamã na pu

htem ahpÿnhã tanhmã axpën to mex to ho ri papa. Jao Kris kôt axpën to pahtõ nẽ pahtõx o papa.

⁶ Tĩrtũm na hte mẽ pahpê hkwÿ hã ahpÿnhã mẽ pamã tanhmã mẽmoj tã karõ to nẽ kaxyw mẽ pahto mẽ paxihtÿx. Tã kêr pu mẽ ra kot mẽ pamã mẽmoj tã karõ xà hkôt kãm amnhĩ nhĩpêx rãhã ho ri papa. Jakamã koja mēhõ ate Tĩrtũm kapêr jarēnh o ri apa kaxyw axãm nẽ amã anē ka Tĩrtũm kamnàr rom mẽ kãm kapêr jarēnh mex o ri mẽ hkôt apa.

⁷ Rÿ ate akwÿjê mã tanhmã axapēnh to ho ri apa kaxyw axãm ka mẽ kãm axapēnh mex o ri mẽ hkôt apa.

Rÿ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rÿ ate Tĩrtũm kapêr o ri Jejus kôt mẽ akwÿjê jamaxpêr o hihtÿx o ri apa kaxyw axãm ka mẽ kãm kapêr jarēnh pẽ mẽ ho mẽ hihtÿx mex o ri mẽ hkôt apa.

Rÿ ka mẽ atõ akukrêx rax japêr nẽ ate mẽ kêp amrakati xwÿnhjê mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkôt apa.

Rÿ ate akwÿjê ho amnhĩptàr kaxyw axãm ka mẽ ho amnhĩptàr mex o ri apa.

Rÿ ate tanhmã mẽ akwÿjê ho mex to nẽ mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhÿr rãhã ho ri apa nẽ tanhmã akapêr punuj to hkukamã ri ajamaxpêr o ri mẽ hkôt apa hkêt nẽ.

⁹ Nẽ kêr ka mẽ apiitã amã axpën kĩnh kãm axpën to mex rãhã ho ri apa nẽ ri axêx rom amã axpën kĩnh ã amnhĩ jarēnh o ri apa hkêt nẽ. Nẽ mẽ kot

amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa. ¹⁰ Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkôt apa. No mẽ ri atỳx ajamaxpêr o:

—Nà koja mēhō ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê. ¹² Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mēhō tanhmã mẽ ato ka mẽ akaprĩ nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa. ¹³ Nê koja Kris kôt atōjê hō kêp amrakati ka mẽ ja hã omu nê anhō mẽmoj japêr nê mãmri kãm hkwỳ gō. Nê amnhĩ wỳr awỳ nê tanhmã ho mex to.

¹⁴ Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atēm nê kãm tanhmã hã axàmnênh to hkêt nê. Kêt ãm ho Tĩrtũm pix wỳ nê kãm:

—Pa mẽ ijamār mex xwỳnh maati. Nà na ixkwỳjê hōja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhÿr o mǎn mẽ ho awÿ.

¹⁵ Nẽ koja akwÿjê hõ mẽmoj tâ hkĩnh nẽ. Ka omu nẽ uràk nẽ ÿ hã akĩnh nẽ. No koja mẽmoj tâ hkaprĩ nẽ mÿr o nhÿ ka omu nẽ ra uràk nẽ ÿ hã akaprĩ nẽ.

¹⁶ Nẽ kêr ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwÿjê jakrenh o te mẽmoj kamã akahak o amnhĩ nhĩpêx pyràk kêt nẽ. Nẽ axàhpumunh tÿx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nẽ.

¹⁷ Nẽ koja mẽhõ tanhmã ato htã ka âm amnhĩ tâ omu nẽ tanhmã amnhĩ tâ ho hkêt nẽ. Nẽ mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nẽ kêr ka mẽ tãm ri axpên mã akapêr rãhã ho ri apa.

Nẽ kot kaj akràmnhwÿ mẽ wa tanhmã axpên nhĩpêx to. Hãmri ka wa akupÿm tãm axpên xãm kaxyw kãm akapêr tâ nhũm ama nẽ âm ama nẽ akaga. Ka âm amnhĩ tâ omu nẽ kamã agryk kêt nẽ. Koja Tĩrtũm tãm tanhmã atã ho. Kapêr ã kagà htũm kot ja jarẽnh kot:

Kêr ka mẽ amnhĩ tâ tanhmã kot ato xwÿnh to hkêt nẽ. Pa kot paj mẽ atã tanhmã ho. Anẽ.

Nẽ harẽnh kot:

²⁰ Kêr ka mẽ amã mẽ kãm mẽ akurê xwÿnhjê o mex pix o ri apa.

Kê mẽ kãm prãm ka ja hã mẽ omu nẽ mẽ kamã axukaprĩ nẽ mẽ kãm mẽmoj kwÿ gõ kê mẽ kuku.

Rÿ nhũm mẽ kãm kôr ka mẽ kãm gô hkwÿ kê mẽ ho ixkõ.

Kot kaj mẽ ã amnhĩ tâ mẽ hipêx mex anẽ nhũm mẽ tee ri amnhĩ tâ mẽ apumu nẽ amnhĩ kamã

hpijaàm jao mẽ atã amnhĩ kamã gryk nẽ.
Anẽ.

²¹ Nom kot kaj mẽ amnhĩ tã tanhmã mẽ homnuj to hãmri nẽ ajaxwỳja uràk nẽ amnhĩ tomnuj nẽ. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nẽ mẽ apyrà nẽ tãm mẽ anhĩpêx japêr.

E kêr ka mẽ ã axpẽn nhĩpêx o ri apa anẽ.

13

Mẽ pahto amnhĩptàr xwỳnhjê jarẽnh

Matêwre 22.21; Xitre 3.1; Wam Pêtre 2.13-17

¹ Nẽ kêr ka mẽ kot mẽ ato amnhĩptàr xwỳnhjê kapêr ma nẽ kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwỳr kẽnã. Mẽ kot mẽ pahto amnhĩptàr o pa kaxyw na hte mẽ unhwỳ. ² Jakamã koja mẽhõ mẽ kapêr ma nẽ ãm kuma nẽ hkôt amnhĩ nhĩpêx kêt nẽ hãmri nẽ te kot Tĩrtũm kapêr mar nẽ ãm mar pyràk o amnhĩ nhĩpêx. Hãmri nhũm Tĩrtũm tee ri ja hã omu nẽ nhỹrmã tanhmã hã ho.

³ Xà na hte tãm mẽ kot amnhĩ nhĩpêx xwỳnhjaja kãm mẽ kot mẽ ho amnhĩptàr xwỳnhjê pyna ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwỳnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptàr xwỳnhjê pyna hprãm kêt xwỳnhjaja kêr ka mẽ kapêr ma nẽ hkôt amnhĩ nhĩpêx kê amnhĩ tã mẽ apumu nẽ hkĩnh nẽ. Nẽ amnhĩm mẽ ate amnhĩ to mex xwỳnh ã mẽ ajarẽ. ⁴ Tĩrtũm nhỹ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nẽ. Nẽ kot

pu mẽ pahtõ axtem nẽ tanhmã amnhĩ tomnuj to hãmri nhũm tee ri ja hã pajarẽnh ma nẽ tanhmã hã mẽ pahto. ãm hãmri na hte ã mẽ pahto amnhĩptâr xwýnhjaja mẽ panhĩpêx anẽ. Tĩrtũm kãm hprãm xà hkõt. ⁵ Jakamã kwa mẽ kapêr ma nẽ hkõt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkõt ri amnhĩ nhĩpêx kêt nẽ. Mãânẽn ã amnhĩ kukamã ajamaxpêr anẽ nẽ ajamaxpêr o:

—Nà Tĩrtũm kot mẽ ixkaxyw unhwýr jakamã na pa hte kapêr ma nẽ hkõt amnhĩ nhĩpêx mex o ri ixa.

Anhýr o ajamaxpêr.

⁶ Nẽ mẽ pahto amnhĩptâr xwýnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nẽ kugõ. Tanhmã kot ho mẽ pamã mẽmoj to mex to kaxyw. ⁷ Jakamã kêr ka mẽ hã apijaãm o ri apa kamã mãmrĩ mẽ kãm kàxpore hkwȳ ho hkryre nẽ õr o ri apa. Mẽ kot hã àhwýr xà hkõt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nẽ kêr ka mẽhõ ho tewẽn japêr nẽ tokyx kãm amnhĩre. Nẽ mẽ amã axpên kĩnh o aa ho ajamakêtkati hkêt nẽ. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhĩpêx anẽ nẽ Tĩrtũm kapêr piitã hkõt amnhĩ nhĩpêx mex o ri apa.

⁹ Amnepê mã na pre finat Mojesja Tĩrtũm nhỹ hã Ijaew mã mẽmoj tã karõ nẽ mẽ kãm:

Kêr ka mẽ aprõ pix tãnopxa nẽ nhãm mẽnijê hõ kamã ri akurẽ ho apijaàm kêt o apa hkêt nẽ.

Nẽ mẽ anijaja mẽ amjên pix tãnopxa nẽ nhãm ri mẽmyjê hõ kamã akurẽ ho apijaàm kêt o ri apa hkêt nẽ.

Nẽ mẽ ri axpên par kêt nẽ.

Nẽ mẽ ri axpên pẽ axàhkĩnh o ri apa hkêt nẽ.

Nẽ mẽ amã ri axpên kukrêx kĩnh o ri amã ho anhõ hprãm o ri apa hkêt nẽ. Anẽ.

Nẽ mãânẽn ja:

Kêr ka mẽ nhãm mẽ axpên nhĩpêx o te ka amã amnhĩ tã ma pyræk. Jao tãm axpên nhĩpêx o ri apa. Anẽ.

Ã kot mẽ kãm hã karõ kot anhÿr. Kot puj mẽ ã pamã pahkwýjê kĩnh anẽ nẽ mãânẽn wam finat Mojes kot mẽmoj tã mẽ panhĩgêjtjê mã karõ hkôt amnhĩ nhĩpêx o ri papa rãhã nẽ. Jao axpên par kêt nẽ. Nẽ axpên pẽ paxàhkĩnh kêt nẽ. Nẽ axpên kutã panojarêt rãhã nẽ. ¹⁰ Koja mẽhõ kãm amnhĩ tã ma pyræk o hkwyjê nhĩpêx nẽ mẽ ho mex pix o pa. Jakamã kot kaj mẽ amã ri axpên kĩnh nẽ mẽmoj to axpên kutã anojarêt pix nẽ. Jao Tĩrtũm kapêr piitã hkôt amnhĩ nhĩpêx mex o ri apa.

¹¹ Amnepê mã mẽ pahte amnhĩ kaxyw Jejus kôt pajamaxpêr xà hã arĩgrota ã na pre kormã akupÿn mẽ pahwÿr hpôx xà hã arĩgro kormã hwÿr awry rax nẽ. Tã ra hwÿr ahtêp o mõi. Koja tokyx akupÿn mẽ pahwÿr wrÿ nẽ ma akupÿm kaxkwa hwÿr mẽ pahto api. Jakamã kwa kêr pu mẽ arĩ hamãr rãhã ho ri apa. Jao tanhmã amnhĩ tomnuj to kaxyw nẽ pajamaxpêr o:

—Kwa koja Jejus tanhmã amnhĩ to nẽ jarãhã akupÿn wrÿk japêr. Tã kot pa ri ã amnhĩ nhĩpêx anẽ

nhũm wrỳ nê tee ri ja hã ixpumu pa amnhĩ kamã
ixpijaàm tỳx nê. Nà kot paj ã amnhĩ tomnuj anhỹr
kêt nê. Anê.

Hãmri nê Jejus kamã ajamak pê kutêp Tĩrtũm
kapêr kôt pix mã ri amnhĩ nhĩpêx mex rãhã ho ri
papa.

¹² Na pu htem kamàt kãm gõr nê arĩgro jamãr
pê kamã pajamak o panhĩkwỹ. Arĩgro te kêp Jejus
akupỹn wrỳk pyræk. Jakamã kwa pu mẽ kamã
pajamak pê kãm panojarêr rãhã ho ri papa nê
amnhĩ nê tanhmã mẽ omnu xà kute pumunh mex
o ri papa. Te ho pôristi kot amnhĩ nê mẽ kot kãm mẽ
hkurê xwỳnhjê pumunh mex pyræk o Jejus kutêp
tãm amnhĩ nhĩpêx o ri papa. Na pre tanhmã mẽ
pahkrã hto pu mẽ ÿ hã tãm ri amnhĩ nhĩpêx. Tã kêr
pu mẽ arĩ ã amnhĩ nhĩpêx anhỹr o ri papa nê te mẽ
pahte arĩgro hã mẽ pa xwỳnhjê kot amnhĩ nhĩpêx
pyræk o amnhĩ nhĩpêx. ¹³ Kot puj mẽ ã amnhĩ
nhĩpêx anê nê mẽ piitã mẽ noo mã tee ri tanhmã
mẽ pahte amnhĩ tomnuj to mã pajamãxpêr kêt nê.
Jao amnhĩ kamã pahpijaàm nê ri papa hkêt nê. Nê
pajamakêtkati nê paxàmnhĩx ri papa. Te ho hirã
kamã ri mẽ pa xwỳnhjê kot amnhĩ nhĩpêx pyrã nê
ãm ri paxàmnhĩx tãm amnhĩ nhĩpêx o ri papa.

Nê mẽ pahprõ pix tãnopxar o ri papa.

Nê mẽ pahpipãnh nê ri papijapu ho ri papa hkêt
nê.

Nê mẽmoj tã axpên mã paxàkjêr hkêt nê.

Nê mẽmoj tã axpên kãm pagryk kêt nê.

¹⁴ Nom kot puj mẽ axtem nê ã amnhĩ tomnuj anê
nê mẽ pahte amnhĩ nhĩpêx tũm kôt pix mã amnhĩ
nhĩpêx. Tã kêr pu mẽ ã amnhĩ nhĩpêx anhỹr pumaj
hpãnhã amnhĩ to Pahihti Jejus Kris wỳ nê kãm:

—Pa Jejus. Nà kormã jar apa ri na ka pre mẽ kot tanhmã amnhĩ tomnuj to kutã axihtỳx o axihtỳx nẽ aa tanhmã amnhĩ tomnuj to hkêt nẽ. Tã inhmã apyrà nẽ ixte amnhĩ tomnuj kutã ixihtỳx o ixihtỳx o ixpa hprãm. Anẽ.

Jao mẽ pajamaxpěr tũmja te ra kot amnhĩ tã mẽ pahto htỳx kêt pyràk o pu mẽ amnhĩ nhĩpêx o ri papa.

14

Mẽ pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Römãn 2.1; Wam Korĩt 10.23-33; Xiakre 4.11

¹ Nẽ koja mẽhõ kormã Jejus kôt amnhĩ xãm nyw ri kormã hkôt hamaxpěr tohtuj anẽ. Hãmri nẽ htỳx tanhmã hamaxpěr to nẽ mẽmoj mex kaga. Ka mẽ ja hã omu nẽ ãm omu nẽ hã tanhmã kãm nẽ hkêt nẽ. Kwãr mãmrĩ ã amnhĩ nhĩpêx anẽ. Koja gaa nẽ rĩ hprĩ hã Tirtũm kapêr mar tỳx nẽ hãmri nẽ hkôt mẽmojta pumunh mex nẽ. ² Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harẽ nẽ hkaga nẽ hamaxpěr o:

—Nà kot pa ja hkur kêt nẽ. Kot pa apu kuku nẽ hkur o amnhĩ tomnuj nẽ. Anẽ.

Kwãr mãmrĩ ã hamaxpěr anẽ nẽ hkur kêt nẽ. Nom mẽ pahte Jejus kôt amnhĩ xunhwỳr tỳx xwỳnhjaja na pu htem paxàmnhĩx Jejus kamnàr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwỳr xwỳnhjaja kormã kapêr piitã mar kêt jakamã kwãr mẽ mãmrĩ anẽ nẽ mẽmoj kur kêt nẽ. ³ Nom kêr ka mẽ ri tanhmã hã mẽ kãm akapêr to hkêt nẽ. Rỳ mẽ kãm:

—Kwa mẽ ixpyrà nẽ mẽmoj piitã aku.

Anhÿr o mẽ kãm akapër kêt nẽ. Ano ho ãm hã mẽ omu.

Nẽ mẽ ate mẽmoj piitã hkur kêt xwÿnhjaja kêt ka mẽ ajaxwÿja mẽ ixte mẽmoj piitã hkur ã tanhmã mẽ inhmã axàkjêr to hkêt nẽ. Mẽ ixte mẽmoj piitã hkur o ixpa hã mẽ ixpumu nẽ ãm hã mẽ ixpumu nẽ hã tanhmã mẽ inhmã axàkjêr to hkêt nẽ. Rÿ hã mẽ inhmã:

—Kwa nà kot kaj mẽ ja kur o amnhĩ tomnuj nẽ.

Anhÿr o hã mẽ inhmã akapër kêt nẽ. Ano ho ãm ja hã mẽ ixpumu. Mẽ pahte ahpÿnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwÿr xwÿnh piitã mẽ pahto hkra kênã. ⁴Jakamã kwa mẽmoj tã tanhmã axpẽn mã axàkjêr to ho ri apa hkêt nẽ. Koja Kris kôt atõjê hõ axtem tanhmã hamaxpër to ka mẽ tee ri ja hã omu nẽ tanhmã hã kãm nẽ hkêt nẽ. Rÿ ajamaxpër o:

—Tk. Na hte ã ri amnhĩ nhĩpêx anhÿr o pa. Ja omnuj. Pa na pa hte ã amnhĩ nhĩpêx anhÿr kêt nẽ.

Anhÿr o ri axpẽn kukamã ajamaxpër hkêt nẽ. Mẽ pahpê Tĩrtũm kêt kênã kot pu kêt mẽ ã ri axpẽn kukamã pajamaxpër anẽ. Tĩrtũm pix na hte tanhmã mẽ pajarênh to xwÿnh. àhpumunh o àhpumunh xwÿnh jakamã koja tanhmã mẽ hkrã hto nhũm mẽ rĩ kormã tãm hamaxpër pê àmnhĩx ri tanhmã amnhĩ nhĩpêx to ho pa.

⁵Nẽ koja Jejus kôt atõjê hõ mẽmo arĩgromnu jarẽ nẽ hã àpênh kêt nẽ. Ka mẽ apê hkwyjaja tee ri ja hã omu nẽ ajamaxpër o:

—Nà arĩgro piitã mẽ pamã mex kênã. Kot paj mãmrĩ arĩgro piitã hã apê.

Anhÿr o ajamaxpêr japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpÿnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê. ⁶ Kêt mẽ kot arĩgromnu jarênh xwÿnhjê mẽ mẽ pahte arĩgro piitã mex ã harênh xwÿnhjaja mẽ pahpiitã mẽ pahpê Tirtũm kraa. Jakamã mẽ pahpiitã na pu htem pajamaxpêr o:

—Na pa hte Tirtũm kãm hprãm xà hkôt ã amnhĩ nhĩpêx anhÿr o ri ixpa. Anê.

Nê mẽ pahte mẽmoj piitã hkur xwÿnhjaja nê mẽ kot mẽmoj kwÿ hkur kêt xwÿnh piitã mẽ pahpê Tirtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tirtũm mã amnhĩ jarê nê kãm:

—Pa mẽ ijamär mex xwÿnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tirtũm.

Anhÿr o kãm amnhĩ jarê. Hãmri nê kormã hkamnär rom paxàmnhĩx ri tanhmã mẽõ kuteta ku. ⁷⁻⁸ Mẽ pahpê Tirtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt. ⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupÿm htĩr. Kêp mẽ panhõ Pahihti hã akupÿm htĩr. Kêp mẽ pahte hkôt amnhĩ xunhwÿr xwÿnhjê nhõ Pahihti kaxyw. Jakamã kêp ra mẽ pahkwÿ htyk xwÿnhjê

nhõ Pahihti nẽ mããnẽn kêp arĩ mẽ pahtĩr xwỳnhjê
nhõ Pahihti. ¹⁰ No mẽ papajaja mẽ pahpê Kris
kôt mẽ pahkwỳjê nhõ pahi hkêt jakamã kêr mẽ
Kris kôt akwỳjê hõ tanhmã amnhĩ nhĩpêx to hã
omu hãmri nẽ tanhmã ho akapêr to hkêt nẽ. Rỳ
ajamaxpêr o:

—Kwa na ã amnhĩ nhĩpêx anẽ. Inhmã ja mex kêt.

Anhỹr o ajamaxpêr kêt nẽ. Koja nhỹrmã Tĩrtũm
tãm mẽ pahpiitã tanhmã mẽ pahte amnhĩ nhĩpêx
to hã mẽ pahpumunh xà hkôt tanhmã mẽ pa-
jarênh to. Nom kêr pu mẽ papajaja amnhĩ hkrã
hkôt ã axpẽn jarênh anhỹr kêt nẽ. ¹¹⁻¹² Kot puj
mẽ nhỹrmã pahpiitã Tĩrtũm kutã pahkrĩ nẽ kãm
tanhmã amnhĩ jarênh to. Kormã mẽ pahtĩr ri
tanhmã mẽ pahte amnhĩ nhĩpêx to ho papa hã kãm
pahprĩ hã amnhĩ jarê. Kê mẽ pama nẽ tanhmã mẽ
pajarênh to. Kapêr ã kagà htũm kot mẽ pakukamã
mẽ pajarênh kot:

Koja nhỹrmã mẽ piitã ixpê mẽ õ pahi hã ixkutã
hkõn krã ho rôrôk nẽ hkrĩ nẽ inhmã inhmex
o inhmex ã ijarê.

Nẽ mẽ piitã ixpê Tĩrtũm ã ixpyxi mex ã ijarê. ãm
hãmri na pa ã mẽ hkukamã mẽ harênh anẽ.
Anẽ.

*Mẽ pahte Kris kôt pahkwỳjê ho mex ã mẽ pamã
karõ*

Wam Korĩt 8.9-13

¹³ Nẽ kwa kêr ka mẽ akwỳ kot Jejus kôt amnhĩ
xunhwỳr tohtuj anhỹr xwỳnhjaja tanhmã mẽ kot
amnhĩ nhĩpêx to ho pa hã mẽ omu nẽ ja nê tanhmã
mẽ kãm akapêr to hkêt nẽ. ãm mẽ noo mã tãm
ri amnhĩ nhĩpêx rãhã ho ri apa. Mẽ kot ja hã mẽ
apumunh nẽ mẽ akôt amnhĩ nhĩpêx kaxyw. No kot

ka mẽ kot tanhmã amnhĩ nhĩpêx toja ã kãm akapêr nhũm ama nê tee ri amnhĩ kukamã hamaxpêr nê hkaprĩ nê.

¹⁴ E kot pa hpãnhã mẽ paxàpkur xà hã tanhmã mẽ panhõ jarênh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatàt kôt mẽ amã tanhmã mẽ panhõ jarênh to nê ãm hãmri harê. Nà mẽ paxàpkur xàja ãm pixi nê omnu hkêt. Piitã mex o mex. Nom koja mēhõ tee ri mẽmo mẽ apkur xà hõ pumu nê hamaxpêr o:

—Nà kot paj ja hkur kêt nê. Kot paj apu kuku nê ho amnhĩ tomnuj nê. Anê.

Hãmri nê hkur kêt nê. Tã kwãr mãmri ã hamaxpêr anê nê hkur kêt nê. Nom na ãm amnhĩ krã hkôt Tĩrtũm kêp ja omnuj ã hkamnhĩx. Kêp omnuj kêt. Ra kot mẽmo mẽ paxàpkur xà piitã mex ã harênh. ¹⁵ Tã kot kaj mẽ kot mẽmoj kur kêt xwỳnh ta py nê o tẽ nê kot hkaga xwỳnh noo mã hkur o xa nhũm apumu nê tee ri hamaxpêr nê hkaprĩ nê. Jakamã kot ka mẽ ã noo mã amnhĩ nhĩpêx anhỹrja o ho mex kêt nê. Kwa mẽ ã ri axpên nhĩpêx anhỹr hkêt nê. Kot ka mẽ ã axpên nhĩpêx anê nê te amnhĩ pix kukamã ajamaxpêr pyrãk o amnhĩ nhĩpêx. Jao akwỳjê ho mex kukamã ajamaxpêr kêt nê. Kris kãm mẽ hapê htỳx kôt mẽ kot amnhĩ tomnuj pãnhã amnhĩrer kaxyw ra nê htyk kênã kot ka kêt mẽ axtem nê ri ã mẽ noo mã mẽ kot mẽmoj kur kêêta kur anê. Rỳ koja apu tee ri kot mẽmoj kur kêêta kur ã mẽ apumu nê tanhmã amnhĩ tomnuj to. Jao Kris kaga japêr. Jakamã kwa mẽ ã mẽ noo mã mẽmojta kur kêt nê. ¹⁶ Mẽmo mẽ apkur xàja mex tã nhũm mẽ akwỳjê hõ kãm mex kêt japêr ka mẽ noo mã hkur kêt

ně. Ně tanhmã hã kãm ně hkêt ně. Kot kaj mẽ aně nhũm Kris kra hkêt xwỳnhjaja tee ri ja hã mẽ apumu ně tanhmã axpẽn mã mẽ apê Kris kwỳjê ho kapêr punuj to. ¹⁷ Mẽ pahpê Tĩrtũm krajaja na pu htem paxàpkur xà ně pahkõm xà pix kukamã pajamaxpêr o ri papa hkêt ně. Na pu htem amnhĩ mẽ pahkwỳjê mex kukamã pajamaxpêr. Ně mẽ pahte tãm amnhĩ nhĩpêx kukamã pajamaxpêr. Ně tãm axpẽn nhĩpêx kukamã pajamaxpêr. Kot puj mẽ ã amnhĩ nhĩpêx aně nhũm Tĩrtũm Karõ ja hã mẽ pahpumu ně mẽ pahto mẽ pahkĩnh ně. Pu mẽ pahkĩnh ně pajamakêtkati ně ri axpẽn kôt papa. ¹⁸ Tã kot puj mẽ ã Kris mã tanhmã amnhĩ nhĩpêx to ho ri papa aně nhũm Tĩrtũm ja hã mẽ pahpumu nhũm ja kãm mex ně. Ně Kris kôt mẽ pahkwỳjê mã haxwỳja ja mex ně.

¹⁹ Jakamã kêr pu mẽ tãm axpẽn mã pakapêr o ri papa. Ně pajamakêtkati ně axpẽn kôt ri pajapôj. Ně Kris kôt tanhmã axpẽn to paxihtỳx to ho ri papa. ²⁰ No kot ka mẽ axàpkur xà gryk ã akwỳ hkukamã ajamaxpêr kêt ně atỳx ri mẽhõ noo mã mẽmoj kur japêr. Kêp omnuj tã ka mẽ ãm amnhĩ pix kukamã ajamaxpêr ně noo mã hkur japêr. Hãmri nhũm ja hã mẽ apumu ně ra kot Tĩrtũm kaga mã. Ra kêp hkra jakamã kwa mẽ noo mã mẽ kot mẽmoj punuj ã harênh xwỳnhhta kur kêt ně. Nom mẽ paxàpkur xàja piitã mex. Tĩrtũm kot mẽ pamã õr jakamã piitã mẽ panhõõ. Tã koja akwỳjê hõ Tĩrtũm kêp mẽmoj omnuj ã hkamnhĩx tã ka mẽ noo mã aku ně ho amnhĩ tomnuj ně. ²¹ Kêr pu mẽ pahkwỳjaja tanhmã kot amnhĩ tomnuj to pymaj pu mẽ pahte amnhĩ nhĩpêx kukamã pajamaxpêr mex o papa.

Mëmo mëõ nẽ mëmo kagô pê wĩhtija. Tĩrtũm kot mẽ pamã mëmoj piitã õr tã no nhũm mẽ pahkwỳjaja kêp ja omnuj nẽ pu mẽ noo mã hkur rỳ ho pahkõm kêt nẽ. Mëmo mry nẽ mëmo wĩhti pu mẽ noo mã hkur rỳ ho pahkõm kêt nẽ.

²² Nẽ kêr ka mẽ atõ mëmoj krêr kaxyw nẽ hkukamã ajamexpêr o:

—Nà kot paj ja krê. Tĩrtũm kãm ja mex kênã. Anẽ.

Hãmri nẽ mãmrĩ Tĩrtũm kamnàr rom axàmnhĩx akrê. Kãm ja mex kênã kot ka kêt ri tee ri hkrêr kaxyw hkukamã ajamexpêr nẽ hkaga. ²³ No kot kaj mẽ atõ mëmoj to anhỳr kaxyw nẽ tee ri amnhĩ kukamã ajamexpêr nẽ ajamexpêr o:

—Ko kot paj apu ja ho anẽ nhũm Tĩrtũm hã ixpumu nhũm ja kêp omnuj nẽ rỳ ko. Anẽ.

Hãmri nẽ tee ri amnhĩ kukamã ajamexpêr. Tã ra ã amnhĩ nhĩpêx anẽ nẽ akrê rỳ mëmoj to anẽ. Hãmri nhũm Tĩrtũm tee ri ã ate amnhĩ nhĩpêx anhỳr ã apumu nhũm ja kêp omnuj nẽ. Ate hkamnàr rom mëmoj to anhỳr kêt nẽ amarĩ amnhĩ krã hkôt ho anhỳr jakamã ho amnhĩ tomnuj nẽ.

15

Mẽ pahte amnhĩ pix kukamã pajamexpêr kêt ã mẽ pamã karõ

Makre 10.45; Wam Korĩt 10.24; Piripos 2.3-5

¹ Nẽ kêr pu mẽ pahte ra Jejus kôt amnhĩ xunhwỳr tỳx xwỳnhjaja amnhĩ kôt kormã mẽ kot Jejus kôt amnhĩ xunhwỳr totuj janhỳr xwỳnhjê jamàr mex nẽ. Jao mẽ kamã pagryk tokyx anhỳr kêt nẽ. Æm mẽ kutã panojarêr pix o papa. Jao ra amnhĩ pix kukamã pajamexpêr kêt nẽ. ² Mããnẽn

amnhĩ mẽ Kris kôt mẽ pahkwỳjê hkukamã mãn mẽ pajamaxpěr. Jao mẽ kot tãm amnhĩ nhĩpêx kaxyw mẽ ho mex o ri papa. ³ Kris na pre jar pa ri amnhĩ pix kukamã hamaxpěr kêt nê. Na pre mãănên ò Papaj kukamã hamaxpěr. Jakamã Tĩrtũm kapěr ã kagà htũm kot kãm kapěr jarēnh kot:

Pa Papaj. Na hte mẽ pahkurê xwỳnhjaja ixto kapěr punuj nê. Nom mãănên ã ato kapěr o pa anê.
Anê.

⁴ Mẽ pakaxyw na Tĩrtũm kapěr ã kagàja. Mẽ pahte kamã harēnh nê mar nê amnhĩ kaxyw hkôt pajamaxpěr tỳx o ri papa kaxyw. Jakamã na pu htem tanhmã pahpunuj to htã kapěr kwỳ ma nê pahkĩnh nê. Jao tee ri amnhĩ kukamã pajamaxpěr o ri pahkaprĩ hkêt nê. ãm nhỹrmã Tĩrtũm kot mẽ pahto mex kukamã pajamaxpěr o akupỹm paxi-htỳx nê pahkĩnh nê ri papa. Mẽ pahkĩnh nê ri papa kaxyw na Tĩrtũm kapěr ã kagàja. ⁵⁻⁶ Na pu htem Tĩrtũm kamnàr rom pahkĩnh nê. Nê axpẽn kamã paxukaprĩ ho ri papa. Jakamã na pa hte tanhmã mẽ ato Tĩrtũm wỳr to nê kãm:

—Pa Tĩrtũm. Apê mẽ ijamãr xwỳnh maati na ka. Nê apê mẽ inhõ Pahihti Jesus Kris nhõ Papaj na ka. Nà xep ra Rõm nhõ xwỳnh kwỳjaja kãm akapěr kôt amnhĩ nhĩpêx prãm jakamã kwa tanhmã mẽ hkrã ho mex to kê mẽ hamakêtkati nê ajamaxpěr kôt hamaxpěr rãhã ho ri akôt pa. Hãmri nhũm mẽ amnhĩ tã apumu nê piitã amex o amex ã ajarê.

Anhỹr o pa hte mẽ ato kuwỳ.

*Ijaew kêt xwỳnhjê jarēnh
Atre 10.34; Römãn 9.24; Karatas 3.28*

⁷ Nê kwa kêr ka mẽ amã axpên tâ ma ho ri apa. Te ho Kris kãm mẽ pahtã mata pyræk. Jao axpên to mex pix o apa. Kot kaj mẽ ã axpên nhĩpêx anê nhũm mẽ piitã axpên tâ mẽ apumu nê mẽ anhỹ hã Tĩrtũm mã mex o mex ã harê.

⁸ Amnepêm Tĩrtũm Ijaew mã tanhmã Kris jarênh to. Kormã pika hwỳr wrỳk kêr ri nhũm hkukamã nhỹrmã mẽ hwỳr wrỳk nê mẽ kamã kator ã harê.

Tã nhũm mẽ hwỳr wrỳ nê mẽ kamã kato. Ijaew hkanrêhã htãmnhwỳjê kamã kato nê mẽ ho mex o ri mẽ hkôt pa. Mẽ kot amnhĩ tâ omunh nê ã hamaxpêr anhỹr kaxyw. Nê hamaxpêr o:

—Amnepêm Tĩrtũm kot mẽ panhĩgêr mã hkukamã harênh xà hkôt na mẽ ixwỳr Kraja mẽ nhũm wrỳ nê mẽ ixto mex o ri pa. Nà ãm hãmri na pre mẽ ixwỳr kumê.

Anhỹr o hamaxpêr kaxyw. ⁹ Nê mẽ apê Ijaew kêr xwỳnhjaja mẽ ajaxwỳja mẽ ate tanhmã kot amnhĩ nhĩpêx to hã harênh mar nê Tĩrtũm mã mex o mex ã harênh kaxyw. Nê Tĩrtũm kot mẽ akamã ukapĩ hã mẽ ate amnhĩ tâ omunh nê mẽ mex o mex ã harênh kaxyw na pre wrỳ. Tĩrtũm kapêr ã kagà htũm kot tanhmã mẽ ixpê Ijaew jarênh to nê mããnên tanhmã mẽ apê Ijaew kêr xwỳnhjê jarênh to nê mẽ pajarênh kot:

Kot paj Ijaew kêr xwỳnhjê jamak mã amã amex ã ajarênh o ri mẽ hkôt ixpa.

Nê amex ã inhgrer o ri mẽ hkôt ixpa. Anê.

¹⁰ Nê ja:

Kwa mẽ apê Ijaew kêr xwỳnh mẽ mẽ apê Ijaew. Kêr ka mẽ apiitã Tĩrtũm nhỹ hã akĩnh nê ri apa. Anê.

¹¹ Nê mããnên ja:

E kêr ka mẽ apê Ijaew kêr xwỳnhjaja nê krĩ piitã
hkôt mẽ apa xwỳnhjaja mẽ apiitã Tĩrtũm mã
mex o mex ã harênh o ri apa.

Anhỹr o kot harênh. ¹² Nê Tĩrtũm nhỹ hã kapêr o pa
xwỳnh finat Ijais haxwỳja Ijaew mã Jejus jarênh o:
Koja nhỹrmã Jese kanrêhã htàmnhwỳjê hõja mẽ
pahwỳr kato.

Hãmri nê mẽ pahpê Ijaew mẽ Ijaew kêr xwỳnhjê ho
amnhĩptàr o pa.

Jakamã nhũm mẽ amnhĩ kaxyw hkôt hamaxpêr o
pa. Anê.

¹³ Nê na pa hte tanhmã mẽ ato Tĩrtũm wỳr to ho ri
ixpa nê kãm:

—Pa Tĩrtũm. Kwa kêr ka Rôm nhõ xwỳnhjê ho
mex kê mẽ amnhĩ kaxyw Akra hkôt hamaxpêr
mex o ri pa. Jao hkôt hkĩnh nê hamakêtkati nê ri
axpên to pa. Nê kê Akarõ mẽ ho mẽ hihtỳx o pa kê
mẽ amnhĩ kaxyw amã mãn hamaxpêr tỳx rãhã ho
ri pa. Anê.

Pawre kot hprĩ hã amnhĩ jarênh

Sikũn Pêtre 1.12-13

¹⁴ E Kris kôt ixkwỳjaja. Nà ra ixte mẽ ajarênh
mar mex. Na ka xep htem amnhĩ to mex o ri
apa. Nê mẽmoj to axpên kutã anojarêr rãhã ho ri
apa. Nê mẽ kot tanhmã Tĩrtũm kapêr kôt amnhĩ
nhĩpêx to xàja ka mẽ omunh mex nê ho axpên
jahkre ho ri apa. ¹⁵ Tã ot pa kagà ja kamã mẽ
amã ixujarênh kãm ixihtỳx nê. Tĩrtũm nhỹ hã.
Ra mẽ ate mẽmoj mar mex tã pa axte mẽ amã
harê. Mẽ ate mar tỳx nê hã anohtỳx kaxyw. Nà
ã ixte amnhĩ nhĩpêx anhỹr kaxyw na pre Tĩrtũm
mẽ akaxyw ixãm. ¹⁶ Ixte Jejus Kris mã mẽ apê

Ijaew kêt xwỳnhjê mã kapêr jarênh o ri mẽ akôt ixpa kaxyw. Nê mẽ ato hwỳr o ri ixpa kaxyw. Tã pa hte krĩ hkwỳ kamã ã mẽ akwỳjê mã harênh anhỳr o ri mẽ hkôt ixpa. Nê Jejus jarênhja pa hte mẽ hkôt mẽ kãm harênh o ri ixpa. Mẽ kot mar nê hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nê nhũm hkĩnh nê hamaxpêr o:

—Nà ãm hãmri. Koja mẽ nhỹrmã wa ixri htĩr tũm nê mex nê pa ho pa. Anê.

¹⁷ Tã na pa ixte Jejus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nê ixkĩnh nê. ¹⁸⁻¹⁹ Na pa hte ã hã mẽ apê Ijaew kêt xwỳnhjê mã Tĩrtũm kapêr jarênh o ri mẽ akôt ixpa. Nê mẽ anoo mã tanhmã ri Kris kot mẽ amã amnhĩ nhĩpêx to hã harê. Nê mẽ amã aa mẽ kot mẽmoj pumunh kêt kwỳ ho anhỳr o ri mẽ akôt ixpa. Tĩrtũm Karõ nhỹ hã. Nhũm hte mẽ akwỳjaja amnhĩ jaêr pê omu nê kamã no pyma nê. Hãmri nê mẽ pahpyrà nê Jejus kôt amnhĩ xunhwỳ. Nom pa hte ã amnhĩ nhĩpêx anhỳr ã amnhĩ pumu nê ri hã amnhĩ to jarkrar kêt nê. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wỳr krĩ piitã hkôt mẽ kãm Kris kapêr jarê. Tĩrtũm Karõ kot tanhmã ixto hihtỳx to jakamã pa mẽ piitã mẽ kãm harênh mex nê. ²⁰ Na pa hte mẽ hwỳr inhnojarêt nê ã ijamaxpêr anê nê ijamaxpêr o:

—Kormã mẽ kot Kris jarênh mar kêt xwỳnhjê hwỳr kot paj mỗ. Nom ra mẽ kot harênh mar xwỳnhjê nhỗ krĩ hwỳr inhmõrja inhmã prãm kêt.

Aně.

²¹ Tĩrtũm kapěr ã kagà htũm kot kapěr mar kêt xwỳnhjê jarěnh kot:

Kormã mẽ kot Tĩrtũm kapěr mar kêt xwỳnhjaja koja mẽ kuma ně hprĩ hã mar tỳx ně. Aně.

Pawre kot Rõm wỳr hkrà hã amnhĩ jarěnh

Rõmãn 1.8-15

²² Hêxta waa ně. Inhmã mẽ apumunh prãm tỳx ně Rõm kãm Jesus kôt ixkwỳjaja. Na pa hte xatã mẽ awỳr ixkrà nom kormã mẽ awỳr inhmõr kêt ně. Kormã ixte krĩ hkwỳ kamã mẽ kãm Kris jarěnh o ri ixpa jakamã kormã mẽ awỳr inhmõr kêt ně. ²³ Na pa ra xatã mẽ awỳr ixkrà hã ixtã amgrà xohtô ně. Tã ra jar mẽ kãm Kris kot mẽ panê tanhmã amnhĩ nhĩpêx toja jarěnh pa. ²⁴ Jakamã kot paj tokyx ma mẽ awỳr mỗ. Hãmri ně mẽ awỳr pøj pu mẽ axpẽn pumu ně pahkĩnh ně axpẽn mã pakapěr o papa. Pa mẽ akôt ri ixpa tãmtã hamũ pyka pê Espãnhã wỳr ma mỗ. Ně kot paj inhnojarêt ka mẽ ixto Tĩrtũm wỳ ně inhmã ixàpkur xà hkwỳ gô pa ma mẽ hwỳr pry hã hkur o mỗ.

²⁵⁻²⁶ No na pa kormã mẽ awỳr inhnojarêt kêt ně. Kot paj ja rũm awjanã ně akupỹm Jerujarẽ hwỳr mỗ. Kamã Kris kôt mẽ pahkwỳjaja kệp amrakati ně ri pa nhũm pika pê Gres mẽ Masetõn kamã Kris kôt mẽ pahkwỳjaja mẽ harěnh ma ně mẽ kãm kàxpore hkwỳ ho akuprõ ně mẽ kaxyw inhmã kugõ. Tã kot paj ma mẽ hwỳr o mỗ ně mẽ kãm kure ně rĩ kormã ma mẽ awỳr mỗ. ²⁷ Jerujarẽ kamã Kris kôt mẽ pahkwỳjaja Ijaew na mẽ. Mẽ kumrêx na prem Kris kôt amnhĩ xunhwỳ. Hãmri nhũm mẽ hkwỳjaja ma mẽ apê Ijaew kêt xwỳnhjê mã kapěr jarěnh o ri

mê akwỳ hkôt pa. Hãmri nhũm pika pê Gres kamã mẽ pa xwỳnhjaja mẽ kapēr ma nẽ mẽ uràk nẽ Kris kôt amnhĩ xunhwỳr kurê kumrêx. Jakamã amnhĩ xwar kãm nhãm krĩ hõ kamã Kris kôt mẽ pahkwỳjê ho mex prãm nẽ. Hãmri mẽ kãm kàxpore hkwỳ ho akuprõ nẽ mẽ kaxyw inhmã kugõ.

28-29 Tã kot paj ma Jerujarẽ hwỳr mẽ kãm o mõ nẽ mẽ kãm kure hãmri nẽ awjanã nẽ rĩ kormã ma Rõm wỳr mẽ awỳr mõ. Hãmri nẽ mẽ awỳr pøj pu mẽ axpẽn pumu nẽ pahkĩnh nẽ. Nẽ axpẽn mã Jejus Kris mex o mex ã harẽ nẽ kãm tanhmã amnhĩ jarẽnh to ho papa. Jao pahkĩnh nẽ papa. Tã pa hpãnhã hamũ ma Espãnhã wỳr mõ.

30 Nẽ na pu prem Jejus Kris o panhõ Pahihti. Jao te mẽ pahpê hkôt axpẽn to pahtõ nẽ pahtõx pyràk o axpẽn nhĩpêx. Nẽ Karõ nhỹ hã pamã axpẽn kĩnh nẽ. Jakamã kwa Jejus kôt ixkwỳjaja. Kêr ka mẽ ixpê mẽ atõ hã ixto Tĩrtũm wỳr kãm axihtỳx nẽ. 31 Kêr pa ma pyka pê Jutej kamã Jerujarẽ kamã Kris kôt mẽ pahkwỳjê hwỳr mõ nẽ mẽ kãm kàxporeta gõ nhũm mẽ omu nẽ Ijaew kêt xwỳnhjê kot mẽ kãm õr ã mẽ omunh tã tee ri hamaxpêr kêt nẽ. ãm hkĩnh kãm mãmri ãmnhĩx hamỳ nẽ ho amnhĩm awjaprõ.

Nẽ kêr ka mẽ ixto awỳ kê inhnê mẽ kêp mẽ pahkwỳ hkêt xwỳnhjê pumunh mex nẽ.

32 E kêr ka mẽ ã ixto Tĩrtũm wỳr anẽ. Kê ixte ma Jerujarẽ rũm ma Rõm wỳr pàr kãm inhmõrta ã kê ixpumunh mex nẽ. Pa inhmex pê mẽ kurũm ma mẽ awỳr mõn pøj pu mẽ tokyx axpẽn pumu nẽ pahkĩnh nẽ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nẽ ixkĩnh nẽ. 33 Tã ãm ja pix. Kê Tĩrtũm mẽ akôt pa

ho pa. Tãm na hte tanhmã mẽ pahto pu mẽ ÿ hã pajamakêtkati paxàmnhĩx ri pahkĩnh nẽ ri papa.

16

Pawre kot ahpỹnhã hkràmnhwỳjê mã kapêr

¹ Ku nẽ mããnẽn ja. Ot pa mẽ awỳr Kris kôt pahtõx Pepreja mẽ awỳr kumẽ. Na hte krĩ pê Sẽnkrej kamã Kris kôt mẽ pahkwỳjê tanhmã mẽ ho mex to ho ri mẽ hkôt pa. ² Nẽ mããnẽn pa na hte tanhmã ixto mex to. Tã kê mẽmo arĩgro hã mẽ awỳr pøj ka mẽ kêp Kris kôt mẽ pahtõx ã omu nẽ ho mex nẽ tanhmã ho ajuta hto.

³ Nẽ kêr ka mẽ atar Kris kôt ixkràmnhwỳjê mã ijarẽ. Na pa hte mẽ kãm ijamaxpêr rãhã ho ri ixpa. Nẽ Akirti mẽ hprõ Prisireta ka mẽ wa kãm ijarẽ. Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa. ⁴ Jao wa amnhĩ grõnh kôt mẽ kãm ixkurê xwỳnhjê pê ixpytã. Pa amnhĩ tã wa omu nẽ inhmã wa hkĩnh nẽ. No ãm papxipix inhmã wa hkĩnh kêt nẽ. Na pre Ijaew kêt xwỳnh kwỳ pê Kris kwỳjaja ixtã wa harẽn ma nẽ haxwỳja kãm wa hkĩnh nẽ.

⁵ Nẽ na hte Kris kwỳjaja wa õrkwỹ kamã axpẽn wỳr akuprõ. Mẽ kot Tĩrtũm mã amnhĩ jarẽn nẽ kapêr ã kagã hkwỳ mar kaxyw axpẽn wỳr akuprõ. Tã kêr ka mẽ mẽ kãm ijarẽ.

Nẽ Kris kôt mẽ pahtõ Epẽnre mã ijarẽ. Kêp ixkràmnhwỳ mex na. Inhmã hkĩnh. Kumrẽx na pre jar pika pê As kamã amnhĩ kaxyw Kris kôt hamaxpêr nẽ hkôt amnhĩ xãm.

⁶ Nẽ Kris kôt mẽ pahtõx Marir ka mẽ kãm ijarẽ. Na xep hte tanhmã mẽ ato mex to rũnh o pa.

7 Nê Kris kôt mẽ pahtõ ãrõhti mẽ Jũhti wa kãm ijarẽ. Ixpyrà nẽ wa kêp Ijaew na wa. Kormã ixte Kris kôt amnhĩ xãm kêt ri na pre wa kumrẽx hkôt amnhĩ xãm. Na hte Jejus nhỹ hã mẽ ahkre ho mẽ pa xwỳnhjaja wa kot Kris kapêr jarênh mex ã wa harẽ. Tã ã amnhĩ nhĩpêx anhỹrja mỳrapê na pre mẽ hkwỳjaja wa unê nẽ wa haxà pa prem ixpimràatã ixpê prês nẽ mẽ hãgjênh xà kamã ixkrĩ.

8 Nê Kris kôt mẽ pahtõ ãpritre mã ka mẽ ijarẽ. Kêp Kris kôt ixkràmnhwỳ mex na.

9 Nê Kris kôt mẽ pahtõ Upãnre mã ijarẽ. Na hte ixpyrà nẽ Kris mã tanhmã amnhĩ nhĩpêx to ho ri pa.

Nê Kris kôt mẽ pahtõ Etaki mẽ ijarẽ. Kêp ixkràmnhwỳ mex na.

10 Nê Kris kôt mẽ pahtõ Apes ka mẽ kãm ijarẽ. Na prem ra Kris ã hipêx punuj nẽ no nhũm mẽ kutã amnhĩ to htỳx nẽ Kris kaga hkêt nẽ.

Nê Aristopti nhõrkwỹ kamã hkwỳjê mã ijarẽ.

11 Nê Kris kôt mẽ pahtõ Erojãwti mã ijarẽ. Ixpyrà nẽ kêp Ijaew na.

Nê Nasisti nhõrkwỹ kamã Kris kwỳjaja ka mẽ kãm ijarẽ.

12 Nê Kris kôt mẽ pahtõx Xiripêre mẽ Xiripos wa kãm ijarẽ. Wa kêp Pahihti Jejus mã tanhmã amnhĩ nhĩpêx mex to xwỳnh na wa.

Nê Kris kôt mẽ pahtõx Pesixti mã ijarẽ. Haxwỳja kêp ixkràmnhwỳ na. Na hte Pahihti Jejus mã tanhmã amnhĩ nhĩpêx mex to ho ri pa.

13 Nê Kris kôt mẽ pahtõ Rupti mã ijarẽ. Na hte Kris kôt amnhĩ nhĩpêx mex o ri pa. Nẽ katorxà mã ijarẽ. Na pre te ixpê hkra nhĩpêx pyræk o inhĩpêx.

14 Nē Kris kôt mē pahtō Asīnre mā nē Prekōxti nē Emes nē Patopas nē Emas mē. Jajē piitā mē pahkwỳ kot mē hwỳr pikuprōnh xwỳnhjē mē mē ho apimràatā mē kām ijarē.

15 Nē Kris kôt mē pahtō Pirorti mā nē mē pahtōx Juure mē Nērew wa nē htōxja nē mē pahtō Orīpti wa mē kām ijarē. Nē mē pahkwỳ kot mē hwỳr pikuprōnh xwỳnhjē mē mē ho apimràatā mē kām ijarē.

E kêr ka mē jajē piitā mē kām ijarē. Na pa hte mē kām ijamaxpēr rāhā ho ri ixa.

16 Nom mē tapxipixjaja kêr. Ā mē apiitā mā na pa hte ijamaxpēr rāhā ho ixa.

Nē ota jar Kris kwỳjaja mē awỳr hpēr mē.

17 Kwa ixkràmnhwỳjaja. Na ka mē ra aprī hā Tīrtūm kapēr mar tỳx nē. Tā kêr ka mē amnhī nē mē kot Tīrtūm kapēr o hêx xwỳnhjē pumunh mex o apa. Mē kām axpēn nē mē ato hpigrānh par prām. Nē mē ate Kris kaga nē hpānhā mē kot amnhī nhīpêx o amnhī nhīpêxja mē kām hprām jakamā kwa mē amnhī nē mē omunh mex nē axkām ajamak rom. ¹⁸ Na htem ā amnhī nhīpêx anhỳr o Pahihti Kris mā tanhmā amnhī nhīpêx to ho pa hkêt nē. Ām amnhī hkrā hkôt tanhmā ri hkwyjê jahkre hto ho pa. Kot mē no kupyw kaxyw tanhmā mē kām hêx to ho ri mē hkôt pa. Te mē ahkre mex pyrāk tā mē ahkre mex kêr nē. Jakamā nhūm htỳx ri mē pa xwỳnhjaja mē kot mē ahkreja ma nhūm te mē kām mex pyrāk. Jakamā kwa mē okora mē amnhī nē mē omunh mex nē. ¹⁹ Na ka htem mē kurom Kris kôt amnhī nhīpêx mex nē nhūm xep mē piitā mē apumu nē axpēn mā

ja hã mẽ ajarēnh o ri pa. Pa mẽ ajarēnh ma nẽ ixkĩnh nẽ. Tã kêr ka mẽ arĩ ajamaxpēr mex rãhã ho ri ajamaxpēr o apa. Nẽ amnhĩ nhĩpêx mex rãhã nẽ. No tanhmã ajamaxpēr punuj to ho ri amnhĩ tomnuj o ri apa hkêt nẽ. ã mẽ ate amnhĩ nhĩpêx anhỹrja na inhmã hprãm.

²⁰ Nẽ na hte Satanasti mẽ hkwyjaja mẽ ate Jejus kaga hprãm xaj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpēr kêt nẽ. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nẽ hpĩr pyræk o mẽ hipêx. Jakamã ã mẽ kot mẽ anhĩpêx anhỹr tã koja Tĩrtũm mẽ amã mẽ ajamakêtkati xaja gõ. Tapxipix na kot mẽ pajamakêtkati xà nhõr kaxyw àhpumunh tỳx.

Nẽ na pa hte mẽ ato Pahihti Jejus wỳ nẽ kãm:

—Pa Pahihti. Kwa kêr ka Rõm kãm akwỳjê pumu nẽ mẽ ho mex nẽ mẽmoj to mẽ kutã anojarêt rãhã ho ri apa. Anẽ.

²¹ Nẽ ota mẽ pahtõ Ximotreja mẽ awỳr hpēr mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nẽ ixtõ Rusti mẽ Jasawti mẽ Sosipa wa mẽ haxwỳja mẽ awỳr hpēr mẽ.

²² Nẽ kot inhmã ixkapēr ã kagà xwỳnh Testi haxwỳja mẽ awỳr hpēr mẽ. Kêp Kris kôt mẽ pahtõ na. ²³ Nẽ Kris kôt mẽ pahtõ Gajre haxwỳja mẽ awỳr hpēr mẽ. Õrkwỹ kamã na hte Kris kwỳjaja xpẽn wỳr akuprõ nẽ kamã Tĩrtũm mã amnhĩ jarẽ nẽ kapēr ã kagà kamã harẽ nẽ mar o hkrĩ. Õrkwỹ kamã na pa pre pøj.

Ně mẽ pahtõ Eras haxwỳja mẽ awỳr pěr mẽ. Na hte jar krĩ ja kamã Rõm nhõ pahihti mã õ kàxpore jamãr pê ho mẽmoj to anhỳr o pa.

Ně Kris kõt pahtõ Kwatre haxwỳja mẽ awỳr hpěr mẽ. E jajaja piitã na mẽ awỳr hpěr rẽ.

²⁴ E kê Pahihti Jejus Krisja mẽ akutã nojarêt rãhã ho pa.

Pawre kot Tĩrtũm mex o mex ã harẽnh

Epes 1.3, 3.20-21; Wam Ximotre 1.17; Eprêw 13.20; Jutre 24-25

²⁵ Ně kwa kêr pu mẽ Tĩrtũm mã mex ã harẽnh rãhã ho ri papa.

Ně ixte mẽ amã Jejus Kris jarẽnh ta ã ka prem ama nẽ hkõt amnhĩ xunhwỳ. Tã koja mẽ ato mẽ axihtỳx ka mẽ hkõt axihtỳx kãm hkõt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarẽnh kêt nẽ. Kormã ja ho hpimxur ryy nẽ. ²⁶ Tã ã mẽ anhĩpêx anhỳrja o amnhĩrĩt nẽ ý hã mẽ kapêr jarẽnh o ri pa xwỳnhjê mã kapêr nẽ mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkõt kamã harẽ nẽ kuma. Nom kê Ijaew pixjaja mar kêt nẽ. Kê pika piitã hkõt kamã harẽ nẽ kuma. Panhĩ nẽ kupê nẽ kupê hkà htykre nẽ mẽ hkà haka nẽ mẽ hkà kamrêkjaja. Kê mẽ piitã Jejus jarẽnh ma nẽ amnhĩ kaxyw hkõt hamaxpêr nẽ hkõt amnhĩ xunhwỳ. Hãmri nẽ hkõt amnhĩ nhĩpêx mex o ri pa. Anẽ.

Nhũm pre ã mẽ pakaxyw mẽ kãm kapêr anẽ nhũm prem kuma nẽ hã kagà.

27 Nà Tĩrtũmja tapxipix na àhpumunh tỳx xwỳnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harẽnh rãhã ho papa.

Tã ãm ja pix. Ixpê Pãwre na pa ã mẽ awỳr ixpẽr mẽnh anẽ. Na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

383a4e22-34cd-505f-9cc2-2f9921e7aa9f